

प्रेरितन्हक काम



प्रेरितन्हक काम

(दङ्गौरा थारू)

२०६८

Acts of the Apostles

Trial Edition

2012

(1000 Copies)

Illustration on cover by

© David C. Cook Publishing Company, 1978.

Used with permission.

Illustrations on pages 3, 5, 9, 10, 23, 26, and 82 by

© David C. Cook Publishing Company, 1978

Used with permission.

Illustrations on pages 28, 30, 35, 36, 43, and 50 by Graham Wade

© United Bible Societies, 1989, Nairobi, Kenya.

Used with permission.

Dangaura Tharu Language and
Literature Project and
Dangaura Tharu Translation Committee

प्रेरितन्हक काम

किताबक परिचय

धेर जन बाइबल विद्वानहुँकन्हक विचारम, लौव नियमम रहल २७ ठो किताबमध्येम लूका दुइठो किताब – लूकक् लिखल खुशिक खबर ओ प्रेरितन्हक काम+ - लिखल। ऊ यी दुनु किताब थियोफिलस कना व्यक्तिक लाग लिखल। ऊ 'खुशिक खबरम' येशू ख्रीष्टक बारेम लिखल, ओ 'प्रेरितन्हक कामम' येशूक ज्वाजल प्रेरितहुँकन्हक ओ प्रेरित पावलक करल कामक बारेम लिखल। ऊ यी किताब आजसे लगभग दुइ हजार वर्ष आघ लिखल।

लूका एकठो वैदावा ओ इतिहासकार रलह (थप जानकारीक लाग 'लूकक् लिखल खुशिक खबर' किताबक परिचय हेरी)। ऊ यी किताबम येशू ख्रीष्ट स्वर्गम उठागैल् समयसे लेक खुशिक खबर फैलटी पृथ्वीक कोनिकाटरसम पुगलक बात लिखरल्ल।

यी किताबम कौनो-कौनो खण्डम उल्लेख हुइल् 'हम्र' शब्दले सम्बन्धित ठाउँम लूका अपन्हे फे उपस्थित रलह कना बात थाहाँ हुइठा। लूका पावलक संघारी रलह ओ पावलक प्रचार यात्रम कौनो-कौनो ठाउँम लूका फे हुँकाहार सँगसँग गैलह (प्रेरित १६:१०-१७; २०:५-२१:१७)। पावल रोमम जाइबेर लूका हुँकाहार सँग गैलह (प्रेरित २७:१-२), ओ रोमम पावल कैदम परल समयम लूका हुँकाहार सेवा कर्लह (२ तिमोथी ४:११)।

हुइना त यी किताबह 'प्रेरितन्हक काम' कैक कैजिठा, तर वास्तवम यहीह 'पवित्र आत्मक काम' फे कह सेकजैठा, काकरकि प्रेरितन्हक करल सब काम पवित्र आत्मक अनुग्रह ओ शक्तिले कैगिलरह। प्रेरितहुँक्रे जहाँ-जहाँ गैल, पवित्र आत्मा हुँकन उहँ-उहँ येशू ख्रीष्टक बारेम मनैन खुशिक खबर प्रचार करक लाग शक्ति देलन। उ समयम ख्रीष्टीयनहुँकन धेर सतावट रलसे फे, ख्रीष्टीयन विश्वास यरूशलेमसे शुरु होक रोमसम बिस्तार हुइल। उहओसे यी काम पवित्र आत्मक शक्तिले हुइल् हो कना बात स्पष्ट देखपठा।

+प्रेरित कलक परमेश्वरक खुशिक खबर प्रचार कर पठाइक लाग येशू ख्रीष्टक ज्वाजल बाह जन चेलावँ हुइट। थप जानकारीक लाग "प्रेरित" शब्दके अर्थ हेरी।

विषयसूचि

- येशू स्वर्गम उठागैल त पवित्र आत्मा आक विश्वासीहुँकन और यहूदीहुँकन खुशिक खबर प्रचार करक लाग शक्ति देल (१:१-६:७)
- यहूदीहुँकन स्तिफनसक हत्या कर्ल, तर विश्वासीहुँकन विभिन्न ठाउँम प्रचार कर्ल ओ पाछ पावल विश्वास कर्ल (६:८-६:३१)
- पत्रुस, ओ पाछ बारनाबास ओ पावल अयहूदीहुँकन येशूक बारेम प्रचार कर्ल (६:३२-१२:२४)
- पावल ओ हुँकाहार संघरेन अयहूदीहुँकन प्रचार कर्ल, ओ यरूशलेमक अगुवन गल्ती शिक्षह सुधार कर्ल (१२:२५-१६:५)
- पावल धेर ठाउँम जाक प्रचार कर्ल ओ धेर मनै विश्वास कर्ल (१६:६-१६:२०)
- पावल कैदीक रूपम रोमम गैल, तर फे येशूक बारेम धेर मनैन प्रचार कर्ल (१६:२१-२८:३१)

येशू आपन चेलन निर्देशन देल ओ स्वर्गम उठागैल

१ माननीय थियोफिलस, येशू काम कर ओ शिक्षा दिह शुरु करलठेसे स्वर्गम नैजाइट्सम्मक सब बात मै पैल्हक किताबम अप्नक लाग लिखदेरख्नु। २ तर उहाँ स्वर्ग जैनासे आघ आपन ज्वाजल प्रेरितहुँकन पवित्र आत्माद्वारा थप निर्देशन देल। ३ दुःख भोग्क कूसम मुलक पाछ उहाँ चालीस दिनक अवधिम कैयौचो हुँकन्हकठे देखपर्ल, ओ अप्न जीटी रलक धेर तरिकासे पक्का प्रमाण देल, ओ हुँकनसे परमेश्वरक राज्यक बारेम बात बटोइल। ४ एकघो येशू हुँकन्हकसँग



येशू बद्दीक उप्पर उठागैल (१.६)

खाना खाइबेर हुँकन असिक आज्ञा देल, "मै पैल्हहँ टुँहन कहलअस परमेश्वर बाबा आपन बाचा करल टुहन देना वरदान नैपठाइट्सम टुह यरूशलेम छोर्क कहाँ जिनजैहो कना बात सुनरख्लो। ५ यूहन्ना पानीक बप्तिस्मा दिहँट तर टनिक्क दिनम टुह पवित्र आत्मक बप्तिस्मा+ पैबो।"

६ उहओसे जब प्रेरितहुँकन येशूकसँग जम्मा हुइल, तब हुँकन उहाँह पुछ्ल, "प्रभु, का अप्न यह समयम हमार इस्राएल देशक राज्य फेदोस्र स्थापना कैदेबी?"

७ उहाँ कल, "याकर समय जन्ना काम टुन्हक नैहो। याकर समय तोक्ना अधिकार परमेश्वर बाबकठे केल बाटन। ८ तर पवित्र आत्मा टुन्हकम अइहीं त टुह शक्ति पैबो। तबदोस्र टुह यरूशलेम शहरम, सारा यहूदीया ओ सामरिया क्षेत्रम, ओ पृथ्वीक कोनिकाटरसम म्वार साक्षी हुइबो।"

९ उहाँ यी बात बट्वाक सेकल त, हुँकन हेटीहेटी उहाँ स्वर्गओर बद्दीक उप्पर उठागैलक कारण, उहाँ हुँकन्हक नजरमसे बिलागैल।

१० हुँकन एक टक लगाक आकाशम येशू उप्पर उठाजाइट हेटीरहल् ब्याला

+ १.५ पवित्र आत्मक बप्तिस्मा; याकर मतलब परमेश्वर आपन आत्मले पापी मनु घुमाक उहाँकठे अउइयन आशिष देहहीं ओ सहायता करहीं कना हो। उहाँ हुँकन पापमसे पवित्र करहीं, असल डगर देखेहीं, ओ परमेश्वरक इच्छा पूरा करक लाग शक्ति देहीं।

१.१ - लुक १:१-४. १.४ - लुक २४:४६. १.५ - मत्ती ३:११; मार्क १:८; लुक ३:१६; यूह १:३३.

१.८ - मत्ती २८:१६; मार्क १६:१५; लुक २४:४७-४८. १.९ - मार्क १६:१६; लुक २४:५०-५१.

उज्जर भुल्वा घालल् दुईठो मनै अकचोट्टे हुँकन्हकठे देखपर्ल, ११ ओ कल, "हेरो गालील क्षेत्रक मनै, टुह काजे आकाशम हेटी अठे ठह्याइल् बाटो? जसिक टुह येशूह स्वर्गम उठाजाइट् देख्लो, ओसहेँक उहाँ घुम्क फेदोस अउइयाबाट।"

यहूदक ठाउँम मतियास नियुक्त हुइल

१२ तबदोस हुँक जैतुन पर्वत्वमसे घुम्क यरूशलेमम गैल। ओठेसे यरूशलेम लगभग एक किलोमीटर दूर बा। १३ यरूशलेम पुगक हुँक आपन बैठना घरक उप्रक ताल्हक क्वाठम गैल। हुँक पत्रुस, यूहन्ना, याकूब, अन्द्रियास, फिलिप, थोमा, बारथोलोमाई, मत्ती, अल्फायसक छावा याकूब, देशभक्त दलक सिमोन, ओ याकूबक छावा यहूदा रलह। १४ हुँक सबजन एकक मनक होक लगातार प्रार्थनाम लगलरहँट्। उ बगालिम येशूक डाई मरियम, और जन्नी मनै ओ येशूक भैयन फे रलह।

१५ एक दिन करीब एक सय बीस जन विश्वासीहुँक जम्मा हुइल् ब्याला पत्रुस ठह्याक कल, १६ "हेरो भैयौ, परमेश्वरक वचनम पवित्र आत्मा राजा दाऊदक मुहसे यहूदक बारेम

ब्वालल् वचन पूरा हुइ पर्ना रह। यहूदा येशूह पक्रक लाग मनैन लैगिल्। १७ पैल्ह ऊ हमारअस सेवकाई करक लाग हमारसँग नियुक्त हुइल् एकठो प्रेरित रह।

१८ (येशूह ध्वाखा देलक कारण पाइल पैसले यहूदा एकठो जग्गा किनल्। उह जग्गम ऊ मुहकभर खसल्। वाकर भुँर फुट्क भुँरपटक्का बाहार निसकौलस। १९ सारा यरूशलेमक मनै यी हल्ला सुन्ल ओ हुँक उ जग्गक नाउँ आपन भाषम "आखेल्दामा" ढर्ल, याकर अर्थ "रगतक जग्गा" हो।)

२० पत्रुस कल, 'उ घटना भजनसंग्रह किताबम लिखल् बात पूरा हुइक लाग हुइल् हो। उहींम असिक लिखल् बा -

वाकर घर सुनसान होजहींस्,
कुइ फे नैरहहींस्,
ओ वाकर कामक जिम्मा और
मनैया लेहींस्।'

२१ उहओसेँ हम्र वाकर सटाहा एकठो मनैयह ज्वाज पर्ना बा। उ मनैया हमार बगालिक हुइपरी, जौन बगालिम प्रभु येशू हमारसँग रलह। २२ उ मनैया, येशू यूहन्नसे बपितस्मा लिहल समयठेसे

लेक स्वर्गम उठागैल् दिनसम हमारसंग रहल हुइपरी। ओहीह हमार संगसंग येशू मुवलमसे फेदोस जीगैल कना बातक साक्षी हुइपरहीं।"

२३ उहमार हुँक दुइठो मनैन आघ सर्ल। एकठो योसेफ रलह, मनै हुँकहिन बारसाबास कहँट्। हुँकाहार और नाउँ युस्तस रलहन। और मनैयाजुन मतियास रलह। २४ हुँक असिक प्रार्थना कर्ल, "हे प्रभु, अप्न सबजन्हक मनक बात थाहाँ पैठी। हिँक दुइजनमध्ये अप्नक ज्वाजल मनैयह हमन चिन्हादी। २५ उ मनैया प्रेरित होक सेवकाई करी, काकरकी यहूदा मुक जहाँ जाइपर्ना रलहस् उहँ गैगिल्।" २६ तबदोस हुँक गोटी डर्ल। गोटी मतियासक नाउँम पर्लन्। असिक एघार प्रेरितन्हकम ऊ फे थपगैल।



पवित्र आत्मा आगीक जीभअस
विश्वासीन्हकम पर्लन (२.४)

पवित्र आत्मा विश्वासीहुँकन शक्ति देल

२ पेन्तिकोस कना टिहार आइल। विश्वासीहुँक सबजन एक्क ठाउँम जम्मा होरलह। २ तब स्वर्गसे एकचोट्टे आँधीबौखाअस आवाज आइल ओ हुँक रहल सलघरम आवाज सुनमिलल्। ३ तब आगिक जीभअस देखपर्ना कयौठो चिज देखपरल ओ भाग-भाग होक ओठे रहल सबजन्हकम पर्लन्। ४ हुँक सब जन पवित्र आत्मक शक्तिले भरगैल ओ पवित्र आत्मले बोल्ना शक्ति पाक हुँक अप्न नैजानल भाषा ब्वाल लग्ल।+

५ उ समयम संसारक विभिन्न देशमसे परमेश्वरक नियम मन्ना यहूदीहुँक यरूशलेमम आरलह। ६ जब मनै असिन हल्लाखल्ला सुन्ल, तब हुँक विश्वासीन्हकठे भीड लाग्गैल। हुँक छक्क पर्ल, काकरकि हुँकन सबजहन आपन-आपन भाषम ब्वालट् सुन्ल। ७ हुँक एकदम छक्क पर्ल ओ कल, "यी बोलुइयन सब गालील क्षेत्रक मनै नैहुइट का? ८ हम्र विभिन्न देशक मनै हमार आपन-आपन भाषा हुँकन ब्वालट् सुनटी। हुँक हमार फरक-फरक भाषा

+ २.४ नैजानल भाषा कलक नैसिखल भाषा हो। थप जानकारीक लाग "नैजानल भाषा" शब्दक अर्थ हेरी।

कसिक ब्वाल जन्ल? ६हम्र पार्थीक, मादीक, एलामीक, मेसोपोटामियक, यहूदीयक, कापाडोकियक, पोन्टसक ओ एशियक बासिन्दाहुँक हुडटी। १०हम्र फ्रिगिया, पामफिलिया, मिश्र देश ओ कुरेनिक लग्घ रहल लिबियक विभिन्न क्षेत्रसे आरली, ओ रोम शहरसे आइल यहूदीहुँक ओ यहूदी विश्वास स्वीकार करल अयहूदीहुँक फे बाटी। ११क्रेट टापु, अरब देशसे आइल मनै बाटी। हम्र हुँकन परमेश्वरक अचम्म कामक बारेम हमार आपन-आपन भाषम ब्वालट् सुनटी।" १२असिक अचम्म ओ अलमलम पर्क हुँक अप्न-अप्न पुछिकपुछा करभिर्ल, "याकर अर्थ का हो?"

१३तर औरजन हुँकन हँस्टी कल, "हिँक धेर मत्वार होरल।"

पत्रुसक प्रचार सुन्क धेर जन येशूकम विश्वास कर्ल

१४तब पत्रुस एघार चलनहकसँग ठहेइल ओ सब जन सुन्नागरी बोल्ल, "यहूदीया क्षेत्रक मनै ओ यरूशलेमम बैठुइयन सब जन, म्वार बात ध्यान देक सुनी, मै अप्नहुँकन यी बातक जानकारी कराइटु। १५अप्नहुँकनहक स्वाँचलअस हिँक मत्वार नैहुइट।

भक्खर त बिहानिक नौ बजरहल्। १६तर अघट्टे योएल अगमवक्तक कहल बात यिह हो-

१७परमेश्वर कठ,
'आखिरी दिनम मै सब मनैन्हकम रहक लाग आपन आत्मा पठादेहम।

टुन्हक छाईछावन अगमवाणी बोलहीं,
टुन्हक जवान मनै दर्शन देखहीं,
ओ टुन्हक उमेर ढल्लकल मनैजुन सपना देखहीं।

१८उ दिनम मै आपन सेवकसेविकन्हकम रहक लाग

आपन आत्मा पठादेहम,
ओ हुँक अगमवाणी बोलहीं।

१९आकाशम मै अचम्म-अचम्मक चिन्ह देखैम
ओ पृथ्वीम अचम्म-अचम्मक काम करम।

रगत, आगी ओ धुवाँधुकुन देखपरी।

२०प्रभुक महान ओ गौरवमय दिन अइनासे आघ दिनऽक साराओर अन्धार होजाई,

ओ जोन्ह्या रगतअस लाल
होजाई।

२१ प्रभुसे बिन्ती करुइया
सबजन उद्धार पैहीं।'

२२ इस्राएल देशक मनै म्वार बात
सुनी! परमेश्वर नासरत शहरक
येशूद्वारा अप्णहुँकन्हक सामुन्नेम
शक्तिशाली ओ अचम्मक काम, ओ
चिन्ह देखाक अप्ण उहाँह पठैलह
कना बातक प्रमाण देल। यी बात
अप्णहुँकन थाहँ बा। २३ परमेश्वर
आपन ज्ञान ओ योजना अनुसार येशूह
अप्णहुँकन्हक हाँठम सुम्पलह ओ
अप्णहुँक्रे दुष्ट मनैन्हक सहायताले
उहाँह क्रूसम किल्ला ठोक्क मुवैली।
२४ तर परमेश्वर येशूह मुवलमसे
जीयारखल। मृत्युक शक्तिसे परमेश्वर
उहाँह छुटकारा देरखल। काकरकी
मृत्यु उहाँह मुलकमुल रहल् कराइ
नैस्याकल्। २५ राजा दाऊद फे उहाँक
बारेम असिक कैरखल-

‘मै प्रभुह सड्डभर आपन समुन्नेम
देख्ठीबाटुँ।

उहाँ म्वार दाहिन पाञ्जर
पलरलकओसें
मै नैडरैबुँ।

२६ उहमार मै मनम आनन्दित बाटुँ,
ओ खुसीले अप्णक स्तुतिप्रशंसा
कर्तुँ।

मै आशम जीएम।

२७ काकरकी अप्ण महीहँ मुलकमुल
रह नैदेनेहुइटी।

अप्ण आपन पवित्र जनक शरीरह
कुह फे नैदेनेहुइटी।

२८ अप्ण महीह जीवन्क डगर
देखारख्ली,
अप्णकसंग रहबेर मै खुसीले
रमैटुँ।'

२९ हेरो भैयौं, हमार पूर्खा दाऊदक
बारेम मै पक्कासे कह सेकर्तुँ। उहाँ
मुल त मनै गज्यम ढर्लन् ओ उ गज्या
आम्हीसम फे पलबा। ३० दाऊदक
आप्पन् सन्तानमसे एक जहन ख्रीष्ट
बनाक हुँकाहारअस शासन कर्ना
अधिकार देना बात परमेश्वर बाचा
कैरखलह। दाऊद एक अगमवक्ता
रलह, ओ हुँकहिन यी बात थाहाँ
रलहन्। ३१ दाऊद भविष्यम हुइना
घटना पैलहहँ थाहाँ पारखलह ओ
ख्रीष्ट मुवलमसे फेदोस्र जीना बारेम
बोल्टीरलह। ऊ कल, ‘उहाँ मुलकमुल
नैरल ओ उहाँक शरीर फे नैकुहलन्।’
३२ यिह येशूह परमेश्वर मुवलमसे

फेदोस जीयारखल्लन्। हम्न सब जन यी बातक साक्षी बाटी। ३३ परमेश्वर बाबा येशूह उच्च मान सहित आपन दाहिन पाञ्जर बैठैलन् ओ आपन बाचा अनुसार उहाँह पवित्र आत्मा देलन्। प्रभु येशू उह पवित्र आत्मह आब हमारम रहक लाग पठादेरखल, जौन बात अप्णहुँक देख्तीबाटी ओ सुन्तीबाटी। ३४ काजेकलसे येशूकअस दाऊद शरीरम स्वर्ग नैगैल तर फे ऊ असिक कल,

"परमप्रभु म्वार प्रभुह कल:

म्वार दाहिन पाञ्जर सबसे धेर सम्मान ओ अधिकार रहल ठाउँम बैठो।

३५ जबसम मै टुँहार शत्रुन हराक टुहाँर ग्वारक टर नैकरैम।'

३६ उहमार इस्राएलक सब मनै यी बात पक्कासे जान परी - अप्णहुँक क्रूसम टङ्गाक मुवैलक येशूह परमेश्वर प्रभु ओ ख्रीष्ट बनारखल।"

३७ पत्रुसक बात सुन्क मनै धेर दुखित हुइल, ओ हुँक पत्रुस ओ और प्रेरितहुँकन कल, "हेरो भैयौ, ओसिन हो कलसे आब हम्न का करी?"

३८ तब पत्रुस कल, "अप्णहुँक सब जन आपन-आपन पापी मन

घुमाक परमेश्वरकठे आई, त उहाँ अप्णहुँकन क्षमा करहीं, ओ परमेश्वरकठे अइलक प्रमाणक रुपम येशू ख्रीष्टक नाउँम बप्तिस्मा ली। तब अप्णहुँक पवित्र आत्मक वरदान पैबी। ३६ यी बाचा अप्णहुँकनहक लाग, अप्णहुँकनहक सन्तानहक लाग ओ अयहूदीनहक लाग फे हो, जेहीजेही परमप्रभु परमेश्वर बलैठ।"

४० पत्रुस हुँकन अस्तै-अस्तै धेर बात सिखैल ओ अर्ती देटी कल, "येशूह इन्कार कर्तीरना यी मनैहकम अइना दण्डसे टुह आपन जीवन बँचाओ।" ४१ पत्रुसक दिहल सन्देशम धेर जन विश्वास कर्ल ओ बप्तिस्मा लेल। उ दिन करीब तीन हजार विश्वासीहुँक मण्डलीम थपगैल।

धेर अचम्म-अचम्मक काम

हुइल् ओ विश्वासीहुँक

एक-औरजन्हक खाँचो टारदेल

४२ हुँक प्रेरितहुँकनहक सिखाइल बात मानंट, ओ संगती कर्ना, सँगसँग खानपिन कर्ना (प्रभु-भ्वाज समेत) ओ प्रार्थना कर्ना कामम लग्लरहंट। ४३ प्रेरितहुँक अचम्म-अचम्मक काम कर्ल ओ चिन्ह देखैल। ओ सब जन परमेश्वरक धेर आदर कर्ल। ४४ प्रभुकम विश्वास करुइयन सब

जन जम्मा हुइटीरहँट् ओ हुँकन्हक सब चिज साभया रलहन्। ४५ हुँक्र आपन-आपन जग्गाजमिन ओ चीजबीज बँचक एक-औरजन्हक खाँचो टारदिहँट्। ४६ हुँक्र हरेक दिन मन्दिरम जम्मा होक आराधना करँट्, ओ प्रभुभवाज मनाइबेर घरघरम खुशी ओ नम्र होक संगसंग खाना खाइँट्। ४७ हुँक्र परमेश्वरक प्रशंसा करँट् ओ और सब जन हुँकन् मन पराइँट्। प्रभु उद्धार पाइल् मनैन् हरेक दिन हुँकन्हक बगालीम थपदेटीरहँट्।

पत्रुस जर्मटिहीक एकठो नाङ्गर मनैयह चोखैल

३ एक दिन पत्रुस ओ यूहन्ना दिनक तीन बजेओर मन्दिरम प्रार्थना कर जाइटलह। उ यहूदीन्हक प्रार्थना कर्ना समय रह। २ मनै जर्मटिहीक एकठो नाङ्गर मनैयह हरेक दिन बोक्क आनँट् ओ मन्दिरम जैना 'सुन्दर' नाउँक गेटठे बैठादिहँट्। ऊ मन्दिरम अइना जैना मनैनसे भिख माङ्ग। ३ जब ऊ पत्रुस ओ यूहन्नह मन्दिरम जाइट् द्याखल्, तब ऊ हुँकनसे भिख माङ्गल्। ४ हुँक्र ओहीह एकटक लगाक हेर्ल, ओ पत्रुस ओहीह कल, "यिहँ हेर्।" ५ यी सुन्क उ मनैया



पत्रुस जर्मटिहीक नाङ्गर मनैयह चोखैल (३.६)

कुछुकुछु पाडरम कना आशले हुँकन् ह्यारल्।

६ पत्रुस ओहीह कल, "म्वारठे स्वान चाँदी नैहो तर म्वारठे ज्या बा उह मै टोहीह देहम। नासरत शहरक येशू ख्रीष्टक नाउँम नेङ्ग।" ७ तब पत्रुस वाकर दाहिन हाँठ पकर्क उठैल। तबहँ वाकर पौली ओ घुट्टी बलगर होगैल्स्। ८ ऊ उल्लल् ओ न्याङ्ग लागल्। ऊ नेङ्गटी, उल्लटी, ओ परमेश्वरक प्रशंसा कर्ती हुँकन्हकसंग मन्दिरम गैल्। ९ सब जन ओहीह न्याङ्गट् ओ परमेश्वरक प्रशंसा करट् देख्ल। १० मन्दिरक 'सुन्दर' कना गेटठे बैठक भिख मङ्गुइया यिह हो कैक हुँक्र ओहीह चिन्हल ओ उ मनैया न्याङ्ग सेकना हुइलकम छक्क पर्ल।

+ ३.६ येशू ख्रीष्टक नाउँम कलक येशू ख्रीष्टक अधिकारम कहल हो।

पत्रुस उ घट्णक वयान कर्टी
हुँक येशूकम विश्वास
करपर्ना बात बटोइल

११ सब जन अचम्म मान्क हुँकन्हकठे सोलोमनक बरण्डा कना ठाउँम दगुर्ती अइल। उ मनैयाजुन खुसीले पत्रुस ओ यूहन्नह पक्रलरह। १२ हुँकन् देख्क पत्रुस कल, "हे इस्राएलीहुँक, यी बातम अप्णहुँक काजे छक्क परलबाटी? हम्र आप्णन शक्ति या भक्तिले यहीह न्याङ्ग सेक्ना बनाइलअस काजे वाल्ल पर्क हमन ह्यारटी? १३ हमार पितापूर्वा अब्राहाम, इसाहक ओ याकूब जौन परमेश्वरक आराधना कर्ल, उह परमेश्वर आपन सेवक येशूह आदर कर्ल। अप्णहुँक उहाँह मुवैहीपरी कैक सुम्पदेली। पिलातस उहाँह छोरदेना विचार कैरख्लह तर अप्णहुँक नैमन्ली। अप्णहुँक पिलातसक सामुन्नेम उहाँह इन्कार कैदेली। १४ उहाँ पवित्र ओ निर्दोष रलसे फे अप्णहुँक उहाँह अस्वीकार कैदेली, बेनसे एकठो ज्यानमारह छुटामड्ली। १५ अप्णहुँक जीवन देहुइयह मुवैली। तर परमेश्वर उहाँह मुवलमसे जीयादेरख्ल। हम्र यी बातक साक्षी हुइटी। १६ उहाँकम विश्वास कर्लक कारण अप्णहुँकन्हक द्याखल्



पत्रुस उ घट्णक बयान कर्टी मनै
येशूकम विश्वास करपर्ना बात
कल (३.१६)

ओ जानल् यी मनैया बलगर होरहल्। उहाँक नाउँम करल् विश्वासले यी मनैया पूरा चोखैलक अप्णहुँक देख्टीबाटी।

१७ आब, हेरो भैयौ, महींह थाहाँ बा कि अप्णहुँक येशूह अन्जानम मुवैली, ओ अप्णहुँकन्हक अगुवन फे उह कर्ल। १८ तर परमेश्वर आपन ब्वालल् अगमवाणी असिक पूरा कर्ल। उहाँ ख्रीष्टह दुख भ्वाग परहीन कैक अगमवक्तन्हक मुहसे अघट्टे अगमवाणी बोलरख्लह। १९ उहमार आब आपन्-आपन् पापी मन घुमाक परमेश्वरकठे आई, तब उहाँ अप्णहुँकन्हक पाप क्षमा कैदेहीं। असिक अप्णहुँक परमेश्वरसे शान्ति ओ शक्ति पैबी। २० अप्णहुँकन बचाइक लाग आघहें परमेश्वरक नियुक्त करल् ख्रीष्ट

येशूह पठादेहीं। २१ परमेश्वर अघट्टे आपन पवित्र अगमवक्तन्हक मुहसे कहलअस, सब चिज लौव बनैना समय नैआइत्सम येशू स्वर्गहेंम पलरहपठा। २२ मोशा फे असिक कैरख्ल, 'परमप्रभु टुन्हक परमेश्वर टुन्हकके जातिमसे म्वारअस एकठो अगमवक्ता पठुइयाबाट। टुह उहाँक कहल् सब बात मानपठा। २३ उहाँक कहल् नैमनुइया परमेश्वरक मनैन्हक बगालिमसे निक्कावापाई ओ नाश हुई।

२४ वास्तवम, शमएलठेसे लेक सब अगमवक्ताओ आजकाल हुइटीरहल् घटनक बारेम बोलरख्ल। २५ अगमवक्तन्हक कहल् परमेश्वरक बाचा अप्नहुँकन्हक लाग हो। हमार पूर्वनसे परमेश्वरक करल् बाचा अप्नहुँकन्हक लाग फे हो। परमेश्वर हमार पूर्वा अब्राहमह कल, 'सारा पृथ्वीक मनै ट्वार सन्तानद्वारा आशिष पैहीं। २६ जब परमेश्वर आपन् सेवक येशूह पठैल, तब उहाँ अप्नहुँक सबजहन दुष्ट काममसे घुमाक आशिष देहक लाग पैल्ह उहाँह अप्नहुँकन्हकठे पठैलह।"

यहूदी अगुवन पत्रुस ओ यूहन्नह थुनल ओ धम्की देक छोरदेल

✘ पत्रुस ओ यूहन्ना मनैन्से बटोइटीरलह त पुजेहोन्, मन्दिरक डोरपालेन्हक कप्तान, ओ सदुकीहुँक अइल। २ हुँक रिसले चूर होरलह, काकरकी पत्रुस ओ यूहन्ना 'येशू मुवलमसे जीरल, ओ और मुवल मनै फे जीउइयाबाट' कैक मनैन सिखाइटलह। ३ उहओसे हुँक हुँकन पक्रल, ओ सन्भया हुइलओसे हुँकन् रातभरीक लाग थुन्देल। ४ तर वचन सुनुइयामध्ये धेर जन विश्वास कर्ल। असिक येशूकम विश्वास करुइया पुरुष मनै लगभग पाँच हजार पुग्ल।

५ द्वासर दिन शासकहुँक, अगुवाहुँक ओ धर्मगुरुहुँक यरूशलेमम जम्मा हुइल। ६ सभम प्रधान पुजेह्वा हन्नासरलह, ओ और जन कैयाफा, यूहन्ना, अलेक्जेण्डर ओ प्रधान पुजेहोक् खलकक् मनै फे रलह। ७ हुँक पत्रुस ओ यूहन्नह सभम अन्ल ओ पुछ्ल, "यी नाङ्गर मनैयह चोखैना शक्ति या अधिकार टुहन के देहल?"

८ तब पवित्र आत्मक शक्तिले भरिपूर्ण होक पत्रुस हुँकन् कल, "आदरणीय जनतन्हक माननीय शासकहुँक ओ धर्मगुरुहुँक! ९ यी नाङ्गर मनैयह भलाइक काम कैक

मजा बनैलकम कसिक मजा हुइल् कैक हम्न हमन आज यी महासभक सामुन्ने छानबिन करजाइपर्ना हो कलसे १० मै अप्णहुँकन ओ सारा इस्राएलक मनैन स्पष्ट रुपले कहटु, कि अप्णहुँकन्हक सामुन्नेम ठह्याइल यी मनैयह नासरत शहरक येशू ख्रीष्ट चोखैलह। अप्णहुँक उहाँह क्रूसम टङ्गाक मुवैली तर परमेश्वर उहाँह मुवलमसे जीयादेल।

११ येशू त अप्णहुँक, घर बनइयन,

रदी ठह्वाक फाँकल् पत्था हुइट,
तर आब सबसे महत्वपूर्ण पत्था
होरल।

१२ उहओसे येशू केल मनैन् मुक्ति देह सेकठ काकरकी परमेश्वर हमन मुक्ति देहक लाग उहाँह बाहेक और कौनो जहन् नैपठैलहुइट।

१३ सारा सभक मनै पत्रुस ओ यूहन्नक साहस देख्क छक्क पर्ल, काकरकि उ दुइ जन धेर पहल लिखल् नैरलह, तर सर्वसाधारण मनै रलह। ओ सभक मनै हुँक येशूकसँग रहँट कना बात फे थाहाँ पैल। १४ तर चोखैलक ऊ नाङ्गर मनैयह पत्रुस ओ यूहन्नकसँग ठह्याइल देख्क हुँक कुछु कह नैसेक्ल। १५ उहमार हुँक पत्रुस ओ

यूहन्नह महासभमसे बाहार जैना आज्ञा देल ओ अप्ण-अप्ण केल होक छलफल कर्ल, १६ "आब हम्न हुँकन् का कर सेक्बी? हुँकन्हक करल् अचम्मक काम सारा यरूशलेमक मनै थाहाँ पारख्ल ओ हम्न फे यी बात इन्कार कर नैसेक्टी। १७ तर यी बात और मनैन्हक बीचम फैल नैदेहपरट्। 'येशूक बारेम आबठेसे किहुसे फे जिन बटोइहो' कैक हुँकन् चेतावनी देहपरल्।

१८ तबदोस हुँक पत्रुस ओ यूहन्नह फेदोस भित्तर बलैल ओ 'आबठेसे येशूक बारेम किहुसे बटोइना फे जिन बटोइहो ओ किहुह सिखैना फे जिन सिखैहो' कैक चेतावनी देल। १९ तर पत्रुस ओ यूहन्ना हुँकन् कल, "अप्णहुँकन्हक कहल् मन्ना कि परमेश्वरक कहल् मन्ना, परमेश्वरक नजरम कौन ठीक हो ? अप्णहुँक अप्णहे विचार करी ना। २० हम्न आप्ण द्याखल् ओ सुनल् बात बिना बोल्ल रह सेक्बोसेक्बोनैकर्टी।

२१ सभक मनै पत्रुस ओ यूहन्नह सजाय देना कुछु उपाय नैपैल त, हुँकन् धम्की देक छोरदेल। काकरकि हुँकन्हक करल् अचम्मक काम देख्क सब मनै परमेश्वरक प्रशंसा करटलह।

२२ ओ अचम्म प्रकारले चोखैलक उ

नाङ्गर मनैया चालीस वर्षसे फे धेर उमेरक रह।

**विश्वासीहुँक प्रार्थना कर्ल त,
साहससे वचन बोल्ना शक्ति पैल**

२३ छुट्कारा पैल त पत्रुस ओ यूहन्ना और विश्वासीन्हकठे गैल, ओ मुख्य पुजेहोन ओ अगुवन्हक कहल् सब बात हुँकन् सुनैल। २४यी बात सुन्ल त हुँक सबजन मिल्क परमेश्वरसे जोरसे प्रार्थना कर लगल, "हे प्रभु, आकाश, पृथ्वी, समुद्र ओ उहिँम रहल् सब चिज अप्न बनैलही। २५अप्न पवित्र आत्माद्वारा हमार पूर्खा दाऊदक मुहमसे बोल्ली,

'काजे अयहूदीहुँक भौँक्यैठ?
काजे मनै बेकारम जाल जोठ?
२६परमप्रभुक विरोधम ओ उहाँक
ज्वाजल ख्रीष्टक विरोधम
पृथ्वीक राजाहुँक ओ शासकहुँक
एकसाथ भेला हुइठ।'

२७वास्तवम अप्नक ज्वाजल सेवक येशूक विरोधम जाल ज्वारक लाग हेरोद, पन्तियस पिलातस, अयहूदीहुँक ओ इस्राएलीहुँक यहि शहरम जम्मा होरलह। २८हुँक त

अप्नक शक्ति ओ ईच्छाले आघहँ करल् निर्णय अनुसार कर्ल। २९आब हे प्रभु, हुँकन्हक धम्कीओर अप्नक ध्यान लगाई ओ अप्नक वचन प्रचार करक लाग हमन धेर साहस दि। ३०रोग्याबेरम्हेन चोखाइक लाग अप्नक शक्तिशाली हाँठ फैलाई ओ अप्नक पवित्र सेवक येशूक नाउँम अचम्मक काम हुइ स्याक।"

३१हुँक प्रार्थना कैक सेक्ल त हुँक जम्मा हुइल् ठाउँ हिलल्। तब हुँक सब जन पवित्र आत्मक शक्तिले भरगैल ओ परमेश्वरक वचन साहससे ब्वाल लगल।

विश्वासीहुँक आपन सम्पत्ति बाँट्देल्

३२सब विश्वासीन्हक एक हृदय एक मन रलहन्। हुँकन्हकठे रहल् चिज हुँक आपन नीजि सम्पत्ति नैसम्भँट, उहओसे हुँक आपनठे रहल चिज बाँडचुँड करँट। ३३प्रेरितहुँक प्रभु येशू मुवलमसे फेदोस जीरल कैक शक्तिशाली तरीकाले गवाही दिहँट ओ हुँक परमेश्वरसे प्रशस्त आशिष पाइँट। ३४हुँकमध्येम किहुह कुछु चिजिक खाँचो नैरलहन्, काकरकी ज्याकर-ज्याकरठे जग्गाजमिन या घरबार रलहन्, हुँक उ बैँचक आइल्

पैसा ३५ प्रेरितन्हकठे आनँट ओ उ पैसा मनैन्हक आवश्यकता अनुसार बाँटदिहँट।

३६ उदाहरणक लाग, साइप्रस टापूक योसेफ नाउँ रहल् लेवी कूलक एकठो मनैया रलह। प्रेरितहुँक हुँकहिन् 'बारनाबास' कहँट, ज्याकर अर्थ 'उत्साह देना मनैया' हो। ३७ ऊ आपन् जग्गा बैँचक पाइल् पैसा प्रेरितहुँकन्हकठे अन्ल।

हननिया ओ सफिराह परमेश्वरक न्यायम परल देखुक मनै डरैल

५ तर हननिया नाउँक एकठो मनैया रलह। ऊ ओ हुँकाहार गोसिन्या सफिरा आपन् जग्गा बैँचल। २ हुँक जग्गा बैँचलक आकुर रुप्या आपन लाग नुकैल ओ बाँकी रुप्या हननिया प्रेरितन्हकठे अन्ल।

३ तब पत्रुस कल, "हननिया, काजे तुँ आपन मनम शैतानह राज कर देलो ओ पवित्र आत्मसे भुट बोल्लो? जग्गा बैँचक आकुर पैसा काजे नुकैलो? ४ बैँचनासे आघ उ जग्गा टुन्हक्के नैरह का? जग्गा बैँचलो त, उहिमसे आइल् पैसा फे टुन्हक्के नैरह का? असिन कर्ना विचार टुन्हक मनम कसिक आइल्? टुह मनैनसे भुट नैबोल्लो तर परमेश्वरसे भुट बोल्लो।"

५ यी सुन्टीकि हननिया गिर्ल ओ मुगैल। यी घटना सुनुइयन सब जन

डरले कायल हुइल। ६ तबदोस्र जवान-जवान मनै आक हननियक लाश लुगले लपेट्ल ओ बाहार लैजाक गारदेल।

७ करिब तीन घण्टा पाछ हननियक गोसिन्या अइली। हुँकहिन् आपन् गोस्या मुलक थाहँ नैरलहिन्। ८ पत्रुस हुँकहिन् पुछ्ल, "महीह कहो त, का टुह अत्रहे पैसम आपन् जग्गा बैँचलहो?" ऊ कली, "हजुर, जग्गक म्वाल अत्रहे हो।"

९ उहओसे पत्रुस हुँकहीन कल, "प्रभुक आत्मह रिस लगैना बातम टुह कसिक सहमत हुइलो? हेरो! टुहार गोस्सेह गरुइयन ड्वारिटर आपुगरल। हुँक टुहिन फे गारक लाग लैजहीं।"

१० ऊ अत्रा बात सुन्टकी पत्रुसक ग्वारटर गिर्ली ओ मुगैली। जवान-जवान मनै भित्तर अइल त, हुँकहिन् मुवल देख्ल। उहओसे हुँक हुँकहिन् बाहार लैजाक हुँकाहार गोस्सेक पञ्ज गारदेल। ११ यी घटना हुइल् त सारा मण्डलीम ओ यी बात सुनुइया सबजन्हकम डर हुइलन्।

प्रेरितहुँक बेराम परल धेर मनैन चोखैल

१२ प्रेरितहुँक मनैन्हक बीचम धेर अचम्मक काम करँट ओ अचम्मक चिन्ह देखाइँट। सब विश्वासीहुँक मन्दिरक एकठो ठाउँम जम्मा हुइँट, ओहीह सोलोमनक

बरण्डा कहँट्। १३ हुइना त मनै हुँकन् आदर करँट्, तर हुँकनसे मिल्ना आँट कुई फे नैकरँट्। १४ जे होस्, धेर जन, पुरुष ओ स्त्रीहुँक, प्रभु येशूकम विश्वास कर्तिगैल ओ हुँकन्हक सङ्ख्या बहर्तिगैलन्। १५ अचम्मक काम हुइलकओसें मनै गल्ली-गल्लीम बेरम्हेन आन्क गोन्द्रीम, खट्टेम सुतादिहँट्। पत्रुस आइबेर हुँकाहार छैह्याँ केल हुइलसे फे हुँकन्हकम परन कना आशा करँट्। १६ यरूशलेमक आसपासम रहल् शहरसे फे धेर मनै अइल। हुँक बेरम्हेन ओ भूत लागल् मनैन आनँट् ओ हुँक सब जन चोखाजाइँट्।

यहूदी अगुवाहुँक प्रेरितहुँकन जेलम थुन्ल तर स्वर्गदूत हुँकन छुटादेल

१७ प्रधान पुजेह्वा ओ हुँकाहार सदुकी समूहक संघरेन् प्रेरितन्हक बिह् मुव लग्ल। १८ हुँक प्रेरितहुँकन पकर्क जेलम थुनदेल। १९ तर उह रात परमेश्वरक पठाइल एकठो स्वर्गदूत जेलक ड्वार उभक्क हुँकन् बाहार निक्रैल ओ कल, २० "आब जाओ, ओ मन्दिरम ठह्याक यी लौव जीवनक बारेम मनैन सुनाओ।"

२१ यी सुन्क प्रेरितहुँक बिहानी मन्दिरम गैल ओ मनैन सिखाइ लग्ल।

जब प्रधान पुजेह्वा ओ हुँकाहार मनै अइल, तब हुँक इस्राएलक सब अगुवन महासभम बलैल ओ जेलमसे कैदीन ल्यानो कैक आदेश देल। २२ तर सिपाहीहुँक जेलम गैल त प्रेरितहुँकन नैदेख्ल। तब हुँक घुम्क अइल ओ असिन खबर देल, २३ "जेलक ड्वार पक्कासे लगाइल् रह। डोरपालेहुँक ड्वारीम लग्लरलह। तर हम्र ड्वार उभक्ली त किहुह फे नैदेख्ली।" २४ हुँकन्हक बात सुन्ल त, मन्दिरक सिपाहीन्हक कप्तान ओ मुख्य पुजेहोन बक्क पर्ल। हुँक 'आब का-का हुइठा?' कैक जातसे अकमकागैल।

२५ उह ब्याला एकठो मनैया आइल् ओ कहल्, "म्वार बात सुनी, अप्णहुँक कैद करल् मनै त मन्दिरम ठह्याक मनैन सिखाइट।" २६ तब कप्तान ओ सिपाहीहुँक प्रेरितहुँकन लिह गैल। हुँक मनै पत्थरले मरहीँ कना डरले हुँकन् जबरजस्ती नैकैक अन्ल।

२७ हुँक प्रेरितहुँकन महासभम उपस्थित करैल। तबदोस प्रधान पुजेह्वा हुँकन पुछ्ल, २८ "हम्र टुँहन 'आबठेसे येशूक बारेम किहुह जिन सिखैहो' कैक चेतावनी देरख्लही। तर तुह त आपन शिक्षा सारा यरूशलेमम

फैलाडर्लो ओ येशूह मुवैलक दोष हमन लगाइ चाहटो।"

२६ तबदोस पत्रुस ओ और प्रेरितहुँकर कल, "हम्र परमेश्वरक कहल मान छोरक टुन्हक कहल मान नैसेकटी। ३० येशूह क्रूसम किल्ला ठोक्क अप्णहुँकर मुवैलही। तर हमार पितापूर्वन्हक परमेश्वर उहाँह मुवलमसे फेदोस जीयारखल। ३१ इस्राएलीहुँकर आपन पापी मन घुमाक परमेश्वरकठे अइहीं ओ क्षमा पैहीं कैक परमेश्वर उहाँह शासक ओ मुक्ति देहुइया बनाक आपन दाहिन पाञ्जर बैठारखल। ३२ हम्र यी बातक साक्षी हुइटी, ओ परमेश्वर आपन आज्ञा पालन करुइयन देलक पवित्र आत्मा फे साक्षी देटीबाट।

३३ जब सारा सभक मनै यी बात सुन्ल, तब हुँकर रिसले चूर हुइल ओ प्रेरितहुँकन मुवैना विचार कर्ल। ३४ गमलिएल नाउँक एक जन फरिसी+ रलह। ऊ मोशक व्यवस्थक एकठो धर्मगुरु रलह ओ सब यहूदीहुँकर उहाँह आदर करँट। ऊ सभम ठहेइल ओ एकघरिक लाग प्रेरितहुँकन बाहार पठैना आदेश देल। ३५ तबदोस ऊ सभम जुटल् मनैन् कल, "आदरणीय

इस्राएलीहुँकर, अप्णहुँकर यी मनैन का कराइक लाग बाटी? होश करी! ३६ कुछ वर्ष आघ थूदास नाउँक एकठो मनैया अप्ण महान व्यक्ति रलक दाबी करल। लगभग चार सय जन वाकर पाछ लागरलह, तर ऊ मुवावापाइल त, वाकर पाछ लगुइयन सब जन तितरबितर हुइल ओ हुँकन्हक नाउँनिशान हेरागैलन। ३७ तबदोस पाछ जनगणना कर्ना समयम गालील क्षेत्रक यहूदा देखपरल। धेर मनै वाकर पाछ लगल। तर ऊ फे मुवावापाइल ओ वाकर चेलावँ तितरबितर हुइल। ३८ उहओसे यी मामिलाम मै अप्णहुँकन् का सल्लाह देह चाहटुँ कलसे अप्णहुँकर हुँकन् कुछु जिन कराई। हुँकन् छोरदी। काकरकी यदि हुँकर मनैन्हक बनाइल् योजना ओ कामम लागल् हुइहीं कलसे, उ अपन्हे हेराजाई। ३९ तर यदि हुँकर परमेश्वरक योजना ओ कामम लागल् हुइहीं कलसे, अप्णहुँकर हुँकन् ज्वाक नैसेक्नेहुइटी। अप्णहुँकर परमेश्वरक विरोधम उठल् केल ठहर्बी।"

४० महासभक सदस्यहुँकर हुँकाहार सल्लाह मन्ल। हुँकर प्रेरितहुँकन भित्तर बलाक कोर्ना लगैल, ओ येशूक बारेम

+ ५.३४ फरिसी: येशू ख्रीष्ट जर्मनासे लगभग २०० वर्ष आघसे, यहूदी धर्मम, फरिसी ओ सुदकी कैजिना दइठो मुख्य समूह रलह। धरजसिन फरिसीहुँकर कर्मचारी रलह। यहूदी धर्मम राजनीतिक बात मिलेना ठीक नैहो कना हुँकन्हक विचार रलहने। धरजसिन धर्मगुरुहुँकर, टर्का दर्जक पुजेहोन, ओ अगुवन फरिसी समूहम रलह। थप जानकारीक लागे "फरिसी" शब्दक अर्थ हेरी।

किहुसे जिन बोलहो कैक हुँकन आदेश देल ओ छोरदेल। ^{४१} येशूकम विश्वास कर्लक कारण दुःख ओ अपमान सह पैना अनुमती पैलकम प्रेरितहुँक आनन्दित हुइटी सभामसे निकर्क गैल। ^{४२} हुँक हरेक दिन मन्दिरम ओ घरघरम जाक "येशू जो ख्रीष्ट हुइट" कना खुशिक खबर सिखैना ओ प्रचार कर्ना काम कर्टीरल।

विधवन्हक वास्ता करक लाग सात जन रोजगैल

६ उ समयम विश्वासीहुँक धेर बहर्टीरलह। तब ग्रीक भाषा बोलुइयन हिब्रू भाषा बोलुइयन्हकपर गनगन करलगल, काकरकी हरेक दिनिक खाना बाँटबेर हिब्रू भाषा बोलुइयन ग्रीक भाषा बोल्ना विधवन्हक वास्ता नैकरँट। ^२ उहोओसे बाह्र जन प्रेरितहुँक और सब विश्वासीन बलाक कल, "वचनक सेवकाई छोर्क हम्न खवैना ओ पियैना बातम अलमलैना ठीक नैहुई। ^३ हेरो भयौ, आब तुहमध्येमसे पवित्र आत्मा ओ बुद्धिले भरपूर हुइल् सात जहन् रोजो, ओ हम्न खानपिनक जिम्मा हुँकन् देबी। ^४ हम्नजुन प्रार्थना कर्ना ओ वचन सिखैना कामम लगलरबी।"

^५ यी बात सब जन मन परैल। हुँक विश्वास ओ पवित्र आत्माक शक्तिले

भरपूर हुइल् स्तिफनसह रोज्ल। हुँक फिलिप, प्रखरस, निकनोर, तीमोन, पर्मिनास, ओ यहूदी विश्वासम आइल् एन्टिओखिया शहरक निकोलाउसह फे रोज्ल। ^६ हुँक आपन् ज्वाजल् सातठो मनैन प्रेरितन्हकठे लैगैल, ओ प्रेरितहुँक हुँकन्हकम हाँठ ढैक प्रार्थना कैदेल।

^७ परमेश्वरक वचन फैलटी गैल। यरूशलेमम विश्वासीहुँक धेर बहर्टीगैल ओ यहूदी पुजेहोन धेर जन येशूकम विश्वास कर्ल।

स्तिफनस पक्राउ पर्ल

^८ परमेश्वरक अनुग्रह ओ शक्तिले भरपूर हुइलक स्तिफनस मनैन्हक बीचम धेर अचम्मक काम कर्ल ओ अचम्मक चिन्ह देखैल। ^९ तर सभाघरक कुइ-कुइ सदस्यन स्तिफनसक विरोध कर्ल। (उ सभाघरह मुक्त कमारन्हक सभाघर कैजाए।) विरोध करुइयन कुरेनी, अलेक्जेन्डीया, किलिकिया ओ एशिया इलाकमसे आइल यहूदीहुँक रलह। हुँक स्तिफनससे वादविवाद कर लगल। ^{१०} तर पवित्र आत्मा स्तिफनसह बुद्धि देलकओसे ऊ ब्वालबेर हुँक हुँकाहार सामना कर नैसेकल।

^{११} तबदोस्र हुँक औरजहन गोप्य रुपम मनाक 'हम्न मोशा ओ परमेश्वरक

विरोधम यी मनैयह ब्वालट् देख्लीं
कैक कह लगैल।

१२ असिक हुँक्र जनतन, अगुवन,
ओ धर्मगुरुहुँकन् फे उक्सैल। हुँक्र
सब जन स्तिफनसह पकर्क महासभम
लगैल। १३ हुँक्र भुट साक्षी बकक्
लाग मनैन् तयार कर्ल। उ भुट साक्षी
बकुइयन कल, "यी मनैया जब फे हमार
पवित्र मन्दिर ओ मोशक व्यवस्थक
विरोधम बोल्टीरठा। १४ हम्र यहीह
असिक कहट् सुन्ली, 'नासरत शहरक
येशू यी मन्दिरह भत्कादेहीं ओ मोशक
दिहल् रीतिथिति फे बदलदेहीं।"

१५ महासभम रहल् सब जन
स्तिफनसह एकटक लगाक
हेर्ल काकरकी हुँकाहार अनुहार
स्वर्गदूतक अनुहारअस चम्कटलहन्।

स्तिफनस इस्राएलक इतिहासमसे सन्देश देल

७ तब प्रधान पुजेह्वा स्तिफनसह
पुछ्ल, "का टुँहिन् दोष लगाइल्
यी बात सत्य हो?"

२ स्तिफनस जवाफ देल, "डाडु-
भैयन ओ आदरणीय अगुवाहुँक्र, म्वार
बात ध्यान देक सुनी। हामार पुर्खा
अब्राहाम हारान कना ठाउँम जैनासे

आघ मेसोपोटामिया देशम पलरहलम
महान परमेश्वर हुँकहिन दर्शन देलन्।
३ परमेश्वर अब्राहामह कलन्, "टुँ
आपन देश ओ आपन मनैन छोर्क मै
टोहीह देखैना देशम जा।'

४ तब अब्राहाम कल्दीन्हक देश
छोर्ल ओ हारानम जाक बैठ्ल।
हुँकाहार बाबा मुलन् त परमेश्वर
हुँकहिन अप्णहुँक्र आब बैठल् यह
देशम अन्लन्। ५ उ ब्याला परमेश्वर
अब्राहामह यी देशम पैला टेक्ना जग्गा
फे नैदेलन्। तर परमेश्वर 'यी टोहीह
ओ ट्वार सन्तानन् देहम' कैक बाचा
कर्ल, हुइना त उ ब्याला अब्राहामक
लर्कापर्का नैरलहन्। ६ परमेश्वर
अब्राहामह कल, "ट्वार सन्तान
विदेशम जाक बैठहीं। उ देशक मनै
हुँकन कमारा-कमारी बनैहीन् ओ चार
सय वर्षसम थिचोमिचो कैक धेर दुःख
देह्हीन्। ७ तर हुँकन कमारा कमारी
बनैना मनैन मै दण्ड देहम। तबदोस
हुँक्र उ देशमसे निकर्क यह ठाउँम
अइही ओ म्वार आराधना करहीं।"
८ उ समयम परमेश्वर अब्राहामह हुँक्र
उहाँक मनै रलक बाचक चिन्हक
रुपम हुँकाहार छावन्हक खतना+
विधि करक लाग आज्ञा देल। तबदोस

+ ७.८ खतना: लिंगक टुप्पक छाला काट्क फँक्ना यहूदी विधिह खतना कैजिठा। थप जानकारीक लाग "खतना" शब्दक अर्थ हेरी।

अब्राहामक छावा इसहाक जर्मल। जर्मलक आठवाँ दिनम अब्राहाम आपन् छावक खतना कर्ल। इसहाक आपन् छावा याकूबक खतना कर्ल। याकूब आपन् बाह भाइ छावन्हक खतना कर्ल। हमार बाह कुलक पूर्वाहुँक्रे हिँक्रे हे हुइट।

६ याकूबक छावन आपन भैया योसेफकपर बिह मुवट्। हुँक्रे योसेफह मिश्र देशक मनैनसे बँचदेल त ऊ कमारा हुइल। तर परमेश्वर हुँकाहारसँग पलरलह। १० परमेश्वर हुँकहिन सक्कु दुखकष्टसे छुट्कारा देल। ऊ मिश्र देशक राजा फारोकठे अइल। परमेश्वर योसेफह बुद्धि देलन ओ राजा योसेफक भलो सौँचल। तब फारो योसेफह मिश्र देशक प्रधानमन्त्री ओ आपन राजदरवारम बडाहाकिम बनैलन्।

११ तबदोस्र सारा मिश्र ओ कनान देशम अनिकाल परल्। हमार पुर्खाओं खैना नैपाक भुँखमरिम पर्ल। १२ मिश्र देशम अनाज बा कना सुन्ल त याकूब आपन छावन् पैल्हचो उ देशम अनाज किन पठैल। १३ हुँक्रे द्वासरचो अनाज किन गैल्म योसेफ

आपन डाडुभैयन आपन परिचय देल ओ योसेफ फे आपन परिवारन्हक बारेम राजा फारोसे परिचय करैल। १४ योसेफ आपन बाबा याकूबह सब जहान परिवार लेक मिश्रम अइना खबर पठैल। १५ तब याकूब आपन पचहत्तर जन्हक जहान परिवार लेक मिश्र देशम गैल। असिक याकूब ओ हमार पूर्खाओं उहँ बित्ल। १६ हुँकन्हक सन्तान हुँकन्हक मुवल शरीर शेकेम कना ठाउँम लैजाक गज्यम ढर्ल। उ जग्गा हमोरक छावनसे अब्राहाम चाँदिक पैसा तिर्क किनरख्लह।

१७ अब्राहामसे परमेश्वरक करल बाचा पूरा हुइना दिन पुगटह। उ समयम हमार इस्राएली मनै मिश्र देशम धेर बहर रलह। १८ तबदोस्र योसेफह नैचिहन्ना लौव राजा मिश्र देशम राज्य कर लगल। १९ उ राजा हमार पिता पूरखन्हक विरोधम जाल जोर्ल ओ हुँकन अत्याचार कर्ल। इस्राएलीन्हक लर्कन् मुवाइक लाग जर्मटिकि जबरजस्ती बाहार फाँक लगाइँट्।

२० उह समयम मोशा जर्मलह। ऊ परमेश्वरक नजरम सुन्दर रलह।

७.८ - उत १७:१०-१४; २१:२-४; २५:२६; २६:३१-३५:१८.

७.९ - उत ३७:११, २८; ३६:२, २१.

७.१० - उत ४१:३६-४१.

७.११ - उत ४२:१-२.

७.१३ - उत ४५:१, १६.

७.१४ - उत ४५:६-१०, १७-१८; ४६:२७.

७.१५ - उत ४६:१-७; ४६:३३.

७.१६ - उत २३:३-१६; ३३:१६; ५०:७-१३; यहो २४:३२.

७.१७-१८ - प्रस १:७-८.

७.१९ - प्रस १:१०-११, २२.

हुँकाहार डाई-बाबा तीन मैन्हासम हुँकहिन घरहेंम नुकाक पल्ल। २१ तर पाछ नुकाइ नैसेक्क घरसे बाहार ढर्ल त फारोक छाई हुँकहीन लैगिली ओ आप्पन छावा बनाक पल्ली। २२ मोशा मिश्रीहुकन्हक सब ज्ञानगुनक बात सिख्ल, ओ हुँकाहार बोलीवचन ओ कामकाज प्रभावशाली रलहन।

२३ चालीस वर्षक उमेरम मोशा आपन इस्राएली डाडुभैयनसे भ्याँट कर्ना ईच्छा कर्ल। २४ एक दिन मोशा एकठो मिश्रक मनैया एकठो इस्राएलीह पिटट् देख्ल त ऊ इस्राएलीक रक्षा कर गैल ओ बदला लेक ऊ मिश्रीह मुवादेल्। २५ इस्राएलीन अत्यचारमसे छुटकारा देहक लाग परमेश्वर हुँकहीन् पठारख्ल कना बात आपन डाडुभैयहुँक बुभहीं कैक मोशा सौँचलरलह। तर हुँक उ बात नैबुभ्ल। २६ द्वासर दिन मोशा दुईजन इस्राएलीहुँकन मारिकमारा करट् देख्ल। हुँकन मिलैना हिसाबसे मोशा कल, 'तुह डाडुभैयन होक फे काजे मारिकमारा करटो?'

२७ तर अन्याय करुइया इस्राएली मोशह घुचेटी कहल्, 'हमारम शासन कर ओ हमार न्याय कर टोही के पठाइल्? २८ काल उ मिश्रीह

मुवाइल्अस का टैं महीं फे मुवाइ ख्वाजट्या?' २९ यी सुन्ल त मोशा भागक मिद्यान कना देशम गैल ओ परदेशी होक बैठलग्ल। मोशक दुइठो छावन उहँ जर्मलन्।

३० चालीस वर्ष पाछ एक दिन सिनै कना पर्वत्वक लगघ उजार ठाउँम एकठो स्वर्गदूत मोशकठे जर्टीरहल् भ्रष्टीम देखपर्ल। ३१ यी देख्क मोशा छक्क पर्ल ओ मजासे ह्यारक लाग लगघ गैल त परमप्रभुक आवाज सुन्ल, ३२ 'मै ट्वार पितापूर्खा अब्राहाम, इसहाक ओ याकूबक परमेश्वर हुइटुँ।' यी सुन्क मोशा डरकमार लग्लगाइ लग्ल ओ हेर्ना आँट फे नैकर्ल।

३३ परमप्रभु मोशह कल, 'आपन चप्पल निकार, काकरकी टैं ठह्याइल् ठाउँ पवित्र बा। ३४ मिश्र देशम रहल् म्वार मनैन्हक दुखकष्ट मै आप्पन आँखिले देखरख्नु ओ हुँकन्हक बिलौना सुनरख्नु। मै हुँकन छुटकारा दिहक लाग आरनु। आब यी कामक लाग मै टोहीह मिश्र देशम पठैम।'

३५ यिह मोशह, आप्पन जातिक मनै 'हमन शासन कर ओ हमार न्याय कर टोहीह के पठाइल्?' कैक

अस्वीकार कर्लह। जर्टीरहल् भ्ण्टीम देखपर्लक स्वर्गदूतसे इस्राएलीन्हक अगुवा हुइक लाग ओ हुँकन छुट्कारा दिहक लाग परमेश्वर मोशह पठैल।
 ३६ उ मनैया मिश्र देशम, लाल समुद्रम ओ चालीस वर्षसम उजार ठाउँम अचम्म-अचम्मक काम कर्ल ओ चिन्ह देखाक आपन इस्राइली मनैन मिश्र देशमसे निक्रैल।

३७ इस्राएलीन असिक कहुइया यह मोशा हुइट, 'परमेश्वर टुन्हक आप्पन डाडुभैयन्हकमसे म्वारअस एकठो अगमवक्ता टुन्हकठे अनहीं।'
 ३८ इस्राएलीहुँक उजार ठाउँम जम्मा हुइल्म मोशा उहँ रलह। स्वर्गदूत सिनै कना पर्वत्वम हुँकहिनसे बोल्लह। मोशा उह वचन हमार पूर्वन् कलह ओ हमन् दिहक लाग जीवित वचन पैलह।

३९ तर हमार पितापूर्वाहुँक हुँकाहार बात ओनैबोओनैबोनैकर्ल। बेनसे हुँक मोशह छोर्क मिश्र देशम घुम्ना विचार कर्ल। ४० हुँक मोशक डाडु हारुनह असिक कल, 'हमार आघआघ जाइक लाग डिउँटाओं बनादी, काकरकि हमन मिश्र देशमसे निक्राक अनुइया उ मोशह का हुइलस् कना बात हमन थाहाँ नैहो।' ४१ तबदोस हुँक

एकठो बच्छ्वक मूर्ति बनैल ओ ओइहँम बली चहैल। हुँक आप्पन हाँठले बनाइल् मूर्तिक खुशीयाली मनैल। ४२ तब परमेश्वर आपन नजर हुँकन्हकमसे हटैल। ओ हुँकन दिन, जोन्ट्या, ओ तोरैयक पूजा कर देल। अगमवक्तन परमेश्वरक वचनम असिक लिखरल्ल,

'हेरो, इस्राएलक मनै, का उजार
 ठाउँम
 चालीस वर्षसम महीह पशु
 काट्क बली चहैलहो?

४३ टुह मोलेख कना डिउँटक पाल
 लैगिलो
 ओ रेफन डिउँटा कना तोरैयक
 मूर्ति फे लैगिलो।
 उ मूर्ति टुह पूजक लाग अपन्हे
 बनैलहो।

उहमार मै टुँहन बेबिलोनसे फे दूर
 कैदी बनाक पठैम्।'

४४ सारा उजार ठाउँम हमार पूर्वन्हकठे 'परमेश्वरक उपस्थिति देखैना' एकठो पवित्र पाल रह। परमेश्वर मोशह देखाइल नमुना अनुसार उ पाल बनागैल् रह।

७.३५ - प्रस २:१४. ७.३६ - प्रस ७:३; १४:२१; गन्ती १४:३३. ७.३७ - व्य १८:१५, १८.

७.३८ - प्रस १६:१-२०:१७; व्य ५:१-३३. ७.४० - प्रस ३२:१. ७.४१ - प्रस ३२:२-६.

७.४२-४३ - आमो ५:२५-२७. ७.४४ - प्रस २५:६, ४०.

४५ परमेश्वर यी देशम रहल् अयहूदीन खेद्ल। यहोशु यी देश जीत्ल त, हमार पूर्खाओं उ पवित्र पाल यह देशम अन्ल। तबसे राजा दाऊदक पालासम उ पवित्र पाल यहँ पलरहल्। ४६ दाऊद परमेश्वरक निगाहा पैल ओ इस्राएलीहुँक आराधना करक लाग परमेश्वर सङ्ग पलरना एकठो भवन बनैना अनुमती मङ्गल। ४७ दाऊदक छावा सोलोमन परमेश्वरक भवन बनैल।

४८ तर सर्वोच्च परमेश्वर त मनैन्हक बनाइल् मन्दिरम नैबैठ्ट। अगमवक्ता कैरख्ल-

४९ परमप्रभु कठ,

‘स्वर्ग म्वार सिंहासन हो,
पृथ्वी म्वार ग्वारा ढर्ना ठाउँ हो।
तुह म्वार लाग कसिन मन्दिर
बनैबो?
मै आराम कर्ना ठाउँ कहाँ बा?
५० यी सब चिज म्वार बनाइल् नैहो
का?’

५१ अप्णहुँक हठी मनै हुइटी।
अप्णहुँक अयहूदीन्हकअस

परमेश्वरक आज्ञापालन कर या उहाँक वचन सुन नैचहटी। आपन पूर्वन्हकअस अप्णहुँक पवित्र आत्मक विरोध कर्टीरठी। ५२ अप्णहुँकन्हक पूर्खाओं कौन अगमवक्तह नैसँतैल? परमेश्वरक धर्मी जन अइना बारेम अगमवाणी करुइयन त भन मुवैना समेत कर्ल। उह धर्मी जनह अप्णहुँक धोखा देक मुवैली। ५३ अप्णहुँक स्वर्गदूतनसे परमेश्वरक धार्मिक व्यवस्था पैली, तर जानजानक फे पालन नैकर्ली।”

महासभक मनै स्तिफनसह पत्थ्रले मार्क मुवादेल्

५४ स्तिफनसक बात सुन्क महासभक मनै रिसले आगी हुइल ओ दाँत पिसभिर्ल। ५५ तर स्तिफनस पवित्र आत्मले भरपुर होक स्वर्गओर हेर्ल त परमेश्वरक महिमा ओ परमेश्वरक दाहिन पाञ्जर येशूह ठह्याइल् देख्ल। ५६ स्तिफनस कल, ‘हेरी, मै स्वर्ग उघ्रल् ओ मनैयक छावा

७.४५ - यहो ३:१४-१७. ७.४६ - २ शमू ७:१-१६; १ इति १७:१-१४.

७.४७ - १ राजा ६:१-३८; २ इति ३:१-१७. ७.४९-५० - यशै ६६:१-२. ७.५१ - यशै ६३:१०.


येशूह परमेश्वरक दाहिन पाञ्जर ठह्याइल् द्याखटुं।"

५७ अत्रहम हुँक आपन्-आपन् कान बुज्क जोरसे चिल्लैल ओ स्तिफनसह आक्रमण कर्ल। ५८ हुँक स्तिफनसह घँसेइटी शहरसे बाहार लैजाक पत्थ्रले मारभिर्ल। हुँकहीन मुवैना मनै आपन्-आपन् कोट काहारक शाऊल नाउँक एकठो जवान मनैयह ह्यार देरख्लह।

५९ हुँक पत्थ्रले मर्टरहल् ब्याला स्तिफनस प्रार्थना कर्ल, "हे प्रभु येशू, म्वार आत्मह ली।" ६० तबदोस्र स्तिफनस ठिहुन टेक्क जोरसे प्रार्थना कर्ल, "हे प्रभु, यी पाप हिँकन जिन लाग।" अत्रा कैक ऊ प्राण छोर्ल।

सतावटक कारण विश्वासीहुँक तितरबितर हुइल

मनै स्तिफनसह मारबेर शाऊल फे सहमत रलह। उह दिनठेसे यरूशलेमक मण्डलीक विरोधम भारी सतावट शुरु हुइल्। प्रेरितहुँक बाहेक और सब विश्वासीहुँक यहूदीया ओ सामरीया क्षेत्रम तितरबितर हुइल। २ प्रभुक भक्तजनहुँक स्तिफनसक मुवल शरीरह गर्ल ओ ऊ मुलकम धेर शोक कर्ल। ३ तर शाऊल विश्वासीन नाश कर भिर्ल। ऊ घरघरम जाक



महासभक मनै स्तिफनसह पत्थ्रले
मार्क मुवादेल (७.५६)

येशूकम विश्वास करल् पुरुष ओ स्त्रीहुँकन घँसेइटी जेलम डारदिहँट्।

फिलिपक प्रचार सुन्क सामरियक मनै विश्वास कर्ल

४ तब तितरबितर हुइल् चेलावँ जहौरतहौर जाक खुशिक खबर प्रचार कर्ल। ५ फिलिप सामरिया कना शहरम जाक येशू मनैन मुक्ति देहुइया खीष्ट हुइट कैक प्रचार कर्ल। ६ फिलिपक वचन सुन्क ओ हुँकाहार करल् अचम्मक काम देख्क भीडक सारा मनै हुँकाहार बातम ध्यान देल। ७ धेर मनैन्हकमसे भूत जोरले चिल्लैटी निक्कल। प्यारालाइस रोग+ लागल ओ नाङ्गरलुल हुइल् मनै फे चोखैल। ८ असिक सामरिया शहरक मनै बहुत खुशी हुइल।

+ ८.७ प्यारालाइस रोग: प्यारालाइस रोग लागल मनै आपन शरीरक कौनो भाग या पूरा शरीर चलाइ नैसेकट।

पत्रुस जादू देखैना मनैयह दोषी ठहैल

६उ शहरम सिमोन नाउँक जादू देखैना एकठो मनैया रह, ऊ जादू देखाक सामरियक मनैन दङ्ग पाररख्लाहा। ऊ म्वारअस कुइ फे नैहो कैक कह। १० सर्वसाधरण ओ गन्यमान्य सबजन ओहीह मानँट ओ "महाशक्ति कैजैना परमेश्वरक शक्ति पाइल मनैया हो" कैक कहँट। ११ सबजन ओहीह मानँट काकरकि ऊ धेर समय आघसे जादू देखाक मनैन दङ्ग पर्लरह। १२ तर जब हुँक परमेश्वरक राज्य ओ येशू मुक्ति देहुइया हुइट कना बातक प्रचार करुइया फिलिपक बात सुनल, तब पुरुष मनै ओ स्त्री मनै विश्वास कर्ल ओ बप्तिस्मा लेल। १३ सिमोन फे विश्वास करल ओ बप्तिस्मा लिहल। ऊ फिलिपक संगसंग लगलरह। फिलिपक करल अचम्मक काम ओ चिन्ह देख्क ऊ छक्क पर।

१४ सामरिया क्षेत्रक मनै परमेश्वरक वचनम विश्वास कर्ल कैक यरूशलेमम प्रेरितहुँक सुनल त पत्रुस ओ यूहन्नह हुँकन्हकठे पठैल। १५ हुँक सामरिया जाक प्रभुकम विश्वास करल मनै पवित्र आत्मा पैहीं कैक हुँकन्हक लाग प्रार्थना कैदेल। १६ काजेकलसे पवित्र आत्मा हुँकमध्ये केक्रोम फे नैअइलरलहन। हुँक प्रभु येशूक नाउँम पानीक

बप्तिस्मा केल लेरख्लह। १७ तब पत्रुस ओ यूहन्ना हुँकन्हकम हाँठ ठैक प्रार्थना कैदेल त हुँक पवित्र आत्मा पैल।

१८ प्रेरितहुँक मनैन्हकम हाँठ ढरल ब्याला हुँकन पवित्र आत्मा पाइल देख्क सिमोन जादूगर फे प्रेरितन पैसा देटी कहल, १९ "मनैन्हकम हाँठ ढर्लसे पवित्र आत्मा पैना यी शक्ति महींह फे दी।"

२० पत्रुस जवाफ देल, "ट्वार पैसा ट्वारसंग नाश ह्वाए काकरकी टै त परमेश्वरक वरदान पैसले किन सेक्जिठा कैक विचार कल्यो। २१ यिहिँम ट्वार ना त अधिकार बा ना हिस्सा बा, काकरकी परमेश्वरक नजरम ट्वार मन ठीक नैहो। २२ असिन दुष्ट विचार कर छोर् ओ परमेश्वरसे प्रार्थना कर। सायद परमेश्वर टोहीह क्षमा कैदेह सेक्ठ। २३ टै त डाहाले भरल बाट्या ओ पापक बन्धनम परल बाट्या।"

२४ यी बात सुनक सिमोन बिन्ती करल, "अपनहुँकन्हक कहल यी बात म्वारम जिन आए कैक म्वार लाग प्रभुसे प्रार्थना कैदी।"

२५ हुँक साक्षी देल ओ प्रभुक वचन प्रचार कैक सेकल त पत्रुस ओ यूहन्ना सामरीया क्षेत्रक गाउँ-गाउँम खुशिक खबर प्रचार कर्ती यरूशलेमम घुम्ल।

फिलिप इथियोपिया देशक बडाहाकिमह वचन प्रचार कर्ल

२६ तबदोस प्रभुक एकठो स्वर्गदूत फिलिपह कल, "उठो, ओ यरूशलेमसे दक्षिनओर गाजा जैना उजार ठाउँक डगरीम जाओ।" २७ तब फिलिप उठ्क गैल। उह ब्याला इथियोपिया देशक एकठो बडाहाकिम उह डगर जाइतलह। उ मनैया इथियोपिया देशक महारानी कन्दाकीक बरामनैया ओ सम्पत्तिक हिसावकिताब करुइया रलह। उ नपुंसक+ मनैया परमेश्वरक आराधना कैक यरूशलेमसे घर घुमटलह। २८ ओ आपन रथम बैठ्क यशैया अगमवक्तक लिखल् किताब पढटलह। २९ पवित्र आत्मा फिलिपह कल, "उ रथक पञ्ज-पञ्ज जाओ।"

३० फिलिप दौरटी रथक लगघ पुगल त उ मनैयह यशैया अगमवक्तक लिखल् किताब पढट् सुनल। तबदोस फिलिप हुँकहिन पुछ्ल, "अप्न का पहर्तीबाटी, उ बात बुझ्की?"

३१ उ मनैया जवाफ देल, "कुई ना कुई याकर अर्थ नैलगादिहट्सम मै कसिक बुझ्म्?" तब ऊ फिलिपह रथम चिउह कैक आपनठे बैठक लाग बिन्ती कर्ल।

३२ उ मनैया परमेश्वरक वचनक यी खण्ड पढटलह,

"उहाँ काट लैगिल् भैरीअस रलह,
भुत्ला काटबेर भैरी चामचुम
रहलअस

उहाँक मुहमसे बोली नैफुटलन।

३३ उहाँक बेइज्जत हुइलन,
उहाँ ठीक न्याय नैपैल।

का उहाँक सन्तानन्हक बयान कुई
कर सेकी?

काकरकी मनै उहाँह सिध्यादेल।

३४ ऊ धनसम्पत्तिक हिसावकिताब करुइया फिलिपह पुछ्ल, "कृपया महीह कही, यी बात अगमवक्ता क्याकर बारेम कलक हुइट? आप्पन बारेम कि और केकरो बारेम?" ३५ तब फिलिप परमेश्वरक वचनक उह खण्डसे शुरु कैक येशूक बारेम खुशिक खबर सुनैल।

३६ जैटी-जैटी डगरीम हुँक पानी रहल ठाउँम पुगल त, उ धनसम्पत्तिक हिसावकिताब करुइया कल, "हेरी, अठे पानी बा। आब मै काजे बप्तिस्मा नैलेना?" ३७ [फिलिप कल, "अप्न सारा मनले विश्वास कर्ठी कलसे बप्तिस्मा लिह सेक्ठी।" ऊ जवाफ

+ ८.२७ नपुंसक: नपुंसक कलक सन्तान उत्पादन कर्ना क्षमता नाश करावापाइल मनैया हो।

देल, "येशू ख्रीष्ट परमेश्वरक छावा हुइट कैक मै विश्वास कर्तुँ।" + ३८ तब ऊ रथ ठहूयाए लगैल। फिलिप ओ धनसम्पत्तिक हिसावकिताव करुइया पानी रहल् ठाउँम गैल, तबदोस्र फिलिप हुँकहीन बप्तिस्मा देल। ३९ हुँक पानीमसे निर्रल त प्रभुक आत्मा फिलिपह लैगिलन्। ऊ धनसम्पत्तिक हिसावकिताव करुइया फिलिपह नैदेख्ल, तर खुशी होक गैल। ४० फिलिप अपन्हे अशदोद शहरम पुगल् थाहाँ पैल ओ कैसरिया शहर नैपुगट्सम डग्रीम पर्ना सब शहरम खुशिक खबर प्रचार कर्ती गैल।

शाऊल येशूकम विश्वास कर्ल

६ उ ब्याला शाऊल प्रभु येशूक चलन मुवैना धम्की देहटलह। प्रधान पुजेहोकठे जाक २ मुक्ति पाइक लाग येशूकम विश्वास करल मनैन, पुरुष या स्त्री, जेहीह फ्याला परैलसे फे पकर्क यरूशलेमम लैजाइ पाउँ कैक दमस्कसक सभाधरम बुभाइक लाग अधिकारक पुर्जी मड्ल। ३ शाऊल दमस्कस शहर जाइटलह। जैटी जैटी दमस्कसक लगघ पुगल त अचानक आकाशमसे ज्योति हुँकाहार आञ्जरपाञ्जर चम्कलन। ४ शाऊल

नेङ्गटी-नेङ्गटी गिरगैल ओ असिन आवाज सुन्ल, "शाऊल, शाऊल, काजे टुँ महीह सँताइटो?"

५ शाऊल कल, "प्रभु, अप्न के हुइटी?"

उहाँ कल, "मै येशू हुइटुँ, जेहीह टुँ सँताइटो। ६ आब उठ्क शहरम जाओ त टुँहार कर पर्ना काम मै उहँ कहम्।"

७ शाऊलकसँग गैल् मनै जाटसे बक्क परगैल ओ एक पैला फे आघ बह नैसेक्ल। हुँक आवाजभर सुन्ल तर किहुह फे नैदेख्ल। ८ शाऊल भुइँयमसे उठ्क आँख खोल्ल तर कुछु फे नैदेख्ल। उहओसे हुँकाहार संघरेन हुँकहिन हाँठ पकर्क डोज्यैटी दमस्कसम लैगिलन्। ९ शाऊल तीन दिनसम कुछु फे नैदेख्ल, ऊ ना त कुछु खैल, ना कुछु पिल।

१० उ ब्याला दमस्कसम हननिया नाउँक एकठो विश्वासी रलह। ऊ



पावल विश्वासीन सताइकलाग आघ बहल् ब्याला भुइँयम गिरगैल (६.४)

+ ८.३७ ग्रीक भाषक कौनो-कौनो स्रोतम यी पद बा। तर सबसे धेर भरपर्ना स्रोतम यी पद नैरलकओसें यिहाँ कोष्ठम लिख्लै बा।

दर्शनम प्रभु येशू देखपर्ल। प्रभु येशू कल, "रै हननिया!"

ऊ जवाफ देल, "हजुर, प्रभु।"

११ प्रभु कल, "'स्वाभ' कना गल्लीम रहल् यहूदक घरम जाओ ओ टार्सस शहरसे आइल शाऊल नाउँक मनैयह खोजो। काकरकि ऊ आब प्रार्थना करट। १२ ऊ हननिया नाउँक मनैया कपारीम हाँठ ढैक प्रार्थना कैदेलकओसे अप्न देख्नाहा हुइलक दर्शनम देखरख्ल।"

१३ हननिया जवाफ देल, "प्रभु, यी मनैया यरूशलेमम रहल् अप्नकम विश्वास करुइयन बहुत सतैलक बात मै धेर मनैनसे सुनरख्नु। १४ ऊ मुख्य पुजेहोसे अप्नक पाछ लगुइयन् पकर्ना अधिकार लेक यिहाँ आरल।"

१५ प्रभु कल, "जाओ, काकरकि अयहूदीन, राजाहुँकन ओ इस्राएली-हुँकन म्वार बारेम प्रचार करक लाग मै हुँकहिन रोजरख्नु। १६ म्वार सेवा कर्लक कारणले सहपर्ना दुख हुँकहीन मै देखैम।"

१७ तब हननिया यहूदक घर गैल ओ भित्तर पैट्क शाऊलक कपारीम हाँठ ढैक कल, "शाऊल भाइ, टु यिहाँ आइबेर डग्रिम टुँहारठे देखपरल प्रभु येशू महीह पठैलह। टुँ देख्नाहा हुइसेको ओ पवित्र आत्मक शक्तिले

भरपूर हुइसेको कैक महीह पठैलह।" १८ तबहँ शाऊलक आँखीमसे पोप्री असक चिज खस्लन् ओ देख्नाहा हुइल। ऊ उठ्ल ओ बप्तिस्मा लेल। १९ ऊ खाना खैल त हुँकाहारम ताकत अइलन्।

शाऊल साहससे प्रचार कर्ल, ओ
बारनाबास हुँकहीन
विश्वासीनसे परिचय करादेल

शाऊल टनिक दिनसम विश्वासीन्हकसँग दमस्कसम बैठ्ल। २० तबहँसे शाऊल येशू ख्रीष्ट परमेश्वरक छावा हुइट कैक सभाघरम प्रचार कर भिरगैल। २१ हुँकाहार बात सुनुइयन सब जन छक्क पर्क कह लगल, "यरूशलेमम येशूक नाउँ लिहुइयन् सबजहन् सिध्याइ खोज्ना मनैया यिह नैहुइट का? यिहाँ फे येशूक चेलन पकर्क मुख्य पुजेहोन्हकठे लैजाइक लाग त आइल हुइहीं।" २२ तर शाऊलक प्रचार भन-भन शक्तिशाली हुइटी गैलन्। येशू जो ख्रीष्ट हुइट कैक ऊ असिन पक्का प्रमाण देल, कि दमस्कसक यहूदीहुँक कुइ फे जवाफ दिह नैसेकल। २३ धेर दिन बितल् त, यहूदीहुँक शाऊलह मुवैना योजना बनेल। २४ तर हुँकन्हक योजना शाऊल थाहाँ

पाडर्ल। यहूदीहुँक हुँकहीन मुवाइक लाग रातदिन दमस्कस शहरक गेटम लग्लरहँट्। २५ एक दिन रात हुइल् ब्याला चेलावँ शाऊलह गैँजम ढर्ल ओ शहरक पर्खालक भ्यालीमसे बाहार उटारक भगादेल।

२६ शाऊल यरूशलेमम घुम्क अइल त, येशूक चलनसे भ्याँट खोज्ल। तर चेलावँ हुँकहीनसे डरैल, काकरकि शाऊल फे येशूकम विश्वास कैरख्ल कना बात हुँक विश्वास कर नैसेक्ल। २७ तर बारनाबास नाउँक चेला शाऊलह प्रेरितन्हकठे लैगैल। शाऊल डग्रिम प्रभुह देख्लक, प्रभु हुँकहीनसे बात बटोइलक ओ दमस्कसम एकनैडराक येशूक बारेम प्रचार कर्लक, सब बात बारनाबास हुँकन्हकठे बट्वादेल। २८ शाऊल यरूशलेमम हुँकन्हकसँग खुल्लमखुल्ला न्याङ्ग लग्ल ओ एकनैडराक प्रभुक बारेम प्रचार कर



पावलह गैँजम ढैक पर्खालक भ्यालिमसे भगादेल (६.२५)

लग्ल। २६ ऊ ग्रीक भाषा बोल्ना यहूदीनसे फे वाद-विवाद कर्ल, तर हुँक शाऊलह मुवाइ खोज्ल। ३० हुँकहीन मुवाइकलाग बाट कना बात थाहाँ पैल त विश्वासी डाडुभैयन् शाऊलह कैसरिया शहरम लैगैल ओ उहाँसे टार्सस शहरम पठादेल।

३१ तबदोस यहूदीया, गालील ओ सामरिया क्षेत्रम रहल् सब मण्डलीम सटावत नैरहक शान्ति छइँलन् ओ विश्वाशीहुँक परमेश्वरक आदर कर्लकओसे बलगर हुइलन्। ओ पवित्र आत्मसे उत्साहित लाग्क लौव विश्वासीहुँक बहर्ती गैल।

पत्रुस एनियासह चोखैल ओ तबीतह मुवलमसे जीयैल

३२ पत्रुसजुन ठाउँ-ठाउँम नेड्टी लुड्डा शहरम रहल् प्रभुक विश्वासीन्हकठे भ्याँट कर आपुग्ल। ३३ पत्रुस उहाँ एनियास कना एकठो मनैयह भेटैल। हुँकहीन प्यारालाइस रोग लागलओसे बिस्तारक-बिस्तारम रहल् आठ वर्ष होरलहन्। ३४ पत्रुस हुँकहीन कल, "एनियास, येशू खीष्ट टुँहीन आबहँ चोखैहीं। उठो ओ आपन बिस्तारा उठाओ।" एनियास तबहँ उठ्गैल। ३५ हुँकहीन चोखाइल् देख्क लुड्डा ओ शारोनम बैठुइया धेर मनै प्रभु येशूकम विश्वास कर्ल।

३६ योप्पा शहरम प्रभुकम विश्वास कर्ना तबीता नाउँक एकठो दिदी रलही। ग्रीक भाषम हुँकहीन डोरकास कहन्। याकर अर्थ हर्निन्या हो। ऊ असल काम ओ गरीबन सहायता कर्ना कामम लगरहँट्। ३७ ऊ बेराम पर्क मुगैली। मनै हुँकाहार मुवल शरीरह धो-धा पार्क उप्रक ताल्हक एकठो क्वाठम ढर्ल। ३८ लुड्डा शहर योप्पा शहरक लगघहँ रह। पत्रुस लुड्डम बाट कना बात चेलावँ थाहाँ पैल त हुँक दुईजहन पत्रुसकठे असिक कैक पठैल, "हमारठे भट्ट आदी।"

३९ तब पत्रुस हुँकन्हकसँग गैल। पत्रुस योप्पम पुगल त, मनै हुँकहीन उप्रक ताल्हम, तबितक मुवल शरीर रहल क्वाठम, लैगैल। विधवहुँक तबीता हुँकन्हकसँग पलरहल ब्याला हुँकाहार लुगा देखैने ओ रुइने कर्टी पत्रुसक चारिओर ठहेइल।

४० पत्रुस सबजहन क्वाठमसे बाहार निक्रैल ओ ठिहुन टेक्क प्रार्थना कैदेल। तबदोस पत्रुस तबितक मुवल शरीरओर घुम्क कल, "तबीता, उठो!" ऊ आँख उघर्ली त पत्रुसह देखली ओ उठ्क बैठली। ४१ पत्रुस हुँकाहार हाँठ पकक हुँकहीन उठैल। तब पत्रुस सब विश्वासीन ओ विधवन बलैल ओ मुक जीएल तबीतह हुँकन्हक जिम्मा लगादेल। ४२ यी बात सारा योप्पा शहरम फैलल् ओ धेर मनै प्रभुकम

विश्वास कर्ल। ४३ तबदोस छालक काम करुइया सिमोनकसँग पत्रुस धेर दिनसम योप्पम बैठल्।

स्वर्गदूत कर्नेलियसह "पत्रुस कना सिमोनह बलाए मनैन पठाओ" कल

१० कैसरिया शहरम कर्नेलियस नाउँक एकठो मनैया रलह। ऊ इटालीया कना पल्टनक रोमी कप्तान रलह। २ ऊ परमेश्वरक भक्त रलह। हुँकाहार सलघरक मनै परमेश्वरक आदर करँट्। ऊ अपुग रहल मनैन उदार चित्तले दान दिहँट् ओ परमेश्वरसे प्रार्थना कर्तिरहँट्। ३ एक दिनक बात हो, कर्नेलियस दिनक तीन बजेओर दर्शनम परमेश्वरक पठाइल एकठो स्वर्गदूतह आपनओर आइट् स्पष्टसे देख्ल। स्वर्गदूत कल, "कर्नेलियस!"

४ कर्नेलियस डरकमार स्वर्गदूतह हेटीकहेटी रहगैल ओ कल, "कही, प्रभु!"

स्वर्गदूत कल, "टुँहार प्रार्थना ओ टुँ गरीबन दिहल् दान परमेश्वर बलिदानक रुपम स्वीकार कैरख्ल। ५ आब टुँ योप्पा शहरम रहल् पत्रुस कना सिमोनह बलाए मनैन पठाओ। ६ पत्रुस समुद्रक किनारम घर रहल् छालक काम करुइया सिमोनकसँग बैठल् बाट।"

७ स्वर्गदूत बिदा होक गैल त कर्नेलियस आपन सेवा-चाक्रिम लगलरना मनैमध्येम दुईजन कमारन ओ एकठो भक्त सिपैहेह बलैल।
८ आपन् द्याखल सब बात बट्वाक कर्नेलियस हुँकन् योप्पा शहरम पठैल।

पत्रुस ध्यान-मग्न हुइल् ब्याला एकठो दर्शन देख्ल

९ द्वासर दिन हुँक्रे योप्पा शहरक लग्घ पुगल त दिनक बाह बजेओर पत्रुस घरक छतम प्रार्थना कर गैल।
१० प्रार्थना कर्तिकर्ती हुँकहीन भुँख लगलन्। खाना तयार हुइटी रहबेर पत्रुस ध्यान-मग्न हुइल ओ दर्शन देख्ल।
११ स्वर्ग उग्रल ओ चज्यौ खुट्लम बाहान्गौल् एकठो बरानक तन्नाअसक चिज धर्तीम भराराजाइटह।
१२ उ तन्नम सब जातिक चरग्वज्या जनावर, घस्रना प्राणी ओ आकाशम



पत्रुस बरानक तन्नाअस चिजम धेर किसिमक जनावर भराराजाइट देख्ल (१०.१३)

उर्ना चिरैँचुरुङ्गन रलह।
१३ तब पत्रुस असिन आवाज सुन्ल, "पत्रुस, उठो ओ मार्क खाओ।"

१४ तर पत्रुस कल, "नाहीं प्रभु, मै अशुद्ध या अपवित्र चिज कब्बु फे नैखैलहुँ।"

१५ पत्रुस द्वासर फ्यारा आवाज सुन्ल, "परमेश्वरक शुद्ध पारल् चिजह टुँ अशुद्ध जिन कहो।"

१६ तीनचोसम अस्तै हुइल्। तबदोस उ तन्ना स्वर्गम उठागैल्।

१७ आपन् द्याखल् दर्शनक अर्थ नैबुभक पत्रुस कवाइल् रलह, उह ब्याला कर्नेलियसक पठाइल् मनै सोधपुछ कर्ती सिमोनक घरक गेटे पुगक ठहेइल।
१८ हुँक्रे पुछ्ल, "पत्रुस कना सिमोन यिहँ रठ की?"

१९ पत्रुसजुन आपन द्याखल् दर्शनक बारेम विचार कर्टरलह। तब पवित्र आत्मा हुँकहिन् कलन्, "हेरो, तीन जन मनै टुहीं ख्वाजट।
२० उठो टर जाओ ओ बिना हिचिकचैल हुँकन्हकसँग लागो, काकरकि हुँकन मै पठैनहुँ।"

२१ पत्रुस टर अइल ओ हुँकन्हकटे जाक कल, "अपन्हुँकन्हक ख्वाजल् मनैया मैहँ हुइटुँ। का कामले यिहाँ अइली?"

२२ हुँक्रे कल, "कप्तान कर्नेलियस हमन पठैलह। उहाँ असल ओ परमेश्वरक आदर कर्ना मनैया हुइट।

सब यहूदीहुँक्रे फे उहाँ आदर कठ।
अपन्ह उहाँक घरम बलाक अपन्हसे
उपदेश सुनहो कैक पवित्र स्वर्गदूतसे
आदेश पारखल।" २३ पत्रुस हुँकन घरम
बलाक मानमर्जाट् कर्ल। उ रात हुँक्रे
उहँ बैठल।

**पत्रुस कर्नेलियसह ओ हुँकाहार घरम
रहल मनैन येशूक बारेम बटोइल**

द्वासर दिन पत्रुस ओ योप्पम
रहल विश्वासीहुँक्रे फे हुँकन्हकसंग
गैल। २४ तीसर दिन हुँक्रे सिजरिया
पुगल। कर्नेलियसजुन आपन संघरेन
ओ नातपातन बलाक हुँकन्हकसंग
पत्रुसहुँकन्हक बट्या ह्यारटलह।
२५ पत्रुस घरम पैठ्ठीकी कर्नेलियस
हुँकाहार ग्वारम ढ्वाक लगल। २६ तर
पत्रुस हुँकहीन उठैटी कल, "उठी,
मै फे त एकठो साधरण मनैया केल
हुइटुँ।"

२७ पत्रुस कर्नेलियससे बात बटोइटी
भित्तर गैल त उहाँ धेर मनै जम्मा
हुइल् देखल। २८ पत्रुस हुँकन कल, "हम्र
यहूदीहुँक्रे और जातिक मनैनसे संगत
कर हमार धर्म नैदिहट् कना बात अप्न
सबजहन थाहँ बा। तर किहुह फे अशुद्ध
या अपवित्र मान नैपरट् कैक परमेश्वर
महीह देखारखल। २९ उहमार अप्न
महीह बलापठैटीकी बिना हिचिकचैल

मै आगैनु। आब कही, महीह काजे
बलैलही?"

३० कर्नेलियस कल, "चार दिन
आघक बात हो। मै तीन बजेओर घरम
प्रार्थना करटनहुँ। अक्चोट्टे चहकार
उज्जर भुल्वा घालल् मनैया म्वार
आघ ठह्याक कल, ३१ 'कर्नेलियस,
परमेश्वर टुँहार प्रार्थना सुनरखल ओ
गरीबन टुँहार दिहेल दान सम्भलबाट।
३२ आब योप्पा शहरम आइल् पत्रुस
कना सिमोनह बलापठाओ। ऊ समुद्रक
लगघ घर रहल् छालक काम करुइया
सिमोनक घर बैठल् बाट।' ३३ उहओसे
मै तुरुन्त अपन्ह बलाए पठैनु। अप्न
आदेली मज हुइल्। परमेश्वर अपन्ह
आज्ञा कर्लक बात सुनक लाग हम्र
सबजन प्रभुक सामुन्ने जम्मा होरली।"

३४ तब पत्रुस ब्वाल भिर्ल,
"परमेश्वर सब मनैन बराबर व्यवहार
कठ कना बात मै एकदम स्पष्ट
रुपले बुभटीबाटुँ। ३५ परमेश्वरह
आदर कर्टी ठीक काम कर्ना जौन
जातिक मनै हुइलसे फे उहाँ स्वीकार
कठ। ३६ इस्राएलीन्हकठे परमेश्वरक
पठाइल खुशिक खबरक सन्देश
यिह हो, कि येशू ख्रीष्टक करल
कामले परमेश्वर ओ मनैन्हक
बीचम मेलमिलाप होरहल। येशू जो
सबजन्हक प्रभु हुइट। ३७ यूहन्ना

बप्तिस्मा लेहपर्ना बात प्रचार करल समयटेसे यिहँ गालील क्षेत्रसे शुरु होक सारा यहूदीया क्षेत्रम घटल् घटनक बारेम अप्नहुँक जन्लबाटी। ३८ परमेश्वर नासरतक येशूह पवित्र आत्मा ओ शक्तिले नियुक्ति कर्ल। परमेश्वर उहाँकसँग रलकओसे उहाँ असल काम कर्ती ओ भूत लागल मनैन चोखैटी सक्कुओर गैल।

३९ यहूदीया क्षेत्र ओ यरूशलेम शहरम उहाँक करल् सब कामक साक्षी हम्र बाटी। यहूदीहुँक उहाँह क्रूसम टङ्गाक मुवैलह। ४० तर तीसर दिनम परमेश्वर उहाँह मुवलमसे जीयाक खुल्लमखुल्ला रुपले मनैन्हक आघ प्रकट कैदेल। ४१ सबजहन त नाहीँ, तर परमेश्वर हमन साक्षीक रुपम रोज्ल, ओ उहाँ मुवलमसे फेदोस जील त, हम्र उहाँकसँग खानपिन कर्ली। ४२ येशू हमन आज्ञा देरख्ल कि परमेश्वर येशूह जीटीरहल् ओ मुवल् मनैन्हक न्याय करक लाग नियुक्त कैरख्ल कना खुशीक खबर प्रचार करो ओ साक्षी देओ। ४३ अगमवक्ताहुँक फे उहाँक बारेम साक्षी देरख्ल। उहाँकम विश्वास करुइया सबजन उहाँक नाउक शक्तिले पापक क्षमा पैहीं कैक हुँक पैलहँ जनादेरख्ल।"

४४ पत्रुस ब्वालबेर वचन सुनुइया सबजन्हकम पवित्र आत्मा अइलन्। ४५ परमेश्वर पवित्र आत्मक वरदान अयहूदीन फे देलक देख्क पत्रुसकसँग अइलक् विश्वासी यहूदीहुँक छक्क पर्ल। ४६ काकरकी हुँक नैजानल भाषा ब्वालटलह ओ परमेश्वरक प्रशंसा करटलह।

पत्रुस कल, ४७ "आब हिँकन पानीक बप्तिस्मा लेनासे के ज्वाक सेकी? काकरकि हिँक फे हम्र पाइल्अस पवित्र आत्मा पारख्ल।" ४८ उहमार पत्रुस हुँकन येशू ख्रीष्टक नाउँम बप्तिस्मा लेना आज्ञा देल। तबदोस हुँक पत्रुसह टनिक दिनसम हुँकन्हक्केसँग रहक लाग बिन्ती कर्ल।

पत्रुस अयहूदीहुँक कसिक विश्वासी हुइल कना बातक प्रष्टीकरण देल

११ अयहूदीहुँक फे परमेश्वरक वचनम विश्वास करल् बात प्रेरितहुँक ओ सारा यहूदीया क्षेत्रम रहल् विश्वासीहुँक सुन्ल। २ तर जब पत्रुस यरूशलेमम पुगल, तब यहूदी विश्वासीहुँक+ हुँकहीन दोष लगैल,

+११.२ यहूदी विश्वासीहुँक: ग्रीक भाषक स्रोतमसे शाब्दिक अनुवाद कर्लसे यी ठाउँम "खतना करल मनै" हइठ। तर याकर मतलब कि त (क) हुँक ख्रीष्टीयन हइल यहूदीहुँक हइट, कि त (ख) हुँक यहूदी ख्रीष्टीयनमध्येक कछु मनै हइट जे एकदम कट्टर हिसाबले व्यवस्था ओ यहूदी रीतिभाँती भन्ठ। यी समयम यहूदी ख्रीष्टीयनहुँक यहूदी धर्मक रीतिभाँती कट्टर हिसाबले मानैट। यहूदी रीतिभाँती अनुसार एकठो यहूदी मनैया अयहूदीहुँकनसे सँग खानो नैखाईट। अयहूदी मनैयह यहूदी हुइक लाग खतना करपरन। थप जानकारीक लाग "खतना" शब्दक अर्थ हेरी।

३"अपन अयहूदीन्हक+ घरम जाक हुँकन्हकसँग काजे खानपिन कर्ली?"

४ तबदोस पत्रुस सब घटना जस्तक तस्त हुँकन सुनाइ लगल - ५"मै योप्पा शहरम प्रार्थना कर्टीरनहुँ। मै ध्यान-मग्न हुइल् ब्याला परमेश्वरसे एकठो दर्शन देख्नु। मै एकठो बरानक तन्नाअसक चिज चय्यौ खुट्लम पकर्क स्वर्गमसे भरजाइट् देख्नु। उ चिज म्वारठे आइल्। ६ जब मै निहार्क हेर्नु, तब उ तन्नम सब जातिक जनावर देख्नु। उहींम घरपालुवा जनावर, जंगली जनावर, घसना जनावर, ओ चिरैचुरुङ्गन रलह। ७ तबदोस मै असिन आवाज सुन्नु, "पत्रुस, उठो, ओ मार्क खाओ।"

८ मै कनु, "नाही प्रभु, मै अशुद्ध या अपवित्र मानजैना चिज कब्बु नैखैलहुँ।"

९ तर स्वर्गसे फेदोस आवाज आइल्, "परमेश्वरक शुद्ध पारल् चिजह टुँ अशुद्ध जिन मानो।" १० तीनचो अस्तह हुइल्। तबदोस सब चिज तन्नासैट् स्वर्गम उठागैल्।

११ उहब्याला कैसरियासे महीह बलाए पठागैल् तीनठो मनै मै रहल् घरम आपुगल। १२ नैहिचिकिचाक हुँकन्हकसँग जाओ कैक पवित्र

आत्मा महीह कल। हिँक छ जन यहूदी विश्वासीहुँक फे म्वारसँग रलह, ओ हम्न एकठो मनैयक घर गैली। १३ उ मनैया आपन घरम एकठो स्वर्गदूत देखपर्लक बात हमन सुनैल। स्वर्गदूत हुँकहीन कल, "योप्पा शहरम रहल् पत्रुस कैजिना सिमोनह बलाए मनैन पठाओ। १४ पत्रुस आक टुँ ओ टुँहार सलघरक मनै कसिक मुक्ति पैना कैक वचन टुँहिन सुनैहीं।"

१५ जब मै ब्वाल लग्नु, तब शुरुम हमारम आइल्अस हुँकन्हकम फे पवित्र आत्मा अइलन्। १६ तबदोस मै प्रभुक कहल् वचन सम्भनु, 'यूहन्ना पानीक बप्तिस्मा देल तर टुह पवित्र आत्मक बप्तिस्माः पैबो।' १७ हम्न प्रभु येशू ख्रीष्टकम विश्वास कर्ली ओ जौन वरदान पैली, परमेश्वर उह वरदान अयहूदीहुँकन देल। परमेश्वर अपन्हे हुँकन वरदान देडठ कलसे, उहाँह रोकुइया मै के हुइटुँ?"

१८ यी बात सुन्क यहूदी विश्वासीहुँक पत्रुसह दोष लगाइ छोरल, ओ "परमेश्वर अयहूदीन फे आपन आपन पापी मन घुमाक परमेश्वरकठे अइना ओ अनन्त जीवन पैना निगाहा देरख्ल" कैक परमेश्वरक प्रशंसा कर्ल।

+ ११.३ ११:२ म रहल फुटनोट हेरी।

† ११.१६ पवित्र आत्मक बप्तिस्मा: प्रेरित १:५ म रहल फुटनोट हेरी।

एन्टिओखियक विश्वासीहुँक्र
बारनाबास ओ शाऊलसे
वचन सिखल

१६ स्तिफनसक हत्या हुइलन त, विश्वासीहुँक्र सतावट हुइलक कारण यरूशलेमसे तितरबितर हुइल। कुई-कुई फोनिके क्षेत्रम, कुई-कुई साइप्रस टापूम, ओ कुई-कुई सिरिया क्षेत्रक एन्टिओखिया शहरसम पुगल, ओ हुँक्र शुरुम यहूदीन केल वचन प्रचार कर्ल। २० तर पाछ साइप्रस टापू ओ कुरेनी शहरसे एन्टिओखियम आइल् चेलावँ अयहूदीन फे खुशिक खबर प्रचार कर लगल। २१ हुँकन्हकठे प्रभुक शक्ति रलहन, ओ धेर संख्यम अयहूदीहुँक्र हुँकन्हक वचन पत्यैल ओ प्रभुकम विश्वास कर्ल।

२२ यी खबर यरूशलेमक मण्डलीम पुगल त, मण्डलीक अगुवाहुँक्र बारनाबासह एन्टिओखियम पठैल। २३ जब ऊ एन्टिओखियम पुगल, तब परमेश्वर हुँकन कृपा करल् देख्क ऊ खुशी हुइल ओ हुँकन सारा हृदयले प्रभुकम भरोसा कर्लरहहो कैक उत्साह देल। २४ बारनाबास असल, पवित्र आत्मक शक्तिले भरल, ओ विश्वासम बलगर व्यक्ति रलह।

हुँकाहार कारण धेर मनै प्रभुकम विश्वास कर्ल।

२५ तबदोस बारनाबास शाऊलह ख्वाज टार्सस शहरम गैल। २६ शाऊलह भेटैल त, ऊ हुँकहीन एन्टिओखियम अन्ल। हुँक्र दुनु जन प्रभुकम विश्वास करुइयन्हकसंग वर्ष दिनसम संगती कर्ती धेरजहन सिखैल। येसूक चेलावँ एन्टिओखियम सबसे पैल्ह ख्रीष्टियन कैगिलह।

२७ उह समयम कुछ अगमवक्ताओं यरूशलेमसे एन्टिओखियम अइल। २८ हुँक्रमध्येम अगाबस नाउँ रहल् एकठो अगमवक्ता रलह। ऊ मण्डलीम उठ्ल ओ सारा संसारम+ भारी अनिकाल परी कैक पवित्र आत्माद्वारा अगमवाणी बोल्ल। (पाछ रोमी शासक क्लौडियसक शासनकालम उ अगमवाणी पूरा हुइल्।) २९ हुँकाहार अगमवाणी सुन्क एन्टिओखियक विश्वासीहुँक्र आपन् आपन् औकात अनुसार यहूदीया क्षेत्रम रना विश्वासीन्हक लाग भेटी उठैना विचार कर्ल। ३० हुँक्र असिक उठाइल् पैसा बारनाबास ओ शाऊलक हाँठ यरूशलेमक मण्डलीक अगुवन्हक लाग पठादेल।

+ ११.२८ सारा संसारम: बाइबलक धेर अनुवादम यी ठाउँम "सारा संसारम" लिखल बा। धेर जसिन बाइबल विद्वानहुँक्र यहीह रोमी साम्राज्य हो कैक विचार कर्ठ, ओ ओर जनजुन यहीह इस्राएल देश हो कैक विचार कर्ठ। क्लौडियसक शासनकालम रोमी साम्राज्यम कयोचो अनिकाल पलाहा। जे होस्, एन्टिओखियक विश्वासीहुँक्र यहूदीयम रना विश्वासीन्हक लाग भेटी उठाइल बातले का देखैठा कलसे, एन्टिओखियम (यी फे रोमी साम्राज्यक एक भाग रहै) अनिकाल नैपरल। उहओसे अगाबसक अगमवाणी इस्राएल देशम लक्षित रह जसिन देखपठौ।

परमप्रभुक पठाइल स्वर्गदूत
पत्रुसह जेलमसे छुटकारा देल

१२

उ समयम राजा हेरोद अग्रीपा मण्डलीक कुछ सदस्यन पकर्क अत्याचार कर भिला। २ ऊ यूहन्नक डाडु याकूबह तरवारले मुवाइ पठैल। ३ जब ऊ यी कामले यहूदीहुँकन खुशी हुइल् देख्ल, तब ऊ पत्रुसह फे पक्र पठैल। (उ ब्याला खमीर नैडारल रोटी खैना टिहारक समय रह।) ४ तबदोस ऊ पत्रुसह जेलम डार्क सोह जन सिपाहीन चार-चारजन्हक समूह बनाक पत्रुसक गार्ड बैस लगैल। मुक्ति-दिवस+ टिहार ओरैलसे पत्रुसह सार्वजनिक कर्ना हेरोदक विचार रलहन्।

५ पत्रुस भयालखानम रहल्म मण्डलीक मनै हुँकाहार लाग परमेश्वरसे जोडुदारसे प्रार्थना कर्तीरलह।

६ हेरोद हुँकहीन सार्वजनिक करैना दिनिक आघक रात पत्रुस दुइठो सिक्कीले बान्हगैल् ओ दुइ जन सिपाहीन्हक बीचम सुतल रलह। ओ और सीपाहीहुँक फे ड्वारीम लगलरलह। ७ तब एकचोट्टे प्रभुक एकठो स्वर्गदूत देखपर्ल ओ भयालखानम ज्योति चम्कल्।



स्वर्गदूत पत्रुसह जेलमसे
छुटैलन् (१२.७)

स्वर्गदूत पत्रुसह हिलैटी "हाली उठो" कैक उठैल। तब हुँकाहार हाँठम बान्हल सीक्की फुसुकगैलन्।

८ स्वर्गदूत कल, "लुगा लगाओ ओ चप्पल घालो।" पत्रुस ओसहँक कर्ल। स्वर्गदूत कल, "पिछौरी ओहर्क म्वार पाछपाछ आओ।" ९ पत्रुस स्वर्गदूतक पाछपाछ भयालखानमसे बाहार अइल। तर स्वर्गदूतक करल यी काम हुँकहीन पक्का हो जसिन नैलग्लरलहन्। हुँकहीन त दर्शन द्याखअस केल लागटलहन्। १० पत्रुस ओ स्वर्गदूत पैल्ह ओ द्वासर गार्ड टोलीन नाहाडुक शहरम जैना लुहाकिक गेटठे अइल। उ गेट अपन्हे खुलल् ओ हुँक बाहार गैल। हुँक एकठो गल्लीम संगसंग नेड्टी-नेड्टी स्वर्गदूत पत्रुसह छोरक चलगैल।

+ १२.४ मुक्ति-दिवस: मुक्ति-दिवस कुलक यहूदीहुँक मिश्रदेशक बन्धनमसे छुटकारा पाइल सम्भनम मनैना टिहार रह, जोन समयम हुँक खमीर नैडारल रोटी खाइत्। थप जौनकारीक लाग "खमीर नैडारल रोटी खैना टिहार" ओ "मुक्ति-दिवस टिहार" शब्दक अर्थ हेरी।

११ जब पत्रुसक होश खुल्लन, तब ऊ कल, "आब मै जाट्टीसे थाहाँ पैनु, कि परमप्रभु आपन स्वर्गदूत पठाक हेरोद राजा, ओ यहूदी अगुवाहुँकर कर चाहल सब हानीमसे महीह छुटकारा देल।"

१२ यी बात थाहाँ पैल त, ऊ मरियमक घरम गैल। मरियम मर्कूस नाउँले बलाजैना यूहन्नक डाई रलही। उहाँ धेर जन जम्मा होक प्रार्थना करटलह। १३ पत्रुस गेट ढकढक्यैल त, रोदा नाउँ रहल एकठो कमारी गेट उभक आइल। १४ जब ऊ पत्रुसक बोली चिन्हल, तब ऊ खुशी होक गेट बिना उभकल दौरटी भित्तर गैल् ओ कहल, "पत्रुस गेटम बाट।"

१५ तर हुँकर ओहीह कल, "टैं बौराइट्या, कि का री?" तर ऊ आपन कहल बात जाट्टीसे हो कैक कटीरहल। तब हुँकर कल, "पत्रुसह हेरविचार कर्ना स्वर्गदूत हुहीं।"

१६ पत्रुसजुन गेट ढकढक्यैटी रल। पाछ हुँकर गेट उभकल त, हुँकहीन देख्क हुँकर छक्क पर्ल। १७ पत्रुस हुँकन हाँठक इशाराले चूप लगैल, ओ प्रभु हुँकहीन जेलमसे कसिक छुटकारा देल कना बात हुँकन कल। ऊ "यी बात याकूब ओ और विश्वासीन फे जनादेहो" कैक कल। तबदोस ऊ और ठाउँम चलगैल।

१८ बिहान हुइल् त, पत्रुसह का हुइलन कैक सिपाहीन्हक बीचम भारी



पत्रुस जेलमसे आक गेट
ढकढक्यैल (१२.१५)

हलचल हुइलन। १६ हेरोद अग्रीपा हुँकहीन खोज्ना आदेश देल, तर हुँकर कहाँ फे नैभेटैल। हेरोद सिपाहीन सोधपुछ कर्ल ओ हुँकन मृत्युदण्ड देल।

तबदोस हेरोद यहूदियासे कैसरिया गैल ओ उहाँ रल।

परमप्रभुक पठाइल स्वर्गदूत हेरोदह मुवैल

२० उ समयम हेरोद राजा टुरोस ओ सीदोन शहरक मनैनसे धेर रिसारलह। उहओसे उ दुइ शहरक नेताहुँकर मिल्ल ओ बलस्तस कना हेरोदक निजी कर्मचारीह मनाक हेरोदसे मेलमिलापक बिन्ती कर्ल, काकरकि उ दुइ शहरक मनै हेरोदक देशसे अनाजपानी भिकाइँट्।

२१ नेताहुँकनसे भेटघाट कर्ना कैक त्वाकल दिन हेरोद आपन विशेष लुगा लगाक राजगद्दीम बैस्ल, ओ हुँकन्हक आघ भाषण कर्ल। २२ मनै कर्रसे हुँकाहार प्रशंसा करलग्ल, "यी मनैन्हक बोली नैहो, तर दिउँतक हो!" २३ तबहँ परमप्रभुक पठाइल एकठो स्वर्गदूत हुँकहीन कर्रा बेराम बनादेल, कारकिक ऊ परमेश्वरह आदर नैदेल। पाछ ऊ स्याउँ-स्याउँ कीरा पर्क मुल।

२४ तर परमेश्वरक वचन फैलटीगैल ओ विश्वासीन्हक सडख्या धेर बहर्टीगैल।

२५ जब बारनाबास ओ शाऊल यरूशलेमम आर्थिक सहायता पुगाक सेक्ल, तब हुक्र मर्कूस कैजिना यूहन्नह लेक एन्टिओखिया शहरम गैल।

पवित्र आत्मा ओ विश्वासीहुँक बारनाबास ओ शाऊलह वचन प्रचार कर पठैल

१३

एन्टिओखियम रहल मण्डलीम अगमवक्ताहुँक ओ परमेश्वरक वचन सिखुइयन रलह। हुँक बारनाबास, निगर+ कैजिना शिमियोन, कुरेनी शहरक लुकियस, शासक हेरोदकसँग हुर्कलक मनेन ओ शाऊल रलह। २ एक दिन हुँक ब्रत रहक परमप्रभुक

आराधना कर्टीरहल समयम पवित्र आत्मा हुँकन कलन, "मै बारनाबास ओ शाऊलह जौन कामक लाग बलारख्नु, उह कामक लाग हुँकन नियुक्त करो।" ३ तब हुँक आकुर ब्रत रल ओ प्रार्थना कर्ल। तब हुँकन्हकम हाँठ डैक हुँकन परमप्रभुक बलाइल काम करक लाग पठैल।

पावल एकठो जादूगरह दोषी ठहैल, ओ एकठो शासकजुन येशूकम विश्वास कर्ल

४ पवित्र आत्माद्वारा पठागैल त, बारनाबास ओ शाऊल सिलुकिया शहरम गैल, ओ उहाँसे जहाजम चिहुर्क साइप्रस टापूम गैल। ५ हुँक उ टापूक सलामिस शहरम पुग्ल त, यहूदीन्हक सभाघरम जाक परमेश्वरक वचन प्रचार कर्ल। हुँकन सहायता करक लाग मर्कूस कैजिना यूहन्ना फे हुँकन्हकसँग गैरलह।

६ हुँक सारा टापूम यात्रा कर्टी पाफोस शहरम आपुग्ल। हुँक उहाँ बारयेशू नाउँ रहल एकठो यहूदी जातक भूटा अगमवक्ताह भँटैल। ऊ एकठो जादूगर फे रह। ७ ऊ जादूगर साइप्रस टापूक शासक सर्गियस पौलुसक संघारी रह। ऊ शासक बुद्धिमान् व्यक्ति रलह। हुँकहीन परमेश्वरक वचन सुन्नास लग्लन

त, ऊ बारनाबास ओ शाऊलह बलापठैल। ८तर ऊ जादूगर, ज्याकर नाउँ ग्रीक भाषम एलुमास रलहस, बारनाबास ओ शाऊलक विरोध करल। ऊ शासकह येशूकम विश्वास कर नैदेहक लाग घरीघरी ज्वाक ख्वाजल। ९तबदोस शाऊल, ज्याकर और नाउँ पावल रलहन, पवित्र आत्मक शक्तिले भरपूर होक एलुमासह एकटक लगाक हेर्ल, ओ कल, १०।"तैं शैतानक सन्तान, सब असल चिजिक शत्रु, सारा छलकपट ओ दुष्ट चालले भरल बाट्या। का तैं परमप्रभुक स्वाभ डगर बड्ग्याइ नैछोर्ब्या? ११आब हेर्, परमप्रभुक दण्ड ट्वारम पररहल। तैं कुछ समयसम आन्धर होजैब्या ओ घामक अजरार फे नैदेख्नेहुइट्या।"

तबहँ वाकर आँखिम कज्या बट्टी आइअस हुइलस, ओ ऊ जातसे आन्धर होगैल। कुई वाकर हाँठ पकर्क डोज्यादि कैक ऊ यिहँउहँ सहारा ख्वाज लागल। १२यी सब घटना देख्क ऊ शासक प्रभु येशूकम विश्वास कर्ल, काकरकि प्रभुक बारेम हुँकहीन सिखाइल शिक्षा सुन्क ऊ छक्क पररलह।

पावल ओ बारनाबास एन्टिओखिया शहरम वचन प्रचार कर्ल

१३पावल ओ हुँकाहार संघरेन पाफोस शहरसे पानीजहाजम चिहुर्क पामफिलिया क्षेत्रक पर्गा शहरम पुग्ल। मर्कूस कैजिना यूहन्नाजुन हुँकनसे अल्गाक यरूशलेम घुम्ल। १४तर हुँकर पर्गासे पिसिदिया क्षेत्रक एन्टिओखिया शहरम गैल, ओ बिसैना दिनम सभाघरम जाक बैस्ल। १५मोशक व्यवस्था ओ अगमवक्तन्हक लिखल किताब पहर्ल त पाछ, सभाघरक अगुवाहुँकर पावल ओ बारनाबासकठे असिन बात कह पठैल, "हेरो भैयौ, टुन्हकठे मनैन उत्साह देना वचन बा कलसे, कहो।"

१६यी सुन्क पावल उठ्ल, ओ हाँठले इशारा कर्ती कल, "इस्त्राएलीहुँकर ओ परमेश्वरक आदर करुइयन और सब मनै, म्वार बात सुनी। १७हम्र इस्त्राएली जातिन्हक परमेश्वर हमार पूर्वन रोज्ल, ओ हुँकर मिश्र देशम रहल समयम हुँकन महान जाति बनैल। परमेश्वर आपन शक्ति देखाक हुँकन उ देशमसे निक्राक अन्ल। १८हुँकर लगभग चालीस वर्षसम उजारठाउँम रहबेर परमेश्वर हुँकन्हक व्यवहार सहल। १९उहाँ कनान देशम रहल सातठो जातिन नाश

कैक हुँकन्हक देश इस्राएलीहुँकन अधिकार करक लाग देल। २० यी सब हुइट्सम लगभग चार सय पचास वर्ष लागल।

तबदोस्र परमेश्वर हुँकन शासन करक लाग अगुवा नियुक्त कर्ल। उ अगुवाहुँक एकपाछ और कर्टी अगमवक्ता शमूएलक पालासम काम कर्ल। २१ तबदोस्र हमार पूर्खाओं परमेश्वरसे राजा मङ्गल। परमेश्वर बेन्यामीन कुलक कीश कना मनैयक छावा शाऊलह राजा बनादेल। ऊ चालीस वर्षसम राज्य कर्ल। २२ परमेश्वर हुँकहिन राजा पदमसे हटाक दाऊदह राजा बनैल। उहाँ दाऊदक बारेम असिक कैरख्ल, 'मै यिशैक छावा दाऊदह आपन ख्वाजलअस भेटारख्लु। ऊ म्वार इच्छा अनुसार सब काम करुइयाबाट।

२३ परमेश्वर इस्राएलीन आपन बाचा करल अनुसार उह दाऊद राजक कुलमसे मुक्ति देहुइया येशूह पठैल। २४ येशू अईनासे आघ यूहन्ना सब इस्राएलीहुँकन मनै आपन पापी मन घुमैलक प्रमाणक रुपम बपितस्मा

लेहपर्ना कैक वचन प्रचार कर्ल। २५ यूहन्ना आपन सेवक अन्त्यओर कल, 'का टुह महीह मुक्ति देहुइया समभरख्लो? मै ऊ नैहुइटु। तर महीसे पाछ एक जन अइटीबाट। मै त उहाँक गैलगुज्रल कमारा हुइना लायक फे नैहुइटु।'

२६ 'हेरो भैयौ, हम्र चाहा अब्राहामक सन्तान रही, चाहा परमेश्वरक आदर कर्ना अयहूदी मनै रही, मुक्तिक यी सन्देश परमेश्वर हम्र सबजन्हक लाग पठादेरख्ल। २७ यरूशलेमम मनै ओ हुँकन्हक शासकहुँक हरेक बिसैना दिन अगमवक्तन्हक लिखल बात पहर्क फे येशूह मुक्ति देहुइया हुइट कैक नैचिन्ल। बेनसे हुँक उहाँह मृत्युदण्ड देक उहाँक बारेम अगमवक्तन्हक लिखल वचन पूरा कर्ल। २८ हुँकन्हकठे उहाँह मृत्युदण्ड देना कुछु कारण नैरलहन, तर फे हुँक उहाँह मुवैहीपठा कैक शासक पिलातससे बिन्ती कर्ल। २९ असिक हुँक उहाँक बारेम लिखल अगमवाणी अनुसार सब काम कर्ल। उहाँ मुल त, हुँक उहाँह क्रूसमसे उटार्क गय्यम ढर्ल। ३० तर

१३.१६ - व्य ७:१; यहो १४:१. १३.२० - न्याय २:१६; १ शमू ३:२०. १३.२१ - १ शमू ८:५; १०:२१.

१३.२२ - १ शमू १३:१४; १६:१२; भज ८६:२०. १३.२४ - मर्क १:४; लूक ३:३. १३.२५ - मती ३:११; मर्क १:७;

लूक ३:१६; यूह १:२०, २७. १३.२८ - मती २७:२२-२३; मर्क १५:१३-१४; लूक २३:२१-२३; यूह १६:१५.

१३.२९ - मती २७:५७-६१; मर्क १५:४२-४७; लूक २३:५०-५६; यूह १६:३८-४२.

परमेश्वर उहाँह मुवलमसे फेदोस जीयादेल। ३१ गालील क्षेत्रसे उहाँकसंग यरूशलेमम आइल मनैन्हकठे उहाँ धेर दिनसम देखपर्टीरल। आजकाल हुँक्रे इस्राएलीन्हक लाग यी बातक साक्षी हुइट।

३२ आब हम्र खुशिक खबर टुन्हकठे प्रचार कर्तीबाटी। परमेश्वर हमार पूर्वनसे करल बाचा ३३ हुँकन्हक सन्तानन्हक लाग पूरा कैदेरखल। उहाँ येशूह मुवलमसे जीयाक उ बाचा पूरा कर्लह। याकर बारेम भजनसंग्रहक द्वासर भजनम असिक लिखल बा -

‘टुँ म्वार छावा हुइटो,
आज मै टुहार बाबा बन्नु।’+

३४ उहाँ ख्रीष्टह फेदोस कबु फे नैमुना हिसाबले जीयैना बारेमजुन असिक कैरखल,

‘दाऊदह बाचा कैगिल् पवित्र ओ
पक्का आशिष
मै टुहन देहम।’

३५ भजनसंग्रह किताबक और ठाउँम असिक लिखल बा,

‘अपन आपन पवित्र जनक शरीरह
कुह नैदेनेहुइटी।’

३६ “याद करो, दाऊद, आपन पुस्ताम परमेश्वरक इच्छा अनुसार काम कर्ल त, मुल। ऊ आपन पुर्वन्हकसंग गारगैल ओ हुँकाहार शरीर कुहगैलन। ३७ तर जेहीह परमेश्वर मुवलमसे जीयैल, उहाँक शरीर नैकुहलीन।

३८ उहओसे, हेरो भैयौ, येशूकम विश्वास कर्लसे पाप क्षमा हुइठा कैक हम्र टुहन कहटी। ३९ उहाँकम विश्वास कर्ना हरेक व्यक्ति सब पापमसे छुटकारा पैठ ओ परमेश्वरक नजरम ठीक ठहाजैठ। यी बात मोशाक व्यवस्था पालन कैक सम्भव नैरह। ४० उहओसे होशियार रही, नैत अगमवक्तन्हक ब्वालल् वचन अपनहुँकन्हकम परिआई। काकरकिक हुँक्रे कैरखल,

४१ ‘हेरो, टुह गिल्ला करुइयन,

+ १३.३३ यिहाँ उल्लेख हुइल पद भजनसंग्रह २:७ मसे लेगैल हो। यी भजनम दाऊद परमेश्वर आपन छावा येशूसे बट्वाडबेरिक अवस्थाह भल्कारखल। वास्तवम, परमेश्वर सड्डभर येशूक बाबा पलबाट, तर यी पद उहाँ जाट्टिसे येशूक बाबा हुइट कैक परमेश्वरक देखाइल बातह विशेष तरिकाले जोड दिहटी। यी पदक सन्दर्भले संकेत करटा कि यिहाँ ‘अजि’ कलक उ समयह जनैटा जौन समयम परमेश्वर येशूह मुवलमसे फेदोस जीयादेल। यी काम कैक परमेश्वर मनैन्हक सामु येशू जाट्टिसे आपन छावा रलक बात प्रमाणित कल।

अचम्म मानो ओ मुजाओ!+
काकरकि टुन्हक समयम मै एकठो
अस्सिन काम करक लाग बाटु,
कि वाकर बारेम कुई टुहन बयान
कैदेलसे फे टुह विश्वास
करुइया नैहुइटो।"

४२ पावल ओ बारनाबास
सभा-घरमसे जाइ लगल त, मनै 'और
बिसैना दिन फेदोस आक यी बात
हमन सुनैहो' कैक हुँकनसे बिन्ती
कर्ल। ४३ सभा ओराइल त, यहूदीहुँक
ओ यहूदी धर्म मन्ना अयहूदीहुँक
पावल ओ बारनाबासक पाछ लगल।
पावल ओ बारनाबास हुँकनसे बटोइटी
परमेश्वरक अनुग्रहम विश्वास
कर्लरहपर्ना बातम जोड देटीरल।

४४ और बिसैना दिन लगभग सारा
शहरक मनै परमेश्वरक वचन सुनक
लाग उलट्क अइल। ४५ मनैन्हक
भीड देख्क, यहूदीहुँक बिह मुल ओ
पावलक विरोध कर्टी अपमान कर्ल।

४६ तर पावल ओ बारनाबास साहस
कैक कल, "परमेश्वरक वचन सबसे
पैल्ह टुहनऽ सुनाइपर्ना रह, तर टुह
वचनह इन्कार कैदेलो। यी बातले टुह

अनन्त जीवन पैनायोग्यक नैहुइटो
कना बात देखपरल। उहओसे, आब
हम्र अयहूदीन्हकठे जउइयाबाटी।
४७ काकरकि प्रभु हमन असिन आज्ञा
देरख्ल,

'संसारक कोनो-कोनोमक मनै
मुक्ति पैहीं कैक
मै अयहूदीहुँकन अजरार देखाइक
लाग टुहन नियुक्त कैरख्लु।"

४८ अयहूदीहुँक यी बात सुन्क खुशी
हुइल, ओ परमेश्वरक वचनक प्रशंसा
कर्ल। अनन्त जीवन पाइक लाग
आघहें रोजगैलक मनै येशू ख्रीष्टकम
विश्वास कर्ल।

४९ परमेश्वरक वचन उ क्षेत्रम
चारीओर फैलल। ५० तर यहूदीहुँक
परमेश्वरक भक्ति कर्ना उच्च वर्गक
जन्नीमनैन ओ शहरक मुख्य-मुख्य
मनैन पावल ओ बारनाबासक विरोधम
उकसैल। हुँक पावल ओ बारनाबासह
सतैल ओ हुँकन आपन साँधसिमाना
कटादेल। ५१ तर पावल ओ बारनाबास
आपन ग्वारक धूर हुँकन्हक विरोधम

+ १३.४१ यी बात बाइबलक पुरान नियमक खण्डमसे (हबकक १:५) लेगैल हो, अगमवक्ता इमाएलीहुँकन चेतावनी देहट
कि परमेश्वर विदेशी सेनन्हक आक्रमणद्वारा हुँकन दण्ड देहकै लाग बाट। यिहाँ पावल यी पद येशूक बारेम खुशिक खबरम
विश्वास नैकर्ना मनै पैना दण्डम लाग करट।

भराक आइकोनियन शहरम गैल।+
५२ तर विश्वासीहुँक्रजुन आनन्दले ओ
पवित्र आत्माले भरिपूर्ण हुइल।

**पावल ओ बारनाबास आइकोनियन
शहरम वचन प्रचार कर्ल**

१४ एन्टिओखियम करलअस
पावल ओ बारनाबास
आइकोनियन शहरम फे यहूदीन्हक
सभाघरम जाक असिन किसिमले
बोल्ल, कि उहाँ रहल धेर यहूदीहुँक्र
ओ अयहूदीहुँक्र येशूक विश्वास
कर्ल। २ तर विश्वास कर नैचहना
यहूदीहुँक्रजुन और अयहूदीहुँकन
सुन्याक विश्वासीन्हक विरोध कर
लगैल। ३ पावल ओ बारनाबास
उ शहरम धेर दिनसम रल। हुँक्र
प्रभुकम भरोसा कैक साहससे बोल्ल।
प्रभु हुँकन अचम्म-अचम्मक काम
कर्ना शक्ति देलन। असिक उहाँक
कृपक बारेम हुँकन्हक बवालल्
वचन सत्य प्रमाणित हुइल्। ४ तर
शहरक मनैन्हक बीचम फुट हुइलन।
कुई यहूदीन्हकओर लगल ओ कुई
प्रेरितन्हकओर लगल। ५ तबदोस
कुछ अयहूदीहुँक्र ओ यहूदीहुँक्र आपन

शासकहुँकनसे मिल्ल पावल ओ
बारनाबासह पत्थले मार्क मुवादेना
योजना कर्ल। ६ तर हुँक्र उ योजना
थाहाँ पैल त, भागक लुकोनिया क्षेत्रक
लुस्त्रा ओ डर्बी शहर, ओ आसपासक
इलाकम गैगिल। ७ हुँक्र उ ठाउँम फे
खुशिक खबर प्रचार कर्टीरल।

**पावल एकठो कूँज मनैयह चोखैल,
तर पाछ मनै पावलकम पत्था बसैल**

८ लुस्त्रा शहरम ग्वारा चलाइ
नैसेक्ना एकठो मनैया रह। ऊ जर्मटीक
कूँज रलकओसे कबु फे नैनेङ्गलरह।
९ पावल प्रचार करबेर उ मनैया ध्यान
देक सुनटह। पावल ओहीह एकटक
लगाक हेर्ल, ओ "मै चोखाजैम" कना
वाकर विश्वास देख्ल। १० तब पावल
बरा बोलीले कल, "आपन ग्वारक
भरम उठ!" अत्रा कटी साइट उ मनैया
जुरुक्क उठल् ओ न्याङ्ग लागल।

११ पावलक करल यी काम देख्क
उहाँक मनै आपन लुकोनिया भाषम
बरा बोलीले कह लगल, "दिउँताओँ
मनै होक हमारठे आरल।" १२ हुँक्र
बारनाबासह जिउस दिउँता कल, ओ
पावल मुख्य प्रचारक रलकओसे

+ १३.५१ यदि यहूदीहुँक्र अयहूदीन्हक गाउँम यात्रा कर्ल कलसे, हुँक्र आपन भुल्वा ओ चप्पल मजासे भराइँट। याकर अर्थ हुँक्र आपन ग्वारम अयहूदीन्हक जगमक धूर समेत लाग नैदेहुँडैट कना रहे। कारकीक हुँक्र अयहूदीहुँकन ओ हुँकन्हक जैगा समेत अशुद्ध मानैँट। पावल ओ बारनाबास परमेश्वरक वचन इन्कार करल यहूदीन्हक सामनै उहे काम कर्ल। हुँक्र आब परमेश्वर हुँकन अशुद्ध मनहीं, ओ यदि हुँकन्हकम परमेश्वरक दण्ड परिअइलसे, हुँक्र अपन्हे जिम्मेवार बाट कना बाँट देखाइक लाग उँकाम कर्ल। थप जानकारीक लाग लूका ६:५ म रहल फुटनोट हेरी।

हुँकहीन हर्मस दिउँता कल।+ १३ जिउस दिउँतक मन्दिर शहरक गेटसे बाहार लगघ रह। उ मन्दिरक पुजेह्वा नट्वन ओ फूलमाला लेक शहरक गेटम अइल, काकरकि हुँक सबजना बलि चहाक पावल ओ बारनाबासक पूजा कर चहल।

१४यी बात थाहाँ पैटीकि प्रेरितहुँक, बारनाबास ओ पावल, आपन-आपन भुल्वा चिँटल। ओ मनैन्हक भीडम दगुर्ती जाक बरा बोलीले कल, १५"नाहीं, तुह यी का करटो? हम्र फे त टुन्हकअस दुःख-सुख भोगना मनै हुइटी। हम्र टुहन असिन बेकार काममसे घुमाक जीवित परमेश्वरकठे लैजाइक लाग खुशिक खबर प्रचार कर आरली। स्वर्ग, पृथ्वी, समुद्र ओ उहींम रहल सबथोक बनुइया उह परमेश्वर हुइट। १६हुइना त उहाँ अघट्टेक मनैन ज्या मन लगलन उह धर्म मान देल, १७तर उहाँ असल ओ भलो काम कर्टीआइलबाट कना बातक प्रमाण देटीबाट। उदाहरणक लाग, उहाँ आकाशमसे पानीक भरी पठादेठ ओ ठीक समयम बालीनाली फरादेठ।



पावल मुगैल् हुई कैक घँस्यैटी
बाहार लैगिल (१४.१८)

उहाँ टुन्हक लाग खैना चिज प्रशस्त जुटादेक टुन्हक मन आनन्दले भरदेठ।" १८अत्रा कैक बारनाबास ओ पावल मुशिकलसे मनैन रोक्ल, काकरकि हुँक बलि चहाक पावल ओ बारनाबासक पूजा कर चाहल रलह।

१९पाछ कुछ यहूदीहुँक एन्टिओखिया ओ आइकोनियनसे उहाँ अइल, ओ भीडक मनैन सुज्याक पावलकम पत्थ्रा बर्साइ लगैल। हुँक पावल मुगैल्हुई कैक हुँकहीन शहरसे बाहार घँस्यैटी लैगिल। २०तर जब विश्वासीहुँक पावलक आञ्जरपाञ्जर जम्मा हुइल, तब ऊ उठ्ल ओ शहरम घुम्क गैल।

+ १४.१२ ग्रीकहुँकन्हक मुख्य दिउँता जिउस रलह। हुँक उ दिउँता मनैन्हक रक्षा कर्ठ कैक विश्वास करँट। हर्मसजुन जिउस दिउँतक छावा रलह, ओ ऊ जिउस ओ ओर दिउँतन्हक तफसे ब्वालट।

† १४.१४ आपन-आपन भुल्वा चिँटल: यहूदीहुँकन यदि कौनो मनैया परमेश्वरक अपमान करटा जसिन लगलन कलसे, उ अवस्थम आपन-आपन भुल्वा चिँटके करी विरोध जेना हुँकन्हक चलन रलहन।

**पावल ओ बारनाबास फेदोस
विश्वासीन भेटाए गैल ओ हरेक
मण्डलीम रेखदेख करक
लाग मनैन नियुक्त कर्ल**

द्वासर दिन पावल बारनाबासकसंग डर्बी शहरम गैल। ^{२१}हुँक उ शहरम खुशिक खबर प्रचार कर्ल ओ धेर जन प्रभु येशूकम विश्वास कर्ल। तबदोस हुँक उहाँसे लुस्त्रा, लुस्त्रासे आइकोनियन, आइकोनियनसे पिसि-दिया क्षेत्रक एन्टिओखिया शहरम घुम्ल। ^{२२}हुँक हरेक शहरम विश्वासीन बलगर बनैल ओ येशूकम विश्वास कर्लरहपर्ना बातक उत्साह देटी कल, "हम्र परमेश्वरक राज्यम जाइक लाग धेर दुखकष्ट सहपर्ठा।" ^{२३}पावल ओ बारनाबास हरेक मण्डलीम रेखदेख करक लाग मनैन नियुक्त कर्ल। हुँक ब्रत रहक प्रार्थना कर्ल ओ आपन विश्वास करल प्रभु येशूक रेखदेखम हुँकन सुम्पदेल।

**पावल ओ बारनाबास परमेश्वरसे
सहायता पैलक बात एन्टिओखियक
विश्वासीहुँकन सुनैल**

^{२४}तबदोस हुँक पिसिदिया क्षेत्र हुइटी पामफिलिया क्षेत्रम गैल। ^{२५}हुँक पर्गा शहरम परमेश्वरक वचन प्रचार कर्ल, ओ पाछ अटालिया शहरम गैल।

^{२६}हुँक उहाँसे पानीजहाजम चिहुर्क सिरिया क्षेत्रक एन्टिओखिया शहरम घुम्ल। यिह शहरम विश्वासीहुँक पावल ओ बारनाबासह परमेश्वरक रेखदेखम सुम्पलहन ओ प्रचार कर्ना कामम पठैलहन। हुँक आपन काम पूरा कैक उह ठाउँम घुम्ल। ^{२७}हुँक एन्टिओखियम पुगल त, मण्डलीक मनैन जम्मा करैल। हुँक परमेश्वर उहाँक वचन प्रचार कर्ना कामम हुँकन सहायता कर्लक, ओ अयहूदी मनैन येशूकम विश्वास कर्ना मौका देलक बात सुनैल। ^{२८}हुँक उ शहरम विश्वासीन्हकसंग धेर दिनसम रल।

**प्रेरितहुँक ओ मण्डलीम रेखदेख
करुइयन मोशक व्यवस्था
सम्बन्धी विवाद मिलैल**

१५ तब यहूदिया क्षेत्रसे कुछ मनै अइल ओ विश्वासीहुँकन असिक सिखाइ लगल, "यदि टुह मोशक व्यवस्थम रहल रीत अनुसार खतना नैकर्ना हो कलसे, टुह मुक्ति पाइ नैसेक्ने हुइटो।" ^२यी बातम पावल ओ बारनाबासक हुँकनसे चर्काचर्की पर्लन। अन्तम, उहाँक विश्वासीहुँक यी विषयम प्रेरितहुँकनसे ओ मण्डलीम रेखदेख करुइयनसे बात बट्वाक टुङ्गो

लगाइक लाग पावल, बारनाबास ओ कुछ और विश्वासीन यरूशलेमम पठैना निर्णय कर्ल। ३ मण्डलीक सदस्यहुँक हुँकन उहाँसे बिदा देक पठैल। हुँक फोनिके ओ सामरिया क्षेत्र हुइटी जाइबेर ठाउँ-ठाउँम रहल विश्वासीहुँकन अयहूदीहुँक फे प्रभु येशूकम विश्वास कैरखल कना बात सुनैटी गैल। यी सुन्क उहाँक विश्वासीहुँक धेर आनन्दित हुइल। ४ पावल ओ बारनाबास यरूशलेमम आपुगल त, उहाँ रहल प्रेरितहुँक, मण्डलीम रेखदेख करुइयन लगायत मण्डलीक सारा सदस्यहुँक हुँकन स्वागत कर्ल। तब पावल ओ बारनाबास परमेश्वर हुँकनद्वारा करल सारा कामक बारेम उहाँ जम्मा हुइल् सबजहन सुनैल।

५ तब फरिसी+ समूहसे कुछ विश्वासीहुँक ठहेइल ओ कल, "अयहूदी विश्वासीहुँक फे खतना सहित मोशक व्यवस्था सब पालन करपर्ठा।"

६ यी विषयम सोचविचार करक लाग प्रेरितहुँक ओ मण्डलीम रेखदेख करुइयन जम्मा हुइल। ७ सभम धेर वादविवाद हुइलन। तब पत्रुस उठ्क हुँकन सम्बोधन कर्ल, "हेरो भैयौ, टुहन थाहँ बा, कि अयहूदीहुँक फे

खुशिक खबर सुनहीं ओ विश्वास कर सेकहीं कैक परमेश्वर महीह टुन्हक्के बीचमसे धेर वर्ष आघ चुनलह। ८ मनैन्हक मनक विचार जन्ना परमेश्वर हमन देहलअस अयहूदीहुँकन फे पवित्र आत्मा देक हुँकन स्वीकार कर्ल कना बात हुँकन देखारखल। ९ उहाँ यहूदी ओ अयहूदीन्हक बीचम कुछ भेदभाव नैकर्ल। अयहूदीहुँक विश्वास कर्ल ओ परमेश्वर हुँकन्हक मन शुद्ध पर्ल। १० धर्मकर्मक जुवा ना हमार पूर्खाओं ब्वाक सेक्ल, ना हम्र सेक्ली। उहओसे यी जुवा अयहूदीहुँकन ब्वाक लगाक काजे परमेश्वरह रिस लगैना? ११ हमार विश्वास का हो कलसे, हम्र, हुँकन्हकअस, प्रभु येशूक अनुग्रहले मुक्ति पारखली।"

१२ परमेश्वर बारनाबास ओ पावलह चिन्ह देखैना ओ अचम्म-अचम्मक काम कर्ना शक्ति देलक बात हुँक बयान करबेर, सारा सभक मनै चुपचाप होक सुन्ल। १३ हुँक बोल्क सेक्ल त, याकूब कल, "हेरो भैयौ, म्वार बात सुनो, १४ परमेश्वर पैल्ह चो अपन्हे दया कैक अयहूदीन फे रोज्ल, ओ आपन मनै बनैल कना बातक बारेम सिमोन पत्रुस कैडर्ल। १५ यी बातसे अघट्टे

+ १५.५ फरिसी: ५:३४ म रहल फुटनोट हेरी।

अगमवक्तन्हक लिखल वचन फे
ठ्याकक मिलठन। परमेश्वरक
वचनम असिक लिखल बा,

१६ 'तबदोस्र मै घुम्क अइम
ओ दाऊदक ढलल घरह फेदोस्र
बनैम।

मै बिग्रल भत्कल चिजह फेदोस्र
बनाक

ओहीह पैल्हकअस बनैम,+

१७ ताकि बाँकी रहल मनै,
म्वार बलाइल अयहूदीहुँकन समेत
सब जन म्वारठे अइहीं।

१८ यी परमप्रभुक कहल बात हो।

उहाँ यी बात अघट्टे
जनादेरख्लह।'

१९ याकूब कहटी गैल, "उहओसें
परमेश्वरकठे आइल अयहूदीहुँकन
धर्मकर्मक जुवा ब्वाक लगाक दुख
देना काम नैकरी कना म्वार विचार
बा। २० बेनसे एकठो चिठी लिख्क
हुँकन पठाई। चिठीम का लिखि कलसे
- 'मूर्तिपूजा करल अशुद्ध चिज जिन
खैहो, व्यभिचार जिन करहो, घ्याँचा
डाब्क मुवाइल पशुक शिकार जिन

खैहो ओ रगत जिन खैहो।' २१ हुँकन
अत्रा मनहीं कलसे होगैल्, काकरकि
मोशक व्यवस्था त पुस्तौँपुस्तासे
हरेक शरहम रहल सभाघरम हरेक
बिसैना दिन प्रचार कर्ना ओ पहर्ना काम
हुइटीआइल बा।"†

प्रेरितहुँकन ओ मण्डलीम
रेखदेख करुइयन अयहूदी
विश्वासीहुँकन चिठी पठैल

२२ तबदोस्र प्रेरितहुँकन ओ मण्डलीम
रेखदेख करुइयन सारा मण्डलीक
सदस्यहुँकनसे मिल्क दुइ जन
अगुवन चुन्ना ओ हुँकन पावल
ओ बारनाबासकसंग एन्टिओखिया
शहरम पठैना निर्णय कर्ल। उ दुइ जन
बारसाबास कैजिना यहूदा ओ सिलास
रलह। २३ हुँकन उ चारजहन एकठो
असिन चिठी देक पठैल:

"हम्र यरूशलेमम रना प्रेरितहुँकन
ओ मण्डलीम रेखदेख करुइयन यी
चिठी टुह एन्टिओखिया, सिरिया
ओ किलिकियाम रना अयहूदी
विश्वासीहुँकन लिखटी।

† १५.१६ जब परमेश्वर 'मै दाऊदक ढलल घरह फेदोस्र बनैम' कल, तब उहाँ सम्भवतः यी बातह कहख्वाजल रलह: येशूह
मुवलमस फेदोस्र जीयैना ओ उहाँह आपन मनैन्हक, यहूदी ओ अयहूदी समेत, राजा बनैना।

† १५.२१ ग्रीक भाषक स्रोतम यी पद स्पष्ट नैहो। काजे अयहूदीहुँकन उ चारठो नियम मान पर्ना कना सम्बन्धम सायद याकब
कारण देटीबाट। या ऊ अहदीन्हक लाग हरेक बिसैना दिन सभाघरम मोशक व्यवस्था सिख्ना मौका धेर पलबाटन कटी आपन
स्रोताहुँकन शान्त करैना कीसिस कटीबाट।

सबजहन टुन्हक डाडुभैयनसे जय मसिह बा।

२४ यिहाँसे गैल् कौनो कौनो मनै हुइलनैहुइल् बात बट्वाक टुहन दुख देल कना बात हम्न सुन्ली। तर हुँक्र हमार पठाइल मनै नैहुइट। २५ उहओसे हम्न एकठो सभा बलैली ओ दुइ जन अगुवन चुन्क हुँकन प्रिय बारनाबास ओ पावलकसँग टुन्हकठे पठैना सहमतीम एकठो निर्णय कर्ली। २६ हुँक्र हमार प्रभु येशू ख्रीष्टक लाग आपन प्राण समेत खतराम पाररख्ल। २७ हम्न हुँकन्हकसँग यहूदा ओ सिलासह टुन्हकठे पठाइटी। हमार लिखल बात हुँक्र आपन मुहले टुहन सुनादेहीं। २८ टुह मानपर्ना आवश्यक बात बाहेक और टन्टा टुहन नैलगैना पवित्र आत्मक ओ हमार इच्छा बा। २९ टुह मानपर्ना बात का हो कलसे - 'मूर्तिपूजा करल अशुद्ध चिज जिन खैहो, रगत जिन खैहो, घ्याँचा डाब्क मुवाइल पशुक शिकार जिन खैहो, ओ व्यभिचार जिन करहो।' टुह अत्रा बात मन्बो कलसे, टुन्हक लाग एकदम मजा हुई। आबक लाग बिदा।"

चिठी लैजुइयन एन्टिओखियक विश्वासीहुँकन बलगर करैल

३० यी चिठी लेक उ चार जन एन्टिओखिया गैल। हुँक्र उहाँ मण्डलीक सदस्यन बलाक यी चिठी देल। ३१ चिठी पहबेर हुँक्र धेर उत्साह पैल ओ खुशी हुइल। ३२ यहूदा ओ सिलास अपन्हे फे अगमवक्ताओं रलह। हुँक्र विश्वासीन उत्साह देना वचन धेर बोल्क बलगर करैल। ३३ यहूदा ओ सिलास टनिक दिनसम उहाँ बैठ्ल, ओ पाछ उहाँक विश्वासीहुँक्र हुँकन आशीर्वाद देक बिदावारी देल ओ यरूशलेमक मण्डलीम पठैलन। ३४ [तर सिलास उहँ रना विचार कर्ल।]+ ३५ पावल ओ बारनाबासजुन एन्टिओखियाम रल। हुँक्र और धेरजहनसे मिल्ल प्रभु येशूक बारेम खुशिक खबर मनैन सिखैना ओ प्रचार कर्ना काम कर्ल।

बारनाबास मर्कूसह रोज्ल, ओ पावल सिलासह रोज्ल

३६ टनिक दिन पाछ पावल बारनाबासह कल, "हम्न जौन-जौन शहरम प्रभु येशूक बारेम खुशिक खबर मनैन प्रचार कर्लही, उह-उह शहरम जाक लौव विश्वासीन्हक हालखबर बुभी।" ३७ बारनाबास

+ १५.३४ ग्रीक भाषक कौनो-कौनो स्रोतम ३४ पद बा। तर धेर भरपर्ना स्रोतम यी पद नैहो। उहओसे यिहाँ कोष्ठम [] लिखल बा।

मर्कूस कना यूहन्नह फे सँगसँग लैजाइ चहल। ^{३८} तर मर्कूसह सँगसँग लैजैना बात पावलह ठीक नैलग्लन, काकरकि पैल्हक प्रचार यात्रम मर्कूस पामफिलिया क्षेत्रम हुँकनसे अल्गाक घुमरलह ओ पूरा यात्रम हुँकन्हक कामम साथ नैदेलरलह। ^{३९} यी बातम पावल ओ बारनाबासक बीचम चर्काचर्की परगैलन त, हुँक अल्गागैल। तबदोस बारनाबास मर्कूसह लेल ओ पानीजहाजम चिहुर्क साइप्रस टापूम गैल। ^{४०} पावलजुन सिलासह रोज्ल। विश्वासीहुँक पावल ओ सिलासह परमेश्वरक रेखदेखम सुम्पल त, हुँक उहाँसे नेङ्गल। ^{४१} पावल सिरिया ओ किलिकिया क्षेत्र हुइटी विश्वासीन बलगर करैटी गैल।

पावल तिमोथीह फे आपनसँग लैगिल

१६ तबदोस पावल पैल्ह डर्बी शहरम, दोस लुस्त्रा शहरम गैल। लुस्त्रम तिमोथी नाउँ रहल एकठो विश्वासी भैया रलह। हुँकाहार डाई यहूदी जातिक विश्वासी रलही, तर हुँकाहार बाबाजुन ग्रीक जातिक रलह। ^२ लुस्त्रा ओ आइकोनियनम रहल विश्वासीहुँक तिमोथीह एक असल व्यक्ति मानँट। ^३ पावल

तिमोथीह आपनसँग प्रचार यात्रम लैजैना इच्छा कर्ल ओ हुँकाहार खतना कैदेल। काकरकि हुँकाहार बाबा ग्रीक जातिक रहल बात उ ठाउँम रना सब यहूदीहुँकन थाहाँ रलहन। ^४ तबदोस हुँक शहर-शहरम जाक विश्वासीहुँकन यरूशलेमम प्रेरितहुँक ओ मण्डलीम रेखदेख करुइयन मिल्ल करल निर्णय पालन करहो कैक निर्देशन देल। ^५ असिक मण्डलीहुँक विश्वासम बलगर हुइटीगैल ओ विश्वास कर्ना मनै फे मण्डलीम हरेक दिन थपजैटीरल।

पावल दर्शनम माकेडोनिया क्षेत्रक एकठो मनैयह देख्ल

^६ तबदोस पवित्र आत्मा पावल, सिलास ओ तिमोथीह एशिया क्षेत्रम वचन प्रचार कर रोक लगैलकओसे, हुँक फ्रिगिया ओ गलातिया क्षेत्रओर गैल। ^७ माइसिया क्षेत्रक सीमानम पुगल त, हुँक बिथिनिया क्षेत्रम जैना विचार कर्ल। तर येशूक आत्मा हुँकन जाइ नैदेलन। ^८ उहओसे हुँक माइसिया हुइटी समुद्रक किनारम रहल त्रोआस शहरम गैल। ^९ उह रात पावल एकठो दर्शन देख्ल – माकेडोनिया क्षेत्रक एकठो मनैया ठह्याक पावलसे असिक बिन्ती

करटह, "माकेडोनिया आई, ओ हमन सहायता करी।" १० पावल उ दर्शन देख्ल त, हम्र तुरुन्त माकेडोनिया जाइक लाग तयार हुइली, काकरकि उ ठाउँम खुशिक खबर प्रचार करक लाग परमेश्वर हमन बलैटीबाट कना बातम हम्र निश्चित हुइली।

लिडिया फिलिप्पी शहरम पावलक बात सुन्क विश्वासी हुइली

११ हम्र त्रोआससे पानीजहाजम चिहुर्क स्वाभ उपाय सामोश्राके टापूम गैली, ओ द्वासर दिन हम्र नियापोलिस शहरम पुगली। १२ उहाँसे हम्र फिलिप्पी शहरम गैली। उ शहर माकेडोनिया क्षेत्रक एकठो मुख्य शहर रह ओ रोमी सरकारक अधीनम रह। हम्र उ शहरम टनिक दिन बैठली।

१३ शहरसे बाहार लद्दक किनारम यहूदीहुँकर प्रार्थना करक लाग जम्मा हुइतुहीं कैक हम्र अनुमान लगैली, ओ हम्र बिसैना दिनम उ ठाउँम गैली। हम्र बैठली ओ उहाँ जम्मा हुइल् जन्नी मनैनसे बात बट्वाइ लगली। १४ हमार बात सुनुइयामध्येम लिडिया नाउँक एकठो जन्नीमनैया फेरलही। ऊ थिआटीरा शहरक रलही, ओ फिलिप्पी शहरम आक बैजङ्ग्यार रङ् रहल महङ्ग लुगक व्यापार करँट। ऊ परमेश्वरक आराधना करँट। ऊ हमार बात सुन्टीगैली, ओ प्रभु हुँकाहार

मन खोलदेहन, ओ ऊ पावलक बट्वाइल बात स्वीकार कर्ली। १५ ऊ ओ हुँकाहार सलघरक मनै बप्तिस्मा लेल। तबदोस ऊ हमन बिन्ती कर्ली, "यदि अप्णहुँकर महीह प्रभुम पक्का विश्वासी सम्भठी कलसे, हमार घर आक बैठी।" असिक ऊ हमन हुँकाहार घर जाइक लाग कर लगैली।

पावल ओ सिलास भयालखानम

१६ एक दिन हम्र प्रार्थना कर्ना ठाउँम जाइटलही। जैटीजैटी हम्र भूत्वा लागल एकठो कमारीह भेटैली। ऊ उह भूत्वक शक्तिले मनैन्हक भाग्य बट्वादेह ओ आपन मालिकन्हक लाग धेर पैसा कमादेह। १७ ऊ पावल ओ हमार पाछपाछ आइ लागल, ओ चिच्च्याइ लागल, "यी मनै सबसे उच्च परमेश्वरक सेवा कर्ठ। हिँकर मुक्ति पैना बातक प्रचार कर्ठ।" १८ ऊ धेर दिनसम अस्तै कर्टीरहल। तब पावल दिक्क मन्ल ओ ऊ कमारीकओर घुम्क भूत्वह कल, "येशू ख्रीष्टक नाउँम मै टोहीह आज्ञा देहटु, वाकरमसे निकर।" अत्रा कटीसाइट उ भूत्वा निकर्क गैगिल्।

१९ उ कमारीकओसे पैसा कमैना वाकर मालिकन्हक आशा हेरागैलन। तब हुँकर पावल ओ सिलासह पकर्ल ओ हुँकन घँस्यैटी शहरक मुख्य चोकम रहल न्याय कर्ना

ठाउंम लैगिल। २० हुंक्र पावल ओ सिलासक विरोधम रोमी सरकारक हाकिमहुंक्रन्हकठे उजुर कर्ल, "यी मनै यहूदी हुइट ओ हमार सारा शहरम गन्जागोल मच्चैठ। २१ हम्न रोमी नागरिकहुंक्र पालन कर नैसेकजैना रीतिभाँति हिंक्र सिखैठ।"

२२ तब भीडक मनै मिल्ल पावल ओ सिलासह आक्रमन कर्ल। हाकिमहुंक्र पावल ओ सिलासक भुल्वा चिट्ठाठ पार्क लट्ठीले पिट्ना आदेश देल। २३ हुंक्र पावल ओ सिलासह लट्ठीले कर्से पिट्ल, तबदोस भयालखानम थुन्देल। ओ भयालखानक हाकिमह हुंक्र भाग नैपैना गरी थुन्लरना आदेश देल। २४ असिन आदेश पैलकओसे उ हाकिम हुंक्रन भयालखानक भित्री क्वाठम लैगिल ओ हुंक्रन्हक ग्वारम ठिँगुरा लगादेल।



भयालखानम पावल ओ सिलासह
ठिँगुरा लगादेलन (१६.२४)

२५ लगभग आधा रातम पावल ओ सिलास प्रार्थना कर्टी परमेश्वरक भजन गाइटलह, ओ और कैदीहुंक्रजुन सुनटलह। २६ एकचोट्टे एकठो भारी भुइँचाल गैल्, ओ भयालखानक जगओग हिलगैल्। तब तुरुन्त सब द्वार अपन्हे उघरगैल् ओ सब कैदीन बान्धल सिक्री फे अपन्हे फुसुकगैल्। २७ भयालखानक हाकिम जग्ल, ओ भयालखानक सब इवार उघ्रल देख्ल। हुंक्रहीन आब सब कैदी भागगैल्हुहीं जसिन लग्लन, उहओसे ऊ आत्महत्या कर्ना विचारले आपन तरवाल फिँक्ल। २८ यी देख्ल त पावल हुंक्रहीन बरा सोरले असिक कल, "जिन करी! काजे आत्महत्या करक लाग बाटी? हम्न सब जन यिहँ पलबाटी।"

२९ यी सुन्क हाकिम दिया मड्ल, ओ भट्ट भित्री क्वाठम गैल। ऊ डरले लगलगैटी पावल ओ सिलासक पाउ पर्ल। ३० तबदोस ऊ पावल ओ सिलासह बाहार लैजाक कल, "हजुर, मुक्ति पाइक लाग महीह का कर परी?"

३१ हुंक्र कल, "मुक्ति पाइक लाग प्रभु येशू ख्रीष्टकम विश्वास करी। उहाँकम विश्वास कर्लसे, अप्णहुंक्र सलघरक मनै मुक्ति पैबी।" ३२ तब हुंक्र उ हाकिम ओ हुंकाहार सलघरक मनैन प्रभुक बारेम खुशिक खबर सुनैल। ३३ उ हाकिम पावल ओ सिलासह

लैजाक रातीऽ हुँकन्हक घाउ धोदेल। उ हाकिम ओ हुँकाहार सलघरक मनै तबहँ बप्तिस्मा लेडल। ३४ उ हाकिम पावल ओ सिलासह आपन घर लैजाक खाना खवैल। परमेश्वरकम विश्वास कर्लकओसे उ हाकिम ओ हुँकाहार सलघरक मनै आनन्दित हुइल।

३५ बिहान्क अजरार हुइल् त, शहरक हाकिमहुँक सिपाहीहुँकन असिन आदेशसहित भ्यालखानक हाकिमकठे पठैल, "दुनुजहन छोरदेओ।" ३६ तब भ्यालखानक हाकिम पावलह कल, "शहरक हाकिमहुँक अप्नह ओ सिलासह छोरदेहो कैरख्ल। आब मजासे जाई।"

३७ तर पावल सिपाहीहुँकन कल, "हम्र रोमी नागरिक रटीरटी फे हुँक हमन दोषी बिना ठहैल मनैन्हक आघ पिट्ल, ओ भ्यालखानम फे थुन्देल। आबजुन्हक हमन गुपचुपम जाइ कहट। हम्र काकर मन्बी? हुँक अपन्हे आक हमन छुटाइपर्ठा।"

३८ पावलक कहल बात सिपाहीहुँक हाकिमहुँकन सुनैल। हुँक पावल ओ सिलास त रोमी नागरिक हुइट कना सुन्क डरैल। ३९ हुँक आक पावल ओ सिलाससे माफ मड्ल, ओ हुँकन जेलमसे निक्काक "हमार शहरमसे चलजाई" कैक अनुरोध कर्ल। ४० भ्यालखानमसे निक्कल त पावल ओ सिलास लिडियक घरम गैल। हुँक

विश्वासीहुँकनसे भेटघाट कर्ल ओ हुँकन थप उत्साह देल। तबदोस्र हुँक उहाँसे गैल।

थेसलोनिका शहरम मनै पावलक विरोधम तहल्का मच्चैल

१७

पावल ओ सिलास अम्पिपोलिस ओ अपोल्लोनिया शहर हुइटी थेसलोनिका शहरम गैल। उहाँ यहूदीन्हक एकठो सभाघर रह। २ पावल आपन नियमित बानीअनुसार सभाघरम गैल, ओ लगातार तीन शनिचर परमेश्वरक वचनम लिखल बात लेक मनैनसे बहस कर्टीरल। ३ ऊ परमेश्वरक वचनम लिखल बातक अर्थ खोल्टी मुक्ति देहुइया ख्रीष्टह दुख भ्वाग पर्ना, मुवपर्ना ओ मुवलमसे फेदोस्र जीएपर्ना रलहन कैक प्रमाणित कैदेल। ऊ कल, "मै जौन येशूक बारेम बट्वाइटु, उह व्यक्ति ख्रीष्ट हुइट।" ४ यी सुन्क कुछ यहूदीहुँक विश्वास कर्ल, ओ पावल ओ सिलासकओर लगल। परमेश्वरक डर डरैना ग्रीक जातिक धेर मनै ओ कुछ मुख्य मुख्य महिलाहुँक फे हुँकन्हकओर लगल।

५ तर और यहूदीहुँक बिह मुल ओ बजारम दादागिरी करुइयन जम्मा कैक शहरम तहल्का मच्चाइ लगैल। हुँक हुँकन पक्कक लाग यासोन नाउँ रहल मनैयक घरम हमला कर्ल।

हुँकन भेटैलसे घँस्यैटी जनतन्हक सामुन्नेम लैजैना हुँकन्हक विचार रलहन। ६ हुँक हुँकन उहाँ नैभेटैल त, यासोन ओ और विश्वासीहुँकन घँस्यैटी शहरक हाकिमन्हकठे लैगिल, ओ बरा बोलीले कल, "सारा संसारम शान्ति भङ्ग करुइयन हिँकहे हुइट, ओ हमार शहरह फे गोलमाल पारट। ७ यासोनजुन हुँकन पौन्हा बनाक आपन घरम ढैराखल। हुँक रोमी शासकक् हुकुम नैमन्ट ओ येशू नाउँक एकठो और राजा बाट कैक कठ।" ८ यी सुन्क हाकिमहुँक समेत सारा शहरक मनै भद्रगोल कर लगल। ९ आखिरम हाकिमहुँक यासोन ओ हुँकाहारसँग रहल औरजहन धरौटी लेक छोरदेल।

पावल बेरिया शहरम वचन प्रचार कर्ल, ओ एथेन्स शहरम गैल

१० तबदोस विश्वासीहुँक पावल ओ सिलासह रातारात बेरिया शहरम पठादेल। हुँक उहाँ पुगल त, यहूदीन्हक सभाघरम गैल। ११ थेसलोनिकक् मनैन्हक तुलनम उहाँक मनै धेर खुला विचारक रलह, ओ हुँक पावलक बात एकदम ध्यान देक सुन्ल। हुँक हरेक दिन परमेश्वरक वचन पढ़ँट, ओ पावल ओ सिलासक सिखाइल बात सत्य हो कि नाहीं कैक छानबीन करँट।

१२ असिक, धेर यहूदीहुँक प्रभुकम विश्वास कर्ल। हुँक केल नैहोक, खानदानी घरक धेर ग्रीक महिला ओ पुरुष मनै विश्वास कर्ल।

१३ पावल त बेरियम जाक परमेश्वरक वचन प्रचार करट कैक थेसलोनिकक् कुछ यहूदीहुँक थाहाँ पैल। तब हुँक उहाँ फे गैल ओ मनै उकसाक शहरम तहल्का मच्चाइ लाग्गैल। १४ यी बात थाहाँ पैटीसाइट विश्वासीहुँक पावलह समुद्रक किनारओर पठादेल। तर सिलास ओ तिमोथीजुन बेरियम पलरल। १५ पावलह पुगाइ जउइयन हुँकाहार सँगसँग एथेन्स शहरसम गैल। तबदोस पावल कल, "सिलास ओ तिमोथीह सक्यासम भट्ट म्वारठे पठादेहहो।" हुँक पावलक कहल यी खबर लेक बेरियम घुम्ल।

पावल एथेन्स शहरम वचन प्रचार कर्ल, ओ कुछ मनै येशूकम विश्वास कर्ल

१६ पावल, सिलास ओ तिमोथीह एथेन्सम अश्या लगटीरहल समयम, उ शहर पूजा कर्ना मूर्ति-मूर्तिले भरल देख्क मन खिन्न हुइलन। १७ उहओसे ऊ सभाघरम जाक यहूदीहुँकनसे ओ परमेश्वरक आदर कर्ना ग्रीक जातिक धेर मनैसे येशूक बारेम बहस करँट। ऊ हरेक दिन बजारक

मुख्य चोकम जाक उहाँ अइना जैना मनैनसे फे बहस करँट। १८ उ समयम इपिक्कुरी ओ स्तोइकी कना फरक-फरक विचारधारक विद्वानहुँकर रलह। हुँकनसे फे पावलक वादविवाद पर्लन। जब पावल येशू ओ उहाँ मुवलमसे फेदोस जीलक बारेम बटोइल, तब हुँकमध्ये कुइ कुइ कल, "यी बकबक्या का कहटा, का कहटा?" और जन कल, "यी त विदेशी धर्म प्रचार करअस देखपर्ठा।" १९ तबदोस हुँकर पावलह शहरक अरियोपागस कना मुख्य सभम लैजाक कल, "अपनक सिखाइल लौव शिक्षा हम्र आकुर बुभ्र चाहटी। २० अपनक बट्वाइल बात अचम्मक सुन्मिल्ला। उहओसे अपनक कहखाजल खास बात का हो, उ हम्र बुभ्र चाहटी।" २१ एथेन्स शहरक सब मनै ओ उहाँ बैठना विदेशीहुँकर लौव-लौव विचारक बारेम छलफल कैक केल समय बिताइँट।

२२ पावल मुख्य सभम ठहेइल ओ कल, "हेरी, एथेन्स शहरक मनै, अपनहुँकर धेर धर्मी बाटीजसिन महीह लगठा। २३ काजेकलसे यी शहरम घुमाफिर कर्तीजाइबेर मै अपनहुँकन्हक पूजा कर्ना ठाउँ फे देख्नु। बलि चहैना ठाउँम त भन "नैचिन्हल परमेश्वरक

लाग" कैक लिखल रह। अपनहुँकर जौन परमेश्वरह बिना चिन्हल पूजा कर्ठी, हाँ, उह परमेश्वरक बारेम मै प्रचार करटु।

२४ "उ परमेश्वर संसार ओ उहींम रहल सारा चिजिक सृष्टि कर्लह। उहाँ स्वर्ग ओ पृथ्वीक प्रभु हुइट, ओ मनैन्हक बनाइल मन्दिरम नैरट। २५ उहाँह मनैन्हक सहायता कुछु फे नैचहटिन। बेन उहाँ पो सबजहन जीवन, प्राण ओ सबचीज देठ। २६ उहाँ एकठो मनैयकमसे संसारक सब जातिन बनैल, ओ हुँकन्हक शासन अवधि ओ बैठना ठाउँ पैल्हहें तोकदेरख्ल। २७ परमेश्वर असिक कर्ल मनै परमेश्वरह खोजहीं, ओ शायद छामछुम कैक उहाँह भेटा पो डरठ कि कैक उहाँ चहल। वास्तवम उहाँ हमनसे दूर नैहुइट। २८ परमेश्वर हमन जीना ओ चहलपहल कर्ना शक्ति देठ ओ उहाँ रलक कारण हम्र संसारम बाटी। अपनहुँकन्हक कौनो-कौनो कविहुँकर फे कैरख्ल, 'हम्र परमेश्वरक सन्तान हुइटी।'

२९ "आब परमेश्वरक सन्तान रलकओसे, हम्र परमेश्वरह मूर्ति बनुइयक हाँठले बनाइल स्वान, चाँदीक या पत्थरक मूर्तिअसक नैस्वाँचपरट। ३० पैल्ह अनजानम

करल मनैन्हक ओसिन कामह परमेश्वर दण्ड नैदेल। तर आब त परमेश्वर सब ठाउँक सबजहन 'आपन-आपन पापी मन घुमाक परमेश्वरकठे आओ' कैक आज्ञा देरख्ल। ३१ काकरकि संसारक सब मनैन्हक न्याय कर्ना दिन उहाँ तोकरख्ल ओ उ दिन उहाँ आपन नियुक्त करल एकठो व्यक्तिद्वारा ठीकसे न्याय करुइयाबाट। उ व्यक्ति के हो कना बात सबजन्हक आघ प्रमाणित करक लाग परमेश्वर उहाँह मुवलमसे फेदोस जीयारख्ल।"

३२ जब हुँकर मनै मुवलमसे फेदोस जीजैठ कना पावलक बात सुन्ल, तब कुइ-कुइ पावलक बात हाँसिम उरादेल। तर औरजन जुन "यी विषयम हम्र पाछ फेदोस टुहिनसे सुन्बी" कल। ३३ तबदोस पावल उ सभमसे गैल। ३४ तर कुछ मनै पावलक बात स्वीकार कैक प्रभु येशूकम विश्वास कर्ल। हुँकमध्ये मुख्य सभक सदस्य डियनुसियस, दामारिस नाउँ रहल एकठो महिला, ओ और जन फेरलह।

**पावल कोरिन्थ शहरम वचन
प्रचार कर्ल, ओ गलियोन
पावलह ज्वाक नैचहल**

१८

तबदोस पावल एथेन्ससे कोरिन्थ शहरम गैल। २ ऊ

उहाँ अकिलास नाउँ रहल एकठो यहूदी मनैयह भेटैल। पोन्टस क्षेत्रम जर्मल उ मनैया आपन गोसिन्या प्रिस्किलह लेक इटालिया क्षेत्रसे हालसाल उहाँ आरलह। काकरकि क्लौडियस नाउँ रहल रोमी शासक सब यहूदीहुँकन रोम शहरमसे निकर्क जैना हुकुम देरख्लह। पावल हुँकन भेटाए गैरलह। ३ हुँकर पाल बनैना काम कैक गुजारा चलाइँट। पावल फे उह काम कैक गुजारा चलैना हुइलकओसे ऊ हुँकन्हकसँग बैठक सँगसँग काम कर्ल। ४ पावल हरेक शनिच्चरक दिन सभाघरम जाक यहूदी ओ ग्रीक जातिक मनैनसे तर्कवितर्क करँट ओ येशूकम विश्वास करक लाग हुँकन मनैना कोसिस करँट।

५ सिलास ओ तिमोथी माकेडोनिया क्षेत्रसे अइल त, पावल वचन प्रचार कर्ना कामम पूरा समय बितैल। ऊ यहूदीहुँकन येशू जो ख्रीष्ट हुइत कैक साक्षी देल। ६ तर जब हुँकर विरोध कर्टी पावलक अपमान कर्ल, तब ऊ चेतावनीक रुपम आपन लुगमक धुर भरैटी+ हुँकन कल, "यदि परमेश्वरक दण्ड टुन्हकम परी कलसे, टुह अपन्हे जिम्मेवार बाटो, उ दोष महीह नैलगने हो। आबठेसे मै अयहूदीन्हकठे प्रचार कर जैबुँ।"

७ तबदोस पावल सभाघरमसे तीतस युस्तस नाउँ रहल मनैयक घरम

गैल। हुँकाहार घर सभाघरक लगघ रलहन। उ मनैया परमेश्वरक आराधना करँट। ८ सभाघरक अगुवा क्रिस्पस ओ हुँकाहार सलघरक मनै प्रभुकम विश्वास कर्ल। कोरिन्थ शहरक धेर मनै फे पावलक वचन सुन्क विश्वास कर्ल, ओ बप्तिस्मा लेल।

९ एक दिन रात्क पावल दर्शनम प्रभुह देख्ल। प्रभु पावलह कल, "किहुसे जिन डराओ, चूप लाग्क जिन बैठो। खुशिक खबर प्रचार कर्टीजाओ। १० टुहिन सहायता करुइया मै बाटुँ ओ टुहार हानीनोक्सानी कुई फे नैकरुइया हो। काकरकि यी शहरम म्वार मनै धेर बाट।" ११ असिक परमेश्वरक वचन सिखैटी पावल एक वर्ष छ मैन्हासम कोरिन्थ शहरम बैठल।

१२ जब अखैया क्षेत्रम गलियोन शासक हुइल, तब यहूदीहुँक मिल्क पावलक विरोध कर्ल ओ हुँकहीन पकर्क शासकक् आघ अदालतम अन्ल। १३ हुँक "यी मनैया हमार यहूदी व्यवस्थक विरोध हुइना तरीकाले मनैन परमेश्वरक आराधना कर सिखैठा" कैक पावलह दोष लगैल।

१४ जब पावल ब्वालक लाग रलह, तब शासक गलियोन पावलह दोष लगुइयन्हकओर घुम्क कल, "यदि यी बात कुछु अन्याय या गम्भीर

अपराधसे सम्बन्धित रहट् कलसे, मै टुह यहूदीन्हक उजुर सुन्क न्याय कर्ना ठीक हुइनेरह। १५ तर यी बात त टुन्हक आप्पन व्यवस्थसे सम्बन्धित शब्द ओ नाउँक केल सवाल हुइलकओसे, यी बात टुह अपन्हे मिलाओ। मै असिन बातक न्याय नैकरम।" १६ अत्रा कैक गलियोन हुँकन अदालतमसे निक्रादेल। १७ तब भीडक मनै सभाघरक अगुवा सोस्थेनेसह पकर्ल ओ अदालतक सामुन्नेम पिट्देल। तर गलियोन यी बातक कुछु मतलब नैकर्ल।

पावल विभिन्न ठाउँम

विश्वासीहुँकनसे भेटघाट कर्टी फेदोस एन्टिओखिया शहरम गैल

१८ पावल धेर दिनसम कोरिन्थ शहरम रल। पाछ उ विश्वासीहुँकनसे प्रिस्किला ओ अकिलासकसँग बिदावारी लेल ओ किंक्रिया शहरम गैल। उ आपन करल भाकल पूरा कर्लक बात प्रमाणित करक लाग यहूदी रीतअनुसार आपन कपार खौल। तबदोस ऊ पानीजहाजम चिहुर्क सिरिया क्षेत्रम गैल। १९ हुँक सिरिया जाइबेर एफिसस शहरम पुगल त प्रिस्किला ओ अकिलास उह शहरम रल। पावलजुन हुँकन उहँ छोर्क उहाँक एकठो सभाघरम जाक यहूदीनसे

वादविवाद कर लगल। २० यहूदीहुँक पावलह टनिक दिनसम उहँ रहक लाग बिन्ती कर्ल, तर पावल नैमन्ल। २१ जे होस, ऊ हुँकनसे बिदा हुइबेर असिक कल, "यदि परमेश्वरक इच्छा हुई कलसे, मै घुम्क अइम।" तब उ पानीजहाजम चिहुर्क एफिसससे गैल। २२ ऊ कैसरिया शहरम पुगल। तबदोस ऊ उहाँसे यरूशलेम जाक विश्वासीहुँकनसे भेटघाट कर्ल ओ एन्टिओखिया शहरम गैल।

२३ पावल टनिक दिनसम उहँ रल। तबदोस ऊ गलातिया ओ फ्रिगिया क्षेत्रक विभिन्न ठाउँम जाक विश्वासीहुँकन विश्वासम भन बलगर बनैल।

अपोल्लोस एफिसस शहरम वचन प्रचार कर्ल

२४ उह समयम अलेक्जेन्द्रिया शहरम जर्मल अपोल्लोस नाउँक एकठो यहूदी मनैया एफिससम अइल। हुँकाहार मजासे ब्वाल सेक्ना खूबी रलहन ओ ऊ परमेश्वरक वचनम फे धेर ज्ञान पाइल मनैया रलह। २५ येशूकम विश्वास कर्लसे मुक्ति पाजैठा कना बात उ जानरख्लह। ऊ जोशिलो होक येशूक बारेम ठिकसे सिखाइँट्। तर फे ऊ बप्तिस्मा देहुइया यूहन्ना मनैन सिखाइल बप्तिस्मक बारेम केल जानरख्लह। २६ ऊ

सभाघरम जाक निर्धक्कसे मनैन सिखाइलगल। एक दिन प्रिस्किला ओ अकिलास हुँकाहार वचन सुन्ल त, हुँकहीन आपन घरम लैगिल, ओ परमेश्वर कसिक मनैन मुक्ति देठ कना बातक बारेम हुँकहीन भन स्पष्टसे बुभादेल।

२७ अपोल्लोस अखैया क्षेत्रम जैना विचार कर्ल त, एफिससम रहल विश्वासीहुँक हुँकहीन उहाँ जाइक लाग उत्साह देल, ओ अपोल्लोसह स्वागत करहो कैक एकठो चिठी फे लिखदेल। ऊ उहाँ पुगल त, प्रभुक अनुग्रह पाक विश्वासी हुइल् मनैन धेर सहायता कर्ल। २८ अपोल्लोस यहूदीनसे तर्कवितर्क कर्ल त, हुँक चूँ कैक ब्वाल नैसेकल। ऊ परमेश्वरक वचन प्रयोग कैक येशू जो ख्रीष्ट हुइठ कना बात सबजन्हक सामुन्नेम प्रमाणित कैदेल।

पावल प्रार्थना कैदेल त,

विश्वासीहुँक पवित्र आत्मा पैल

१९ अपोल्लोस कोरिन्थ शहरम रहल समयम, पावल फ्रिगिया क्षेत्रसे पर्वत्वक डगरम नेङ्गटी एफिसस शहरम पुगल। ऊ उहाँ कुछ विश्वासीहुँकन भेटैल, २ ओ हुँकन पुछ्ल, "का तुह विश्वास कर्लो त, पवित्र आत्मा पैलो?"

हुँक्र जवाफ देल, "पवित्र आत्मा बाट कैक त हम्न सुन्ना फे नैसुन्लहुइटी।"

३ ऊ कल, "ओसिन हो कलसे, टुह कसिन बप्तिस्मा लेलो त?"

हुँक्र कल, "बप्तिस्मा देहुइया यूहन्नक सिखाइल अनुसार हम्न बप्तिस्मा लेरल्ली।"

४ तब पावल कल, "यूहन्नक सिखाइल बप्तिस्मा त, मनै आपन-आपन पापी मन घुमाक परमेश्वरकठे आइल प्रमाणक रुपम लेना बप्तिस्मा हो। उ 'महीसे पाछ अउइयकम विश्वास करहो' कल। हुँकहीनसे पाछ अउइया व्यक्ति येशू त हुइट।" ५ यी बात सुन्क हुँक्र प्रभु येशूक नाउँम बप्तिस्मा लेल। ६ जब पावल हुँकन्हकम हाँठ ढैक प्रार्थना कर्ल, तब पवित्र आत्मा हुँकन्हकम अइलन, ओ हुँक्र अन्य भाषम बोल्ल ओ अगमवाणी फे कर्ल। ७ हुँक्र लगभग बाह जन रलह।

८ पावल तीन मैनहासम नियमित रुपले सभाघरम जाक निर्धक्कसे प्रचार कर्ल। ऊ परमेश्वरक राज्यक बारेम बहस कर्ती मनैन विश्वासम अन्ना कोसिस कर्ल। ९ तर कौनो-कौनो मनै हठी होक विश्वास नैकर्ल। भन उल्ट

सबजन्हक सामुन्नेम 'मुक्तिक डगर'क बदनाम कर्ल। उहओसे पावल हुँकन्हक सभाघरम जाइ छोरेदेल ओ विश्वासीहुँकन आपनसँग लैगिल। तबदोस्र ऊ हरेक दिन टुरान्नस स्कूलम मुक्ति पैना बारेम मनैनसे तर्कवितर्क करँट। १० असिक दुइ वर्षसम चल्तीरहल, ओ एशिया क्षेत्रम रना यहूदी, अयहूदी सब जन प्रभुक वचन सुन्ल।

भूत्वा स्केवासक छावन आक्रमण कैक रक्तारुहुन बनादेलन

११ परमेश्वर पावलद्वारा अचम्म-अचम्मक काम कर्ल, १२ यिहाँसम कि मनै रूमाल या और लुगा पावलक शरीरम छुवाक बेरम्हेन्हकठे लैजाइँट। उ लुगा बेरम्हेन छुवैतीसाइँट, हुँक्र चोखाजाइँट ओ हुँकन्हकमसे भूत फे निकरजाइँट।

१३ तर भारफुक कर्ती ठाउँ-ठाउँम घुमफिर कर्ना कौनो-कौनो यहूदीहुँक्र प्रभु येशूक नाउँम मनैन्हकमसे भूतन निक्राइखोज्ल। हुँक्र भूतन कहँट, "पावलक प्रचार करल येशूक नाउँम मै टोहीह आज्ञा देहटु, वाकरमसे निकर।" १४ स्केवास नाउँ रहल एकठो यहूदी मुख्य पुजेहोक सात भाइ छावन फे ओस्तै करँट। १५ एक दिन हुँक्र ओस्तै

कल त, भूत्वा हुँकन कहल, "मै येशूह चिन्टुँ, ओ पावलह फे चिन्टुँ, तर टुह के हुइटो?" १६ भूत्वा लागल उ मनैया उल्लरटी जाक हुँकन भटकदेहल। ऊ हुँकन असिन हिंसात्मक हिसाबसे आक्रमण करल, कि ऊ हुँकनहक लगाइल लुगा सब चिँठचाँठ पार्क हुँकन रक्तारुहुन बनादेहल। तब हुँकन उ घरमसे नडूट भागैल।

१७ यी घटना एफिससम रना यहूदी ओ अयहूदीनहक बीचम हाली फैलगैल। सुनुइयन सब जन डरैल, ओ प्रभु येशूक धेर प्रशंसा कर्ल। १८ येशूकम विश्वास करल मनै धेर जन अइल ओ आपन-आपन करल खराब काम खुल्लमखुल्ला स्वीकार कर्ल। १९ हुँकनमध्ये पैल्ह भारफुक करुइयन तन्त्रमन्त्र लिखल आपन-आपन किताब अन्ल ओ सबजन्हक सामुन्नेम जरादेल। हुँकन जराइल किताबक म्वाल अडूकल कर्ल त, लगभग पचास हजार चाँदीक पैसा हुइल। २० असिक प्रभुक बारेम वचन प्रभावशाली तरीकाले फैलटी गैल।

पावल पैल्ह माकेडोनिया ओ अखैया हुइटी यरूशलेम जैना, दोस रोम जैना योजना बनैल

२१ यी घटना हुइल त पाछ, यरूशलेम जैनासे आघ पावलह

पवित्र आत्मा हुँकहीन माकेडोनिया ओ अखैया क्षेत्रम जैना कर लगाइल महसुस कर्ल। ऊ कल, "यरूशलेम जाक पाछ मै रोम शहरम जैहीपठा।" २२ तबदोस ऊ आपन दुइ जन सेवा करुइयन, तिमोथी ओ इरास्तसह माकेडोनियम पठैल, तर ऊ अप्पजुन टनिक दिनसम एशिया क्षेत्रम पलरल।

एफिसस शहरम मूर्ति बनुइयन

पावलक विरोधम हूलदङ्गा मच्चैल

२३ उ समयम, 'मुक्तिक डगर' कना बारेम खूब हल्ला चलल् रह। २४ डेमेत्रियस नाउँ रहल एकठो मनैया चाँदीक मन्दिर बनैना व्यापार कर। ऊ धेर मनैन आर्तेमिस देवीक छुटिछुटि मन्दिर बनैना कामम लगारख्लाहा। २५ एक दिन डेमेत्रियस आपन काम लगाइल मनैन ओ ओस्तहँ काम कर्ना और मनैन फे जम्मा कैक कहल, "हेरो भैयौ, हम्र यिह व्यापार कैक पैसा कमैठी कना बात टुहन थाहाँ बा। २६ तर टुह अपन्हे देख्ठीबाटो ओ सुन्टीबाटो, कि पावल कना मनैया हाँठले बनाइल दिउँता त दिउँतऽ नैहुइट कैक धेर मनैन भाँडूस्याकल। उ मनैया यी काम एफिसस शहरम केल नैहोक सारा एशिया क्षेत्रम कैस्याकल। २७ हमार व्यापारक नाउँ गन्ढैना केल नाहीँ, तर महान् देवी आर्तेमिसक मन्दिरसमेत बिना कामक

हुइसेकना खतरा बा। ओ सारा एशिया ओ संसारभरिक मनै पुज्टीआइल देवीक गौरव फे सब हेराजउइया बा।"

२८यी सुन्क हुँकरीसले चूर हुइल, ओ "एफिसीहुँकन्हक महान देवी आर्तेमिसक, जय!" कटी करसे नारा लगाइ लगल। २९सारा शहरम हूलदङ्गा मचगैल्। मनै एकजुट होक पावलक संघरेन माकेडोनियासे आइल गायस ओ अरिस्तार्खसह पकर्ल ओ रङ्गशालम घँस्यैटी लैगिल। ३०पावल मनैन्हक भीडम जाइक लाग रलह, तर विश्वासीहुँक हुँकहीन जाइ नैदेल्। ३१एशिया क्षेत्रक कुइ-कुइ हाकिमहुँक पावलक संघरेन रलह। हुँक फे पावलह "उहओसे उहाँ जिन जाई" कैक बिन्ती पठैल।

३२रङ्गशालम अत्रा हूलदङ्गा मच्चल रह, कि कुइ कुछु कहँट, कुइ कुछु कहँट। हुँक घाँटीक नश फुला-फुला आपन-आपनओरसे लागल रलह। धेर जसिन मनैन त, उहाँ काजे भीड लागल बा कैक फे थाहाँ नैरलहन। ३३भीडम रहल यहूदीहुँक अलेक्जेन्डर नाउँक मनैयह यी अवस्थक बारेम बट्वाइक लाग आघ सर्ल। अलेक्जेन्डर मनैन शान्त रहक लाग हाँठले इशारा कर्ल ओ यहूदीन बचाइक लाग बोल्ना कोसिस कर्ल। ३४तर जब भीडक मनै ऊ त यहूदी हो कैक थाहाँ पैल, तब हुँक सब जन "एफिसीहुँकन्हक महान देवी

आर्तेमिसक, जय! एफिसीहुँकन्हक महान देवी आर्तेमिसक, जय!" कैक करीब दुइ घण्टासम करसे नारा लगैटीरल।

३५आखिरम शहरक हाकिम मनैन शान्त कराइ सेक्ल। ऊ कल, "हेरो एफिसस शहरक मनै, महान् देवी आर्तेमिसक मन्दिर ओ स्वर्गमसे भरल देवीक मूर्तिक रक्षा करुइयन हम्र एफिसीहुँक जो हुइटी कैक सब जन जन्लबाट। ३६यी बात कुइ फे इन्कार कर नैसेकना सत्यतथ्य रलकओसे, अप्णहुँक शान्त रही ओ सोचविचार बिना कर्ल कुछु जिन करी। ३७अप्णहुँकन्हक पकर्क आनल यी मनै ना त हमार मन्दिर लुटरख्ल, ना त हमार देवीक अपमान कैरख्ल। ३८यदि डेमेत्रियस ओ हुँकाहार कामम लगाइल मनैन्हक, केकरो विरोधम कुछु चित्त नैबुभल बात बाटन कलसे, हुँक अदालतम जाक उजूर करसेकठ, हुँकन्हक मुद्क फैसला करुइया न्यायाधीशहुँक पलबाट। ३९यदि अप्णहुँकन्हक यहीसे धेर उजूर बा कलसे, वाकर बारेम नागरिक सभा बलाक छलफल कर फे सेकजाई। ४०आभुक यी हूलदङ्गा टुह मच्चैलो कैक रोमी सरकार हमन दोष लगाइसेकना खतरा बा, काकरकि यी हूलदङ्गा मच्चैना त कुछु कारणऽ नैहो। यदि रोमी सरकार याकर बारेम हमनसे

कुछु स्पष्टिकरण मागी कलसे, हमारठे कुछु जवाफ नैहो।" ४१ ऊ अत्रा कैक मनैन बिदा देल।

पावल माकेडोनिया ओ ग्रीस
हुइटी, विश्वासीहुँकन
वचनले हौसला देटी घुम्ल

२० उ हूलदङ्गा शान्त हुइल् त, पावल विश्वासीहुँकन बलाक वचनले हौसला देल, ओ हुँकनसे बिदाबारी होक माकेडोनिया क्षेत्रम गैल। २ उहाँ रहलम ऊ ठाउँ-ठाउँम जाक विश्वासीहुँकन वचनले हौसला देल। तबदोस ऊ ग्रीस क्षेत्रम गैल, ३ ओ तीन मैन्हा बैठ्ल। पावल पानीजहाजम चिहुर्क सिरिया क्षेत्रम जाइक लाग रलह। तर ऊ उहँसे गैलसे यहूदीहुँक हुँकहीन मुवादेना योजना कर्टीबाट कैक थाहाँ पैल त, ऊ माकेडोनिया हुइटी सिरिया जैना विचार कर्ल। ४ यी यात्रम विभिन्न ठाउँक विश्वासीहुँक पावलक संगसंग गैल। हुँक बेरिया शहरम रना पुरसक छावा सोपात्रोस, थेसलोनिका शहरम रना अरिस्तार्खस ओ सिकन्दस, डर्बी शरहम रना गायस, ओ तिमोथी, ओ एशिया क्षेत्रसे आइल तुखिकस ओ त्रोफिमस रलह। ५ हुँक हमनसे आघ नेङ्गैल, ओ त्रोआस शहरम हमन अश्या लागटलह। ६ हम्रजुन खमिर नैडारल रोटी खैना टिहार मनाक

सेक्क फिलिप्पी शहरसे पानीजहाजम चिहुर्ली। हम्र पाँच दिन पाछ त्रोआसम हुँकन्हकठे पुगली, ओ सात दिन उहँ रली।

पावल एकठो मुवल
जवान मनैयह जीयादेल

७ अट्वारक सन्भ्या भुसमुस हुइल् त, हम्र प्रभु-भोज खाइक लाग उहाँक विश्वासीनसे जम्मा हुइली। पावल हुँकनसे बातचित करटलह, ऊ द्वासर दिन चलजैना हुइलकओसे आधा रातसम बटोइटीरल। ८ हम्र जम्मा हुइल् उप्रक ताल्हक क्वाठम कयौठो दिया बर्टीरह। ९ पावल धेर बेरसम बटोइटीरहबेर, भ्यालिम बैठल युटिकस नाउँक एकठो जवान मनैया ओङ्घाइटह। ओङ्घैटी-ओङ्घैटी उ मनैया मस्तसे निन्दागैल। निन्दाइल मनैया तीसर ताल्हमसे खसगैल्। मनै ओहीह उठैल त, ऊ मुवल रह। १० पावल टर उत्रल, ओ लम्पसार होक मुवल मनैयह उँक्वारभर पकर्ल। ऊ हुँकन कल, "चिन्ता जिन करो, मनैया जीटीह बा।" ११ तबदोस हुँक सब जन उप्रक ताल्हम जाक प्रभु-भोज खैल। पावल बिहान्क अजरार नैहुइट्सम हुँकनसे बात बटोइटीरल। तबदोस ऊ बिदा होक गैल। १२ उ मनैया बचलकओसे, हुँक धेर खुसी हुइल ओ ओहीह घर लैगिल।

त्रोआससे मिलेटससमक यात्रा

१३ हम्न पानीजहाजम चिहुर्क अस्सोस शहरम गैली। पावल उह शहरम हमन भेटैना बात मिलारखलह, काकरकि ऊ अस्सोसम पैदल जउइया रलह। १४ अस्सोसम हमार भ्याँट हुइल्, ओ हम्न उहाँ पानीजहाजम चिहुर्क सँगसँग मितिलेने शहरम गैली। १५ द्वासर दिन हम्न उहाँसे पानीजहाजम चिहुर्क खियस टापूक लग्घ पुगली, तीसर दिन सामोस टापूम पुगली। वाकर द्वासर दिन मिलेटस शहरम पुगली। १६ एशिया क्षेत्रम समय नैबितैना पावलक इच्छा रलकओसे ऊ एफिसस शहरम नैपैठ्ना विचार कैरखलह। ऊ पेन्तिकोस कना टिहारक दिन सक्यासम यरूशलेमम पुगजैना कोसिस करटलह।

पावल एफिससक मण्डलीक अगुवन हौसला देल, ओ हुँकनसे बिदा लेल

१७ हम्न मिलेटसम पुगली त, पावल एफिससक मण्डलीक अगुवन मिलेटसम आक हुँकहीनसे भेटघाट कर्ना एकठो खबर पठैल। १८ हुँक अइल त, पावल हुँकन कल, "एशियम आइल दिनठेसे आजसम मै टुन्हकसँग रहबेर कसिक दिन बितैनु कना बात टुन्हक लाग थाहँ बा। १९ कुछ

यहूदीन्हक जालभेलक कारण महीह घरीघरी दुख सहपरल, तर फे मै नम्न होक, कत्रा समयम आँस खसैटी, प्रभुक सेवा कर्नु। २० टुहन आवश्यक रहल वचन प्रचार करबेर मै कबु फे पाछ नैहट्नु। यी काम मै सार्वजनिक रुपले फे कर्नु, ओ टुन्हक घर-घरम जाक फे कर्नु। २१ मै यहूदी ओ अयहूदी सबजहन आपन-आपन पापी मन घुमाक परमेश्वरकठे आइपर्ना ओ प्रभु येशूकम विश्वास करपर्ना आवश्यक बा कैक गम्भीर चेतावनी देनु।

२२ "आबजुन, मै पवित्र आत्मक बात फाँक नैसेक्क यरूशलेम जाइटु, उहाँ महीह का-का हुई कैक म्वार लाग थाहाँ नैहो। २३ तर हरेक शहरम सतावट ओ भयालखानम दुख सहपरी कना बातभर पवित्र आत्मा महीह थाहाँ देरखल। २४ तर म्वारम ज्या परिअइलसे फे म्वार लाग कुछु मतलब नैहो। म्वार चाहना अत्र हो, कि प्रभु येशूक देहल एकठो काम मै पूरा कर सेकँ। उ काम, का हो कलसे, परमेश्वर मनैन अनुग्रह देरखल कना खुशिक खबर फैलैना हो।

२५ "मै टुन्हकठे जाक परमेश्वरक राज्यक बारेम प्रचार कर्नु। हेरो, टुह आबठेसे म्वार मुह फेदोस द्याख नैपैबो कैक म्वार लाग थाहाँ

बा। २६ उहओर्से आभुक दिन मै टुहन गम्भीर बात कहटु, कि यदि टुहमध्ये कुइ परमेश्वरक दण्डम परी कलसे, वाकर दोष महीह नैलगनेहो। २७ काकरकि टुह जानपर्ना परमेश्वरक सारा योजना टुहन जनाइक लाग मै पाछ नैहटनु। २८ आब, टुह आपन ओ और विश्वासीन्हक रेखदेख अपन्हे करहो। परमेश्वर आपन छावक रगतले आपन बनाइल मण्डलीक लालनपालन करक लाग पवित्र आत्मा टुहन अगुवा नियुक्त कैरल्ल। २९ मै यिहाँसे जैम त, भुटा वचन बोलुइयन भैरीन सखाप पर्ना ब्वाँसाअस टुन्हक बीचम आक मण्डलीह हानी करुइयाबाट। ३० टुन्हकके बीचमसे फे भुटा वचन बोल्ना मनै उठुइयाबाट। हुँकर सत्य बातह बड्गाक कत्रा विश्वासीन लैजाइ खोजुइयाबाट। ३१ उहओर्से होसियार रहो। तीन वर्षसम रातदिन आँस खसैटी हरेक विश्वासीह म्वार सिखाइल बात सम्भलरहो।

३२ "आब मै टुहन परमेश्वरक जिम्मम ओ उहाँक वचनक सहायतम छोरुँ, जौन वचन उहाँक अनुग्रहक बारेम बटोइठा। उह वचनद्वारा परमेश्वर टुहन विश्वासम बलगर बनुइयाबाट, ओ आपन सब मनैन आशिष देहुइयाबाट। ३३ मै केक्रो स्वानचाँदी, या लुगाफाटक ल्वाभ

नैकर्नु। ३४ मै आपन यह हाँठले काम कैक आपन लाग ओ म्वारसँग रहुइयन्हक लाग आवश्यक परल चिज जुटैनु कना बात टुन्हक लाग थाहाँ बा। ३५ सक्कु बातम मेहनत कर्लसे, खाँचोम परल मनैन सहायता कर सेकजैठा कना उदाहरण मै टुहन देखारल्लु। 'लेनासे देना भन धेर आशिष पैना हो' कैक प्रभु येशूक कहल वचन सम्भलरहहो।"

३६ अत्रा कैक सेकल त, पावल ठिहुन टेकल ओ सबजहनसे मिल्ल प्रार्थना कर्ल। ३७ हुँकर सब जन धेर रुइल, ओ पावलह उँक्वारभर पकर्क चुम्ल ओ बिदा देल। ३८ पावलक 'टुह आबठेसे म्वार मुह फेदोस द्याख नैपैबो' कहल बातम हुँकर धेर दुख मन्ल। तबदोस हुँकर पावलह पानीजहाजसम पुगादेल।

**विश्वासीहुँकर पावलह
'यरूशलेमम जिन जाई' कैक
बिन्ती कर्ल, तर फे ऊ गैल**

२१ हम्न हुँकनसे विदावारी होक पानीजहाजम चिहुर्ली ओ सरासर कोस टापूम पुग्ली। द्वासर दिन हम्न रोडस टापूम गैली, दोस उहाँसे पटारा शहरम गैली। २ उहाँ हम्न फोनिकेम जैना एकठो पानीजहाज भेटैली ओ ओइहँम चिहुर्ली। ३ पानीजहाज जाइट-जाइट साइप्रस

टापूह द्याख सेकना ठाउँम पुगल त, उ टापूह बाउँओर पार्क गैल्। ओ सिरिया क्षेत्रक टुरोस शहरम मालसमान उतारक लाग ज्वाकल ब्याला हम्म फे उत्रली। ४ हम्म उ ठाउँम विश्वासीहुँकन भेटैली ओ सात दिनसम हुँकन्हकसँग रली। हुँक पवित्र आत्मक अगुवाईम पावलह यरूशलेमम जिन जाई कैक बिन्ती कर्ल। ५ तर फे हम्म उहाँ जाइक लाग पानीजहाज पक्र घुम्ली। हुँक आपन-आपन जहानपरीवार लर्कापर्का सबजहन लेक हमन पठाए शहरसे बाहार समुद्र किनारसम अइल। हम्म उहाँ ठिहुन टेक्क प्रार्थना कर्ली। ६ तबदोस्र हुँकनसे बिदावारी होक हम्म पानीजहाजम चिहुर्ली, ओ हुँकजुन आपन-आपन घर गैल।

७ हम्म टुरोससे टोलेमाइस शहरम गैली। हम्म उहाँक विश्वासीहुँकन भेटाए गैली ओ एक दिन हुँकन्हकसँग बैठली। ८ द्वासर दिन हम्म उहाँसे बिदावारी होक कैसरिया शहरम गैली, ओ खुशिक खबर प्रचार करुइया फिलिपक घरम बैठली। उ फिलिप यरूशलेमम खाना बँटना कामम रोजगैल् सात जनमध्ये एकठो रलह। ९ हुँकाहार चारठो भ्वाज नैहुइल् छाइन् रलहन। हुँक अगमवाणी ब्वालँट।

१० हम्म कैसरियम कुछ दिनसम पलरहल समयम यहूदियासे अगाबस नाउँ रहल एकठो अगमवक्ता अइल। ११ ऊ हमारठे अइल ओ पावलक फार कस्ना लुगले आपन हाँठ-ग्वारा अपन्हे बाहान्क कल, "पवित्र आत्मा असिक कठ, 'यी फार कस्ना लुगा ज्याकर हो, ओहीह यरूशलेमम यहूदीहुँक असहेँक बन्धहीं ओ अयहूदीन्हक हाँठम सुम्पदेहीं।"

१२ यी बात सुन्क, हम्म ओ उहाँक विश्वासीहुँक सब जन पावलह यरूशलेमम जिन जाई कैक बिन्ती कर्ली। १३ तर पावल जवाफ देल, "तुह काजे असिक रो-रोक म्वार मनह दुखित बनादेहटो? प्रभु येसूक लाग त, यरूशलेमम कैदम पर्ना केल नैहोक, मै मुना फे तयार बाटु।" १४ हम्म हुँकहीन मनाइ नैसेक्ली त "प्रभुक इच्छा पूरा ह्वाए" कैक चूप लगली।

१५ तबदोस्र हम्म सरसामान तयार पर्ली ओ यरूशलेमओर लगली। १६ हमारसँग कैसरियक कुइ-कुइ विश्वासीहुँक फे गैल। हुँक हमन साइप्रस टापूसे आइल मनासोन कना एकठो पुरान विश्वासीक घरम बैठक लाग लैगैल।

पावल यरूशलेमम यहूदी-हक शुद्ध हुइना कामम सहभागी हुइल

१७ हम्न यरूशलेमम पुगली त, उहाँक विश्वासीहुँकर हमन खुशीसे स्वागत कर्ल। १८ द्वासर दिन हम्न पावलकसँग याकूबह भेटाए गेली। उहाँ यरूशलेम मण्डलीक सब रेखदेख करुइयन जम्मा होरलह। १९ हुँकन नमस्कार कैक, पावल अप्न अयहूदी-हक बीचम खुशिक खबर प्रचार करबेर परमेश्वर कसिन-कसिन काम कर्ल, सब बात एक-एक कैक बयान कैदेल।

२० यी सुन्क हुँकर परमेश्वरक प्रशंसा कर्ल। तबदोस्र हुँकर पावलह कल, "हेरी भाइ, यिहाँ फे हजारौँ यहूदीहुँकर प्रभु येशूकम विश्वास कैरख्ल, ओ व्यवस्थम लिखल बात फे गम्भीर रूपले मन्ठ। २१ हुँकर अप्नक बारेम फे थोरबहुत सुनरख्ल। उ का हो कलसे, अयहूदी-हक समाजम बैठना यहूदीहुँकन अप्न 'मोशक देहल व्यवस्था पालन कर नैपरट्, लर्क-हक खतना कर नैपरट् ओ यहूदी रीतिभाँती कुछु मान नैपरट्' कैक सिखैठी हुँ। २२ अप्न यिहाँ यरूशलेमम आरली कैक हुँकर पक्क फे सुनुइयाबाट। आब हम्न का करी? २३ उहओसेँ हमार कहल मानी। शुद्ध हुइना भाकल करल

मनै यिहाँ हमारसँग चार जन बाट। २४ हुँकन लेक मन्दिरम जाइ ओ शुद्ध हुइना कामम सँगसँग सहभागी हुई। हुँक-हक शुद्ध हुइना कपार खौरबेर लगना खर्च फे अप्न तिरदी। असिक अप्नह व्यवस्था पालन करल देख्क अप्नक बारेम फैलल् हल्ला सब भुट हो कैक सब जन थाहाँ पैहीं। २५ अयहूदी विश्वासी-हक हकम भर, हुँकर पालन कर पर्ना बात 'मूर्तिपूजा करल अशुद्ध चिज जिन खैहो, केकरो रगत जिन खैहो, घ्याँचा डाब्क मुवाइल पशुक शिकार जिन खैहो ओ अनैतिक क्रियाकलाप जिन करहो' कैक हम्न चिठीम लिख्क पठारख्ली।"

२६ द्वासर दिन पावल उ चारजहन लैजाक हुँक-हक सँगसँग शुद्ध हुइना कामम सहभागी हुइल। तबदोस्र ऊ शुद्ध हुइना भाकल पूरा कैक हरेकजन्हक लाग बलि चहैना दिनिक जानकारी पुजेहोह देहक लाग मन्दिरम गैल।

यहूदीहुँकर पावलह पिटबेर सेनापति हुँकहीन पक्रल

२७ शुद्ध हुइना कामक सात दिन पूरा हुइ-हुइ करटह। तब एशिया क्षेत्रसे आइल कुछु यहूदीहुँकर पावलह मन्दिरम देख्ल। हुँकर मनै-हक भीडह सुज्याक हुँकहीन पक्रल, २८ ओ

एकदम बरा सोरले कह लगल,
 "इसाएलीहुँक्र, सहायता करो! हमार
 जातिक विरोधम सारा दुनियक मनैन
 प्रचार करुइया, ओ मोशक व्यवस्था
 पालन कर नैपरट् कैक सबजहन
 कटी नेङ्गुइया यह मनैया हो।
 अत्र केल नैहोक, यी अयहूदीहुँकन
 मन्दिरम आन्क पवित्र ठाउँह समेत
 अपवित्र बनादेराखल।" २६ (हुँक्र काजे
 असिक कल कलसे, हुँक्र पावलह
 ओ त्रोफिमसह यरूशलेम शहरम सँग
 रहल देखरखलह। त्रोफिमस एफिसस
 शहरक अयहूदी मनैया रलह। पावल
 पक्क फे उह मनैयह मन्दिरभित्त
 लैगिल कैक हुँकन लगलन।)

३० तब सारा शहरम तहल्का
 मचगैल्, ओ मनै चारीओसे दगुटी
 आगैल। हुँक्र पावलह पक्रल ओ
 घँस्यैटी मन्दिरमसे बाहार निक्रैल,
 ओ मन्दिरक गेट डामडुम लगादेल।
 ३१ हुँक्र त पावलह सिध्यादेना
 हिसाबम लागल रलह। तब सारा
 यरूशलेमम हूलदंगा मचगैल् कैक
 रोमी पल्टनक सेनापतिकठे खबर
 पुगैल्। ३२ ऊ तुरुन्त सिपाहीन ओ
 कप्तानहुँकन लेक मनैन्हक भीडओर
 दगुटी अइल। भीडक मनै सेनापति
 ओ सिपाहीहुँकन आइट् देखल त,
 पावलह पिट छोरल।

३३ तब सेनापति पावलह पक्रल
 ओ सिपाहीन दुइठो सिक्कीले हुँकहीन
 बान्ध लगैल। ऊ मनैन पुछ्ल, "यी
 के हो? यी का बिगार करल?"
 ३४ भीडमसे घाँटीक नस फुला-फुला
 कुइ कुछु कल, कुइ कुछु कल।
 तहल्का मचलक कारण सेनापति
 सत्य बात का हो कैक थाहाँ पाइ
 नैसेकल त, पावलह ब्यारेकम लैजैना
 आदेश देल। ३५ जब पावल ब्यारेकम
 जैना भयङ्गवा चिउहलगल, तब
 तहल्का मचुइयन अत्रा जोश्यागैल,
 कि सिपाहीहुँक्र पावलह कन्धेम
 बोक्क लैजाइपर्लन। ३६ भीडक
 मनैजुन 'पावलह, सिध्यादेओ!
 सिध्यादेओ!!' कैक पाछपाछ करसे
 नारा लगाइटलह।

पावल अप्न कसिक खीष्टीयन हुइल कैक मनैन कल

३७ सिपाहीहुँक्र पावलह ब्यारेक-
 भित्त छिराइलगल त, ऊ सेनापतिह
 ग्रीक भाषम कल, "हजूर, मै कुछु
 ब्वाल पैम कि?"

ऊ कल, "का टैं ग्रीक भाषा
 जन्ट्या? ३८ का टैं कुछ समय आघ
 विद्रोह मचुइया ओ चार हजार
 आतंकवादीन उजार-ठाउँम लैजुइया
 मिश्र देशक नेता नैहुइट्या?"

३६ पावल जवाफ देल, "मै कहाँ हुइम? मै त किलिकिया क्षेत्रक टार्सस शहरम जर्मल यहूदी हुइदुँ। मै चानचुन्या शहरक मनैया नैहुइदुँ। बिन्ती बा, यी मनैन्हक आघ कुछु बोल्ना मै अनुमति पाउँ।"

४० सेनापतिसे अनुमति पैल त, पावल भयङ्गम ठह्याक हाँठले मनैन शान्त हुइना इशारा कर्ल। भीडक मनै एकदम शान्त हुइल त, ऊ हुँकन्हक आपन हिब्रू भाषम ब्वाल लगल।

२२ १ "आदरणीय जनसमूदाय, सबजन्हक सामुनेम, मै आपन बचाउक लाग ब्वालदुँ, म्वार बात सुनी।"

२ हुँक पावलह हुँकन्हक आपन हिब्रू भाषम ब्वालट् सुन्ल त, सब जन चूप लगल।

३ पावल कल, "मै किलिकिया क्षेत्रक टार्सस शहरम जर्मल यहूदी हुइदुँ, ओ यहि यरूशलेम शहरम हुर्कनहुँ। गुरु गमलिएलस महिह हमार पुर्खनसे चलती आइल यहूदी व्यवस्थमक एक-एक बात सिखारखल। आज अप्णहुँक परमेश्वरक आदर कर्ना कामम जत्रा उत्साहित बाटी, मै फे ओत्रह उत्साहित रनहुँ। ४ "मुक्तिक डगर"म लागल मनैन मै सतैनासम सतैनु।

कुइ-कुइ त मुवावा फे पैल। का पुरुष, का महिला, मै जेहीह भेटाउँ ओइहेह पकर्क भयालखानम डारदिउँ। ५ यी बात सत्य हो कैक प्रधान पुजेह्वा ओ महासभक सारा सदस्यहुँक फे कह सेकठ। मै उहाँहुँकनसे दमस्कस शहरक यहूदीहुँकन सम्बोधन करल एकठो चिठी फे पारखनहुँ। उ चिठीम मै उहाँ रहल विश्वासीहुँकन पकर्ना ओ हुँकन सित्रिले बाहान्क यरूशलेमम अन्ना, ओ हुँकन सजाय देह पैना अधिकार पारखनहुँ।

६ "मै जाइट्-जाइट् दमस्कसक लगघ पुगारनहुँ, दिनक लगभग दुपहर रहल हुई, तब एकचोट्टे आकाशमसे बरा ज्योति म्वार आञ्जरपाञ्जर चम्कल। ७ मै नेङ्गटी-नेङ्गटी भुइँयम गिरगैनु ओ असिक कहट् सुन्नु, 'शाऊल, शाऊल, काजे दुँ महीह सँताइटो?'

८ मै पुछ्नु, 'प्रभु, अप्ण के हुइटी?'

उहाँ कल, 'मै नासरत शहरक येशू हुइदुँ, जेहीह दुँ सँताइटो।' ९ म्वारसँग रहुइयन अजरार देखल, तर महीसे बोलुइयक बात नैबुभल।

१० "मै कनु, 'हे प्रभु, आब मै का करूँ?'

प्रभु महीह कल, 'उठ्क दमस्कस शहरम जाओ, ओ टुँहार कर पर्ना

काम मै उहँ कहम्। ११ ज्योति करसे चम्कलक कारण मै कुछु फे द्याख नैसेकुनु। तब म्वारसंग रहुइयन महीह डोज्यैटी दमस्कसम लैगिल।

१२ "दमस्कसम हननिया नाउँ रहल एकठो मनैया रलह। ऊ एकदम मोशक व्यवस्थाअनुसार चलँट ओ सब यहूदीहुँक हुँकाहार आदर करँट। १३ ऊ म्वारठे आक पञ्ज ठहेइल, ओ महीह कल, 'शाऊल भाइ, फेदोस देख्नाहा होजाओ।' ऊ अत्रा कटीकि मै हुँकहीन देख्दरुनु।

१४ "ऊ कल, 'हमार पुख्न्हक परमेश्वर तुँ उहाँक इच्छा जानक लाग, धर्मी येशूह द्याखक लाग, ओ उहाँक बोली सुनक लाग तुहीन रोजरख्ल। १५ काकरकि तुँ उहाँक साक्षी होक आपन द्याखल ओ सुनल बात सबजहनसे बटोइबो। १६ आब काजे ढील कर्ना? उठो ओ बप्तिस्मा लेओ। ओ येशूसे बिन्ती कैक आपन पाप धोमाङ्गो।'

१७ "मै उहाँसे यरूशलेमम गैनु, ओ एक दिन मन्दिरम प्रार्थना कर्तीकर्ती मै ध्यान-मग्न हुइल् ब्याला १८ येशू महीह असिक कहट मै देख्नु, 'यरूशलेमसे भट्ट जाजाओ, काकरकि म्वार बारेम टुहार कहल बात यिहाँक मनै सुनुइया नैहुइट।'

१९ "मै कनु, 'हे प्रभु, मै हरेक सभाघरम जाक अप्णकम विश्वास करुइयन भ्यालखानम डर्लक ओ पिट्लक बात सबजहन थाहँ बाटन। २० अप्णक साक्षी बकुइया स्तिफनसक हत्यम म्वार फे पूरा सहमति रह। मै फे ओठहँ ठह्याइल रनहुँ ओ हुँकाहार हत्या करुइयन्हक लुगा कुरटनहुँ।

२१ "तब प्रभु महीह कल, 'जाओ, मै तुहीन अयहूदीन्हकठे धेर दूर-दूरसम पठैम।'

पावल सेनापतिह "मै त जर्मटिहीक रोमी नागरिक हुइदुँ" कल

२२ अत्रा कहटसम केल भीडक मनै पावलक बात सुनल, ओ चिच्यैटी कहलगल, "असिन मनैयह, मुवैही परी! यी बँचना योग्यक नैहो!"

२३ हुँक आपन-आपन लुगा ओ धूर उरैटी चिच्यैटीरल। २४ यी देख्क सेनापति पावलह ब्यारेकभित्तर लैजाक करसे कोर्ना लगैना आदेश देल। ओसिक कोर्ना लगैलसे पावल आपन करल अपराध स्वीकार करी ओ भीडक मनै काजे ओसिक भोँक्यारल कैक पत्ता लगाइ सेकजाई कना हुँकाहार आशा रलहन। २५ सिपाहीहुँक कोर्ना लगाइक लाग

हुँकहीन बान्ध लगल त, पावल ओठे ठह्याइल एकठो कप्तानह पुछ्ल, "का रोमी नागरिकह दोषी बिना ठहैल कोर्रा लगैना ठीक हो?"

२६ कप्तान यी सुन्ल त, सेनापतिकठे जाक कल, "अपन का करक लाग बाटी? उ मनैया त रोमी नागरिक हो!"

२७ तब सेनापति पावलकठे जाक पुछ्ल, "का तुँ रोमी नागरिक हुइटो?"

पावल कल, "हुइटुँ।"

२८ सेनापति कल, "मै फे रोमी हुइटुँ, तर यी नागरिक हक पाइक लाग मै धेर रुप्या तिर्नहुँ।"

पावल कल, "मै त जर्मटिहीक रोमी नागरिक हुइटुँ।"

२९ यी बात सुन्टीकि, पावलह सोधपुछ करक लाग तयार हुइल् सिपाहीहुँक्र पाछ हट्ल, ओ सेनापति फे डरैल काकरकि पावलह बाहान्क कोर्रा लगैना आदेश उह देलह।

सिपाहीहुँक्र पावलह बल प्रयोग कैक यहूदी महासभामसे ब्यारेकम लैगिल

३० द्वासर दिन सेनापति मुख्य पुजेहोन ओ महासभक सारा सदस्यन सभम बलैल। ऊ खास समस्या पत्ता

लगाइ चाहल रलह। उहओसे ऊ बान्धल पावलह छोर्क सभम हाजिर करैल।

२३

पावल महासभओर एकटक लगाक हेर्ल, ओ कल, "हेरो भैयौ, मै आजसम परमेश्वरक नजरम शुद्ध मनले जीवन बितारख्नु।" २ यी सुन्क प्रधान पुजेह्वा हननिया पावलक लगघ ठह्याइल मनैन हुँकाहार मुहम ठोक्ना आदेश देल। ३ तब पावल हुँकहीन कल, "तुँ कपटी! तुहिन परमेश्वर ठोकुइयाबाट। तुँ कसिन न्यायाधीश हुइटो? तुँ त व्यवस्था अनुसार न्याय करक लाग बैठरलो। तर महीह ओसिक ट्वाकक् लाग आदेश देक अपन्हे व्यवस्था भङ्ग कर्तो!"

४ पावलक लगघ ठह्याइल मनै कल, "का तँ परमेश्वरक नियुक्त करल प्रधान पुजेहोक अपमान कर्त्या?"

५ पावल कल, "भैयौ, उहाँ प्रधान पुजेह्वा हुइट कैक मै नैचिन्लरनहुँ। काकरकि 'तँ आपन मनैन्हकम शासन करुइयक विरोधम खराब बात जिन ब्वालस्' कैक लिखल बात म्वार लाग थाहाँ बा।"

६ जब पावल उ महासभम एक दल सदुकीहुँक + ओ और दल फरिसीहुँक बाट कैक थाहाँ पैल, तब ऊ बरा बोलीले कल, "हेरो भैयौ, मै एकठो फरिसी हुइटुँ ओ म्वार पूर्खाओं फे फरिसी जो रलह। मुवल मनै फेदोस जीजैहीं कना म्वार आशा रलक कारण यिहाँ म्वार मुद्दा चलल् बा।" ७ पावलक कहल यी बातले फरिसी ओ सदुकीहुँक-हक बीचम भग्ना हुइलन, ओ सभम फुट हुइल्। ८ काकरकि सदुकीहुँक मनै मुलसे फेदोस जीना बातम विश्वास नैकरँट, ओ स्वर्गदूत या आत्मा नैहो कहँट। तर फरिसीहुँकजुन यी सब बातम विश्वास करँट।

६ यी बातले महासभम हल्लाखल्ला मचगैल्। फरिसी दलक कुइ-कुइ धर्मगुरुहुँक ठह्याक सदुकी-हक विरोध कर्टी कह लगल, "हम्र त यी मनैयक कुछु गलती नैदेख्ती। यदि आत्मा या स्वर्गदूत यहीसे बोल्लह कलसे फे, का हुइल् त?" १० हुँक-हक बीचम अत्रा चर्काचर्की परगैलन, कि हुँक पावलह छिड्डीछिड्डी पारडरहीं कैक सेनापति डरागैल। उहओसे ऊ सिपाहीहुँकन पावलह बल प्रयोग कैक

हुँक-हक बीचमसे ब्यारेकम लैजैना आदेश देल।

११ उ रात प्रभु पावलकठे देखपल ओ कल, "हिम्मत जिन हारो, पावल, यिहाँ यरूशलेमम टुँ म्वार बारेम जसिक साक्षी बकलो, रोमम फे टुँ म्वार बारेम ओसहँक साक्षी बकपर्ठा।"

कुछ यहूदीहुँक पावलह मुवैना योजना बनैल

१२ बिहान हुइल् त कुछ यहूदीहुँक पावलह मुवैना योजना बनैल। हुँक "हम्र पावलक हत्या नैकरट्सम ना कुछु खैबी, ना कुछु पिबी" कैक किज्या खैल। १३ पावलह मुवाइक लाग योजना करइयन चालीस जनसे फे धेर रलह। १४ हुँक मुख्य पूजेहोन ओ और अगुवन्हकठे जाक कल, "हम्र पावलक हत्या नैकरट्सम ना कुछु खैबी, ना कुछु पिबी कैक किज्या खारल्ली। १५ आब अप्नहुँक ओ महासभक और सदस्यन मिल्ल सेनापतिह 'हम्र पावलह थप सोधपुछ कर चाहटी' कैक ओहीह ब्यारेकमसे भिकाई। ऊ अइटी-अइटी हम्र डगरीहम ओहीह सिध्यादेहुइयाबाटी।"

+ २३.६ सदुकी: सदुकीहुँक धर्मक हिसाबले यहूदी रलह, तर हुँक राजनीतिम फे हाँठ डाररखलह (प्रेरित ५:१७-४२)। असिक हुँक धेर जसिन धार्मिक मामिलम ध्यान देना फरिसीहुँकनसे फेरक रलह। जनसंख्यक हिसाबले सदुकीहुँक फरिसीनसे कम रलसे फे, हुँक धनी-धनी रलह ओ समाजम हुँक-हक प्रभाव धेर रलहन काकरकि धेरजसिन बराबरा पैदम हुँक-हक बाहुल्यता रलहन। थप जानकारीक लाग "सदुकी" शब्दक अर्थ हेरी।

१६ पावलक भैनावाजुन पावलह मुवैना हुँकन्हक योजना थाहाँ पाडर्ल। उहओर्से ऊ ब्यारेकम जाक यी बात पावलह जनादेल।

१७ पावल तुरुन्त एकठो कप्तानह बलाक कल, "सेनापतिह आबहँ जनाइपर्ना हिँकाहार एकठो बात बाटन, हिँकहिन उहाँकठे पुगादी।"

१८ कप्तान पावलक भैनावह सेनापतिकठे लैगिल ओ कल, "कैदम परल पावल महीह बलाक 'सेनापतिसे बिन्ती करपर्ना हिँकाहार एकठो बात बाटन, हिँकहिन उहाँकठे पुगादी' कलकओर्से मै यहीह अप्नकठे आनरख्नु।"

१९ सेनापति वाकर हाँठ पकर्क एकओँहर लैगिल ओ पुछ्ल, "तँ महीह का कहक लाग बाट्या?"

२० पावलक भैनावा कल, "यहूदीहुँक्रे पावलह थप सोधपुछ कर्ना बहाना बनाक काल हुँकहीन महासभम फिकाइक लाग अप्नसे बिन्ती करुइयाबाट। २१ तर अप्न हुँकन्हक कहल जिन मन्बी, काकरकि चालीससे फे धेर मनै 'हम्र पावलक हत्या नैकरट्सम ना कुछु खैबी, ना कुछु पिबी' कैक किज्या खारख्ल। हुँक्रे पावलह मुवाइक लाग नुकल बाट, ओ अप्न सहमति जनादेबी कना आशम बाट।"

२२ यी सुन्क सेनापति पावलक भैनावह "तँ महीह यी खबर देहल बात किहुह जिन कहस्" कैक कल ओ ओहीह पठादेल।

सेनापति पावलह सिपाहीन्हकसँग कैसरियम पठैल

२३ तबदोस्र सेनापति दुइ जन कप्तानहुँकन बलाक कल, "दुइ सय जन सिपाहीन, सहत्तर जन घोडचढी सिपाहीन ओ दुइ सय जन भाला बोक्ल सिपाहीन तयार पारो। हुँक्रे आज रात नौ बजेओर कैसरिया शहरम जाइक लाग तयार हुइपर्ता। २४ पावलक लाग फे घोन्वक व्यवस्था कैदेहो, ओ ओहीह सुरक्षासहित बडाहाकिम फेलिक्सकठे पुगादेहो।"

२५ तबदोस्र सेनापति बडाहाकिम फेलिक्सह यी चिठी लिख्ल:

२६ "माननीय बडाहाकिम फेलिक्स ज्यू, मै क्लौडियस लुसियसक नमस्कार!

२७ पावल कना यी मनैयह यहूदीहुँक्रे पक्रलह ओ मुवादेहक लाग रलह। तर यी त रोमी नागरिक हो कैक जब मै थाहाँ पैनु, तब मै सिपाहीहुँकन बल प्रयोग कर लगाक यहीह हुँकन्हक हाँठमसे छुटैनु। २८ हुँक्रे

काजे यहीह दोष लगाइट कैक पत्ता लगाइक लाग मै यहीह हुँकन्हक महासभम हाजिर करैनु।^{२६} तर यहीह मृत्युदण्ड देहपर्ना या कैद करपर्ना किसिमक अपराध करल मै कुछु नैपैनु। हुँक्रे आपन व्यवस्थक विषयम यहीह दोष लगाइरल्लह।^{३०} यहूदीहुँक्रे यहीह मुवैना योजना बनारल्ल कैक मै थाहाँ पैनु। उहओसे मै तुरुन्त यहीह अप्नकठे पठारल्लु। यहीह दोष लगुइयन फे अप्नकठे जो उजुर करहो कैक मै कैरल्लु।"

^{३१}सिपाहीहुँक्रे सेनापतिक आदेश अनुसार पावलह उह रात एन्टिपाट्रिस शहरम पुगादेल।^{३२} द्वासर दिन, पैदल गैल् सिपाहीहुँक्रे ब्यारेकम घुम्ल ओ घोडचढी सिपाहीहुँक्रे पावलह कैसरियम लैगिल।^{३३} घोडचढी सिपाहीहुँक्रे कैसरियम पुगल त, सेनापतिक लिखल चिठीसहित पावलह बडाहाकिमक आघ हाजिर करैल।^{३४} बडाहाकिम चिठी पहरक सेक्ल त, पावलह पुछ्ल, "टुँहार घर कहाँ हो?" पावल कल, "किलिकिया क्षेत्रम बा।"^{३५} बडाहाकिम कल, "टुहीन दोष लगुइयन यिहाँ अइहीं त, टुहार मुद्दा मै अपन्हे हेरम", ओ पावलह हेरोदक दरबारम थुन्लरहहो कैक हुकुम देल।

पावल आपन बचाउक लाग

बयान देल, तर फेलिक्स

हुँकाहार न्यायम आलटाल कर्ल

२४

पाँच दिनपाछ प्रधान पुजेह्वा हननिया कुछ यहूदी अगुवन ओ तर्तुल्लस नाउ रहल एकठो वकीलह लेक कैसरियम अइल। हुँक्रे सब जन मिल्क पावलक विरोधम बडाहाकिमक आघ उजुर कर्ल।^२ पावल हुँकन्हक सामुन्नेम भिकागैल त, तर्तुल्लस पावलह दोष लगाइक लाग बडाहाकिमह कहलगल, "माननीय फेलिक्स, हजुर शासन कर्लक कारण हम्न यहूदीहुँक्रे सुखशान्ति पैलबाटी, ओ अप्न हमार लाग बुद्धिले धेर सुधारक काम कैदेरल्ली।^३ यी बात, हजुर, हम्न महसुस कैरल्ली ओ यी बातम हम्न अप्नक ऋणी फे बाटी।^४ मै धेर समय लेह नैचाहटुँ, तर छोट्करीम बिन्ती चहाइचाहटुँ, दया कैक सुनी।

^५"हम्न यी मनैयह जहोरँतहोरँ दुख देहुइया ओ संसारभरिक यहूदीहुँकन्हक बीचम आन्दोलन करुइया व्यक्तिक रुपम भेटारल्ली। ओ 'नासरी' कना दलक अगुवा यिह हो।^६ यी मनैया मन्दिरह अपवित्र पर्ना फे कोसिस करटह, तर हम्न यहीह पकडली। [हम्न आपन व्यवस्थाअनुसार यहीह कारवाही करक लाग रलही।^७ तर सेनापति

लुसियस अपन्हे आक यहीह हमार हाँठमसे जबरजस्ती अछिन्क लैगिल, ^८ओ हमन हजूरक सामुन्नेम उजूर कर्ना आज्ञा देल।]+ आब हजूर अपन्हे याकर छानबीन कैक हमार करल उजूरक सत्य बात पत्ता लगाइ सेकठी।"

९ओठे रहल यहूदीहुँकर तर्तुल्लस पावलह दोष लगाइल बात सत्य हो कैक कल।

१०बडाहाकिम पावलह बोल्ना इशारा देल त ऊ बवाल लगल, "हजूर, धेर वर्षसे यहूदी जातिन्हक न्यायाधीशक रूपम काम कर्लक बात महीह थाहाँ बा। उहओसे मै खुसिसे आपन बयान देहटुँ। ११मै यरूशलेमक मन्दिरम परमेश्वरक आराधना कर गैलक बाह्र दिनसे धेर नैहुइल हो। यी बात हजूर एकदम सजिलोसे पत्ता लगाइ सेकठी। १२हिँकर ना त महीह मन्दिरम किहुसे वादविवाद करट् भेटैल, ना सभाघरम अथवा शहरम मनैन हूलदङ्गा मच्चाइक लाग उक्साइट् भेटैल। १३महीह आब दोष लगाइल बातक प्रमाण फे हिँकन्हकठे नैहुइटन। १४मै हजूरक सामुन्नेम का कहटुँ कलसे, मै 'मुक्तिक डगर'म विश्वास कर्तुँ। हिँकर यी बातह

भुट हो कठ। तर मै आम्ही फे यहूदी व्यवस्था ओ अगमवक्तन्हक किताबम लिखल सारा बातम विश्वास कैक आपन पुर्खासे मन्टीआइल परमेश्वरक आराधना कर्तुँ। १५परमेश्वर धर्मी ओ अधर्मी मनैन मुवलमसे जीयादेहुइयाबाट कैक हिँकर आशा कर्ठ, ओ मै फे यिह बातक आशा कर्तुँ। १६उहओसे मै परमेश्वर ओ मनैनहक नजरम शुद्ध विवेकले जीवन बितैना कोसिस कर्तुँ।"

१७"दूर-दूर रलक कुछ साल पाछ मै आपन जातिक मनैनहक लाग दान ओ परमेश्वरह चहैना भेटी लेक यरूशलेमम आरनहुँ। १८हिँकर महीह मन्दिरम भेटाइल समयम मै शुद्ध हुइना विधि पूरा कैसेकरखनहुँ। उहाँ ना त भीडभाड रह, ना हूलदङ्गा रह। १९तर एशिया क्षेत्रक कुछ यहूदीहुँकर भर रलह। यदि हुँकन्हक म्वार विरोधम कहपर्ना कुछु बात रलहन कलसे, हुँकर यिहाँ हजूरक सामुन्नेम हाजिर हुइपर्ना रलहन। २०अथवा यहूदी महासभक मनै महीह का अपराध करल दोषी ठहैलह, उ बात अठे रहुइयन सामुन्नेम कहहीं ना। २१'मुवल मनै फेदोस जीजैठ कना बातम मै विश्वास कर्लकओसे यिहाँ म्वार मुदा चलल्

+ २४.८ ग्रीक भाषक कौनो-कौनो स्रोतम ६ पदक द्वासर भागसे लेक ८ पदक पैलह भाग सम बा। तर सबसे धेर भरपर्ना स्रोतम यी खण्ड नैह। उहओसे यिहाँ कोष्टम [] लिखल बा।

बा' कैक मै एकचो बरा सोरले कनहुँ।
यी बाहेक और कौनो बातम फे हिँक्र
महीह दोष लगाइ सेकुइया नैहुइत।"

२२ 'मुक्तिक डगर'क बारेम
फेलिक्स मजासे जानरख्लह।
उहओसे ऊ अत्रा बात सुनल त, उ
दिनिक बहसह स्थगित कर्टीहुँकन
कल, "सेनापति लुसियस यिहाँ अइहीं
त मै टुन्हक मुद्दा फैसला कैदेहम।"
२३ ऊ कप्तानह आज्ञा देल, 'जेलम
पावलह हेटीरहहो, तर हुँकहीन कुछ
स्वतन्त्रता देहहो, ओ हुँकहीन भेटघाट
कर अइना ओ आवश्यक परल चिज
पुगादेना मनैन रोकटोक जिन करहो।'

२४ कुछ दिनपाछ फेलिक्स यहूदी
जातिक आपन गोसिन्या दूसिल्लह
लेक अइल। ऊ पावलह बलापठैल
ओ येशू ख्रीष्टकम विश्वास कर्ना
बारेम पावलक मुहसे सुनल। २५ जब
पावल परमेश्वरक नजरम मनै
ठीक जीवन जीएपर्ना, अनुशासित
हुइपर्ना ओ परमेश्वर मनैन्हक
न्याय कर्ना दिन अइटीबा कैक
बटोइल, तब फेलिक्स डरागैल, ओ
कल, "आजट्याका होगैल, आब
जाइ सेकठो, मौका परी कलसे मै
टुहिन फेदोस बलैम।" २६ पावल घूस
देडठ कि कैक फेलिक्स आशा फे
कैरख्लह। उहओसे ऊ पावलह

घरीघरी बलाइपठाइँट ओ हुँकहीनसे
बातचित करँट।

२७ असिक दुइ वर्ष बितगैल।
तबदोस फेलिक्सक ठाउँमा पर्किअस
फेस्तस बडाहाकिम हुइल। फेलिक्स
यहूदीन्हक समर्थन पैटीरना आशाले
पावलह भयालखानम रहन्देल।

पावल आपन न्याय रोमी शासक
कैसरसे हुइपर्ना बात फेस्तसह कल

२५ फेस्तस कैसरियम आक
आपन लौव पदभार
सम्हल्लक तीन दिन पाछ यरूशलेम
गैल। २ मुख्य पूजेहोन ओ कुछ यहूदी
अगुवन उहाँकठे पावल दोषी रलक
बात बटोइल। ३ हुँक्र पावलह डगरिहेम
सिध्यादेना उदेश्यले यरूशलेमम
सारमाङ्गक लाग फेस्तसक आघ
बिन्ती कर्ल। ४ फेस्तस हुँकन कल,
"पावल कैसरियम जेलम बा, ओ मै फे
हाली उहाँ घुमजाईकठु। ५ टुह्ममध्येम
कुछ अगुवन म्वारसँग जैहीं ओ यदि
पावल खराब काम कैराखल कलसे,
हुँक्र वाकर विरोधम उहाँ उजूर कर
सेकठ।"

६ फेस्तस आठ-दश दिन पाछ
कैसरिया घुम्ल। द्वासर दिन ऊ
अदालतम न्याय-आसनम बैठक
पावलह हाजिर करैना हुकुम देल।

७ पावल अइल त यरूशलेमसे आइल यहूदीहुँक हुँकाहार चारीओर जम्मा हुइल, ओ हुँकहीन गम्भीर बातक अनेकौँ दोष लगैल। तर हुँक कौनो दोषक फे प्रमाण देह नैसेकल।

८ तब पावल आपन बचाउक लाग कल, "मै ना त यहूदीन्हक व्यवस्थक विरोधम, ना त मन्दिरक विरोधम, ना त रोमी सरकारक विरोधम कुछु अपराध कैरख्नु।"

९ फेस्तस यहूदीहुँकन खुशी पर्ना उदेश्यले पावलह कल, "मै टुहिन यरूशलेमम पठैम, ओ टुहार मुद्क फैसला मै उहँ कैदेहम। असिक कर्लसे कसिन हुई?"

१० तर पावल जवाफ देल, "नाहीं! रोमी अदालत त यहि हो। म्वार मुद्क फैसला यहँ हुइ परी। मै यहूदीन्हक कुछु खराबी नैकर्लहुइटु कना बात अपनक लाग सब थाहाँ बा। ११ यदि मै मृत्युदण्ड पैना कुछु अपराध कैरख्नु कलसे, मै मुना फे तयार बाटु। तर यदि हुँकन्हक लगाइल दोष सत्य नैहुइटन कलसे, महीह मुवाइक लाग हिँकन्हक हाँठम सुम्पना अधिकार केकरो फे नैहो। मै रोमी शासक कैसर म्वार न्याय कैदेहीं कैक बिन्ती करटु।"

१२ तब फेस्तस आपन सल्लाहकार-हुँकनसे सरसल्लाह कर्ल ओ पावलह कल, "टुँ रोमी शासक कैसरक आघ

बिन्ती कर्लो। उहओसे आब मै टुहिन रोमी शासककठे पठैम।"

फेस्तस पावलक बारेम राजा अग्रिपाससे बात बटोइल

१३ टनिक दिन पाछ फेस्तसह दर्शन करक लाग राजा अग्रिपास ओ हुँकाहार बहिन्या बरनिकी कैसरियम अइल। १४ हुँक उहाँ धेर दिनसम रहल समयम, फेस्तस पावलक मुद्क बारेम राजसे बटोइल। ऊ कल, "फेलिक्सक थुनल एकठो कैदी यिहाँ बा। १५ मै यरूशलेमम रहल समयम, मुख्य पूजेहोन ओ यहूदी अगुवन वाकर विरोधम दोष लगैल ओ ओहीह मृत्युदण्ड देहक लाग महीसे कल।

१६ तर मै हुँकन कनु, 'मनैन दोषी नैठहाइट्सम किहुह फे दण्ड नैदेहपरटु। दोष लगावापाइल मनैया दोष लगुइयन्हक आघ आपन बचाउक लाग बोल्ना मौका पाइपर्ठा। यी रोमी सरकारक नियम हो।' १७ ओहीह दोष लगुइयन यिहाँ अइल त, मै एक्को फे ढील नैकर्नु। मै द्वासर दिन न्याय-आसनम बैटुक पावलह अदालतम हाजिर करैना हुँकुम देनु। १८ तर पावलक विरोधीहुँक उठक ओहीह लगाइल दोषम मै आपन स्वाँचलअस कुछु खराब बातक दोष नैपैनु। १९ हुँकन्हक मुद्दा त हुँकन्हकके धर्मक बारेम ओ येशू कना

मुवल मनैयक बारेम रलहन। पावल उह मुवल येशू फेदोस जीरल कैक जिद्दी कर। २० यी विषयम सत्यतथ्य बात कसिक पत्ता लगैना हो कैक मै अलमलम परल रनहुँ। उहओसे मै ओहीह 'टुहार मुद्दा यरूशलेमम जाक फैसला कर्लसे कसिन हुई' कैक पुछ्नु। २१ तर पावल रोमी शासकद्वारा आपन मुद्दक फैसला हुइपर्ना कैक बिन्ती करल। उहओसे ओहीह रोमी शासककूठे पठैना व्यवस्था नैमिलट्सम मै ओहीह थुन्लरना आदेश देरख्नु।"

२२ तबदोस अग्रिपास कल, "यी मनैयक बात मै अपन्हे सुन पैटु त हुइने रह।"

ओ फेस्तस कल, "अपन काल सुन्बी।"

पावल राजा अग्रिपासक सामुन्नेम आपन बचाउक लाग बोल्ल

२३ द्वासर दिन अग्रिपास ओ बरनिकी भारी सम्मानसहित सभाभवनम अइल। हुँकन्हक संगसंग सेनापतिहुँक ओ शहरक गन्यमान्य व्यक्तिहुँक फे रलह। फेस्तस हुकुम कर्ल त, पावल सभम हाजिर करागैल। २४ फेस्तस कल, "राजा अग्रिपास ओ यिहाँ उपस्थित सब भद्रभलाद्मीहुँक, यी मनैयह हेरी, यिहाँक ओ यरूशलेमक सारा यहूदीहुँक यहीह

मुवैही परी कैक माग कठ। २५ तर म्वार विचारम यी मनैया ज्यानसजाय पैना हिसाबक कुछु खराबी नैकर्ल हो। ओ यी अपन्हे कैसरकठे आपन मुद्दक बिन्ती कर्लकओसे मै यहीह रोमम पठैना विचार कैरख्नु। २६ तर याकर बारेम मै का कैक कैसरह चिठी लिखुँ? यहीह दोष लगैना स्पष्ट कारण त कुछु नैहो। उहओसे मै यहीह अप्नुहुँक सबजन्हक सामुन्नेम, खासकैक, हे राजा अग्रिपास, अप्नुक सामुन्नेम, हाजिर करारख्नु। आब हम्र याकर छानबिन कर्बि त, मै कैसरह चिठी लिख बनी कना आशा कैरख्नु। २७ काकरकि एकठो कैदीक विरोधम लगागैल दोषक कारण स्पष्ट बिना पर्ल ओहीह शासककूठे पठैलसे, वाकर त कुछ अर्थ नैरही।"

अग्रिपास पावलह कल,
२६ "टुँ आपन पक्षम ब्वाल सेकठो।"

तब पावल हाँठ पसार्क आपन बचाउक लाग ब्वाल लगल: २ "हे राजा अग्रिपास, यहूदीहुँक महीह लगाइल सारा दोषक विषयम आज मै हजुरक सामुन्ने आपन बचाउक लाग ब्वाल पैलकम मै अपन्हेह धेर भाग्यमानी सम्भलबाटु। ३ काकरकि यहूदीन्हक सब चालचलन ओ वादविवाद कर्ना बातक बारेम हजूर धेर जन्लबाटी।

आब म्वार बिन्ती बा, म्वार बयान धीरज कैक सुनदी।

४"मै पैल्ह आपन देशम दोस्र यरूशलेमम छोटीहमसे यहूदी समाजम हुर्कलकओसे, यहूदीहुँक म्वार जीवन कसिन रह कैक मजासे जन्ठ। ५मै हमार धर्मक फरिसी कना कट्टर समूहक मनैया रनहुँ। यी बात हिँकन पैल्हहँसे थाहाँ बाटन ओ यदि हिँक चहलसे, यी बात अपन्हे कह सेकठ। ६परमेश्वर हमार पितापुर्खन करल बाचम मै आशा कर्लकओसे आज म्वार मुद्दा यिहाँ चलती बा। ७हे राजा, वास्तवम उह आशम रहक हमार बाह गोत्यारहुँक रातदिन परमेश्वरक आराधना कर्ठ। ओ मै फे उह आशम बाटु। मै उह आशा कर्लकओसे यहूदीहुँक महीह दोष लगारखल। ८परमेश्वर मुवल मनैन फेदोस्र जीयाइसेकठ कना बात काजे अप्णहुँक विश्वास कर्ना गाहो मन्ठी?

९"नासरत शहरक येशूकम विश्वास कर्ना सबजन्हक विरोध कर पठा कैक महीह फे लागल रह। १०मै यरूशलेमम उह विरोध त कर्नु नि। मै मुख्य पूजेहोनसे अधिकार पाक धेर विश्वासीहुँकन भयालखानम डार लगैनु ओ हुँकन मुवैना कामम फे मै सहमत हुइनु। ११मै हुँकन 'आबठेसे मै

येशूकम विश्वास नैकरम' कैक कह लगाइक लाग धेर फ्यारा ठाउँ-ठाउँक सभाघरम सजाय देह लगैनु। मै हुँकनसे रीसले चूर होक और देशक शहर-शहरम फे जाक हुँकन सतैनु।

१२"एक दिन मै मुख्य पुजेहोनसे अधिकार ओ आज्ञा पाक यिह कामक लाग दमस्कस जाइटनहुँ। १३हे महाराज, डगरीम जैटी-जैटी दुपहरक समयम दिनसे फे चहकार ज्योति आकाशमसे मै ओ म्वारसंग रहइयन्हकम चम्कटह, १४ओ हम्न सब जन भुइँयम गिरगैली। तब मै हिब्रू भाषम महीह असिक कहट सुन्नु, 'शाऊल, शाऊल, टुँ महीह काजे सताइटो? टुँ म्वार इच्छक विरोधम चलना त टुहिन जो बठैठा।'

१५"मै कनु, 'हे प्रभु, अप्ण के हुइटी?'

प्रभु महीह कल, 'मै येशू हुइटु, जेहीह टुँ सताइटो। १६आब उठो, मै टुहिन आपन सेवक ओ साक्षी नियुक्त करक लाग टुहारठे देखपर्लक हुइटु। टुँ आपन द्याखल बात ओ भविष्यम मै टुहिन देखैना बात मनैन कह परी। १७मै टुहिन यहूदी ओ अयहूदीन्हकठे पठाइक लाग बाटु। मै टुहिन हुँकनसे छुट्कारा देहुइयाबाटु। १८टुँ हुँकन्हक आँख खोलदेक हुँकन अन्धारमसे अजरारम ओ शैतानक शक्तिमसे

परमेश्वरकठे घुमाइपरी। असिक हुँक म्वारम विश्वास कैक आपन-आपन पापक क्षमा पैहीं ओ परमेश्वरक ज्वाजल मनैन्हक बगालीम स्थान पैहीं।"

१६"उहओसे, हे महाराज अग्रिपास, मै स्वर्गसे आइल उ दर्शनम प्रभुक देखाइल बातक आज्ञाकारी हुइनु।^{२०} मै पैल्ह दमस्कसम, दोस्र यरूशलेम शहर लगायत सारा यहूदिया देशम, ओ अयहूदीन्हकठे फे आपन-आपन पाप स्वीकार करो ओ परमेश्वरकठे घुमो कैक प्रचार कर्नु। ओ असल काम कैक आपन जीवन परिवर्तन हुइलक बात प्रमाणित करो फे कनु।^{२१} यह बात प्रचार कर्लक कारण यहूदीहुँक महीह मन्दिरम पक्रल ओ मुवैना कोसिस कर्ल।^{२२} तर आजसम परमेश्वर म्वार सुरक्षा कर्लबाट। उहओसे मै छोटी-बरा सबजहन साक्षी देटी यिहाँ ठह्याइल बाटु। अवश्य पूरा हुई कैक अगमवक्तन्हक ओ मोशक ब्वालल् वचन बाहेक मै और कुछु नैकलहुइटु।^{२३} अर्थात्, खीष्टह दुख भोगक मुवपरहीन, ओ मुवलमसे फेदोस्र जीनामध्येम पैल्ह व्यक्ति उहँ हुहीं। असिक उहाँ यहूदीहुँकन ओ अयहूदीहुँकन परमेश्वरक ज्योतिक बारेम सिखैहीं।"

^{२४} पावल बोल्टीबोल्टी बीचम फेस्तस बरा सोरले कल, "रै पावल, टैं आब जातसे बौरागैल्या, ट्वार धेर विद्या टोहीह असिन बनाराखल।"

^{२५} पावल कल, "माननीय फेस्तस, मै बौरा नैहुइटु, मै सत्य-सत्य बात बट्वाइटु।^{२६} राजा अग्रिपासह यी सब बात थाहाँ बाटन। यी सब घटनासे उहाँ परिचित हुइलकओसे मै निर्धक्कसे बोल्टीबाटु, काकरकि यी घटना गुपचूपम हुइलक नैहो।^{२७} हे महाराज अग्रिपास, का हजुर अघट्टे अगमवक्तन्हक कहल बात विश्वास कठीं? हजुर विश्वास कठीं कना बात म्वार लाग थाहाँ बा।"

^{२८} अग्रिपास पावलह कल, "का टुँ महीह ख्रीष्टीयन हुइक लाग एक्क घरीम मनाडरम कैक सौँचरख्लो?"

^{२९} पावल जवाफ देल, "चाहा एक्क घरी लाग, चाहा धेर समय लाग, हजूर केल नाहीं, तर यिहाँ उपस्थित सब जन म्वारअस हुइलसे भन मजा हुइनेरह कैक मै परमेश्वरसे प्रार्थना कर्तु। तर म्वार हाँठम लागल यी हतकडींभर अण्हुँकन्हकम जिन लाग।"

^{३०} तब राजा, शासक, बरनिकी ओ और सब जन जज्याकजुरुक उठ्ल।
^{३१} हुँक सभाभवनमसे निक्रटी-निक्रटी

अपन-अपन असिक बट्वाइलग्ल, "यी मनैया मृत्युदण्ड पैना या जेल जैना हिसाबक कुछु अपराध नैकर्लहो।"

३२ अग्रिपास फेस्तसह कल, "यदि यी मनैया 'रोमी शासक कैसर म्वार न्याय कैदेहीं' कैक बिन्ती नैकर्लरहट् त, यहीह छोरदेलसे फे हुइनेरह।"

पावल ओ और जन रोम जाइक लाग पानीजहाजम चिहुर्ल

२७ जब हम्र पानीजहाजम चिहुर्क इटालिया देश जाइपर्ना निर्णय हुइल्, तब पावल ओ और कैदीहुँकर युलियसक जिम्मा लगागैल। ऊ शाही पल्टनक रोमी कप्तान रलह। २ हम्र सब जन एड्रामिटेनोस शहरसे अइलक एकठो पानीजहाजम चिहुर्ली। उ पानीजहाज चलल् ओ एशिया क्षेत्रक समुद्रक किनारम रहल विभिन्न शहर हुइटी जउइया रह। हमारसंग माकेडोनिया क्षेत्रक थेसलोनिके शहरसे आइल अरिस्तार्खस नाउँ रहल एकठो विश्वासी फे रलह।

३ द्वासर दिन हम्र सीदोन शहरम पुग्ली। उ ठाउँम कप्तान युलियस पावलह दया कर्ल ओ हुँकहीन सँघरेन्हकठे जाक भेटघाट कर्ना ओ आवश्यक सहायता लेना अनुमति

देल। ४ उहाँसे हमार पानीजहाज फेदोस चलल्, ओ उल्टाओसे बर्का बयाल बहलक कारण जहाजह आघ जैना कर्ना पर्लस्। उहओसे हम्र बयालसे बचक लाग साइप्रस टापूक ओल्ट-ओल्ट उत्तरओर गैली। ५ हम्र किलिकिया ओ पामफिलिया क्षेत्रक लगघ-लगघ पानीजहाजम यात्रा कर्ती लुकिया क्षेत्रम रहल माइरा शहरम पुग्ली। ६ उहाँ कप्तान युलियस एकठो पानीजहाज भेटैल। उ जहाज अलेक्जेन्द्रिया शहरसे आरलाहा ओ इटालिया देशम जउइया रह। कप्तान हमन उह जहाजम चिउहैल। ७ हमार पानीजहाज धेर दिनसम सुस्त-सुस्त चलल् ओ हम्र बल्ल-बल्ल कनीडस शहरक लगघ पुग्ली। बर्का बयाल उल्टाओसे बहटीरलक कारण हम्र आघ जाइ नैसेक्ली। उहओसे हम्र दखिनओर लग्ली ओ क्रेट टापूक ओल्ट-ओल्ट, सालमोने कना ठाउँक पञ्ज-पञ्ज गैली। ८ हम्र धेर मुस्किलसे टापूक किनार-किनार हुइटी लासिया शहरक लगघ रहल 'सुन्दर बन्दरगाह'+ कना ठाउँम पुग्ली।

९ उ ठाउँम पुगट्-पुगट् त धेर समय बितरलाहा, यिहाँसम कि ब्रत रना विशेष दिन समेत बितरलाहा।

+२७.८ बन्दरगाह: बन्दरगाह कलक पानीजहाज रोकना समुद्रकिनारक ठाउँ अर्थात् पानीजहाजक स्टेसन हो। थप जानकारीक लाग "बन्दरगाह" शब्दक अर्थ हेरी।

समुद्रम आँधीबौखा अइना मौसम हुइलकओसे पानीजहाजक यात्रा फे खतरा होरलाहा। उहओसे पावल हुँकन असिन चेतावनी देल, १० "हेरी संघारीहुँक, महीह का लागटा कलसे, यदि हम्र आघ जैना हो कलसे, जहाज ध्वस्त हुइना ओ मालसामान नोकसान हुइना केल नाहीं, तर हमार जीउ-ज्यान समेत जैना डर बा।" ११ तर कप्तान पावलक बात नैमन्ल। बेनसे उ जहाज चलुइएक ओ जहाजक मालिकक् कहल मन्ल। १२ 'सुन्दर बन्दरगाह' हिउँद बिताइक लाग सुरक्षित ठाउँ नैरलकओसे जहाजक धेर जन जसिक हुइलसे फे फोनिक्स शहर नैपुगक नैहुई कह लगल। काकरकि फोनिक्स दखिन-पश्चिउँ ओ उत्तर-पश्चिउँओर केल खुला रहल क्रेटक एकठो पानीजहाज रोक्ना ठाउँ रह ओ उहँ जाक हिउँद बितैना हुँकन्हक विचार रलहन।

समुद्रम आँधीबौखा अन्धाधुन्द आगैल्

१३ दखिनओरसे बयाल सुस्त-सुस्त बह लागल त, हुँक 'आब हम्र फोनिक्स पुग सेक्ठी' कैक विचार कर्ल। उहओसे हुँक जहाजह अड्काइल लङ्गर+ भिक्ल

ओ जहाजह सक्यासम क्रेटक किनार-किनार लैजाइ लगल। १४ तर एक घरीक पाछ त, टापूओरसे 'उत्तर-पूर्वी' कैजिना बर्का आँधीबौखा एकचोट्टे अन्धाधुन्द आगैल्। १५ उ आँधी हमार जहाजह समुद्रओर धक्क्याइलागल ओ वाकर आघ हमार कुछ सीप नैलागल। उहओसे जहाँ लैजाई-लैजाई कैक हम्र जहाजह सोभार छोरदेली। १६ हम्र क्लौडा कना एकठो छुटिमुटि टापूक दखिनओर पुगली त आँधी डान-डान छेकजाइअस हुइल्। तब हम्र जहाजक पाछओर बान्धल लाउह मुशिकलले जोगाइ सेक्ली। १७ हुँक लाउह बल्ल-बल्ल तान्क जहाजम ढर्ल ओ जहाजह ठूल-ठूल डौरीले बलगरक बहन्ल। आब सिरटिसओर समुद्री किनारक बालुरम जहाज भास्याजाइ कना डर होगैल्। उहओसे हुँक जहाजक पाल खसादेल, ओ जहाजह आँधीक भरम छोरदेल। १८ आँधीबौखाजुन डरलगटीक अइटीक-अइटी रलक कारण, द्वासर दिन हुँक जहाजक मालसामान समुद्रम भब्बाभब फाँक लगल। १९ तीसर दिन हुँक जहाज चलाइबेर प्रयोग कर्ना धेर सामान समुद्रम फाँकदेल। २० आँधीबौखा अइटीक-अइटीरलक

+ २७.१३ लङ्गर: चलतीरहल लाऊ या पानीजहाजह पानीक माभम ज्वाक परल कलसे डौरी या साङ्गाले बाहानौल् पानीम टरसम खसाजेना फलामक साधन हो। थप जानकारीक लाग "लङ्गर" शब्दक अर्थ हेरी।

कारण हम्न धेर दिनसम ना त दिन देख्ली, ना त टोरैया देख्ली। ओ आखिरम हमार बचना आशा फे मुगैल्।

२१ हुँक्र खाना नैखैलक कयौ दिन होरलहन। पावल सबजन्हक सामुन्नेम ठह्याक कल, "हेरी संघारीहुँक्र, अप्नहुँक्र म्वार सल्लाह मान्क क्रेटसे जहाज नैचलाइपर्नारह। यदि अप्नहुँक्र म्वार कहल मन्टी कलसे, हम्न असिन दुखम नैपर्नेरलही ओ मालसामान नोकसान फे नैहुइनेरह। २२ आब मै अप्नहुँकन उत्साह देह चाहटु, हरेस जिन खाई। जहाज नाश होगैलसे फे, हमार केकरो ज्यान जउइया नैहो। २३ मै परमेश्वरक मनैया हुइटु, ओ उहाँक सेवा कर्तु। आज रात एकठो स्वर्गदूत म्वार पञ्ज ठह्याक २४ महीह कल, 'पावल, जिन डराओ, टुहिन रोमी शासकक् सामुन्ने जैही परी। हेरो, परमेश्वर टुहारसंग जहाजम यात्रा कर्ना सबजन्हक सुरक्षा करहीं।' २५ उहओसे, हेरी संघारीहुँक्र, हरेस जिन खाई। काकरकि परमेश्वर महीह ज्या कैरख्ल, उह हुइइया बा कैक मै विश्वास कर्तु। २६ तर हम्नभर कौनो एकठो टापूमा ठोक्याजैबी।"

जहाज टुक्रिटुक्रा हुइल्, तर सब जन सकुशल किनारम पुगल

२७ आँधीबौखक फ्याला परल त चौध दिन होरलाहा। आँधी आम्हीसम फे हमन एड्रियास समुद्रम धक्यैटीरह। आधारातओर हम्न कौनो ठाउँक किनारओर पुगटीजसिन जहाज चलुइयन लगलन। २८ हुँक्र पानीक गहिराइ नप्ल त असी हाँठ पत्ता लगैल। हुँक्र टनिक दूर जाक फेदोस्र पानीक गहिराइ नप्ल त साठी हाँठ पत्ता लगैल। २९ हमार जहाज चट्टानम ठोक्याजाई कि कना डरले हुँक्र जहाजह अड्काइक लाग पाछओरिक चारठो लङ्गर खसादेल, ओ भट्ट अजरार होजाए कैक प्रार्थना कर लगल। ३० तब जहाज चलुइयन जहाजमसे भागक लाग रलह। हुँक्र आघओरिक लङ्गर खसैना बहाना कैक लाऊह त जहाजमसे समुद्रम खसारख्लह। ३१ तब पावल कप्तान ओ सिपाहीहुँकन कल, "यदि यी मनै जहाजमसे भगहीं कलसे, अप्नहुँक्र बचना आशा नैकर्लसे फे हुइठा।" ३२ यी बात सुन्टीकि सिपाहीहुँक्र जहाजम बान्धल लाउक डौरी काटदेल ओ लाउह पुहदेल।

३३ बिहान हुइना ब्याला पावल सबजहन कुछुकुछु खाइ कल। ऊ कल, "अप्नहुँक्र चिन्तित होक मजासे खाना नैखैलक आज चौध दिन

होस्याकल। ३४ कुछुकुछु खाइ कना म्वार बिन्ती बा। अप्नहुँक बिना खैल कहाँ बाँच सेक्बी? अप्नहुँकन्हक कपारीक एकठो भुत्ला फे भरुइया नैहो।" ३५ अत्रा कैक सेक्ल त पावल रोटी लेल, ओ सबजन्हक सामुन्ने परमेश्वरह धन्यवाद चहैल, ओ खन्टाक खाइ लगल। ३६ तबदोस हुँक सब जन हौसला पैल ओ खाना खैल। ३७ हम्र जहाजम जम्माजम्मी दुइ सय छयहत्तर जन रलही। ३८ सब जन अघा-अघा खैल त, हुँक गोहूँभर सब समुद्रम फाँकदेल ओ जहाजह हलुक बनैल।

३९ अजरार हुइल् त, समूद्रक एक किनारा देखपरल, तर हुँक उ ठाउँह चिन्ह नैसेक्ल। किनारम सम्म ओ कोन्वा परल ठाउँ देखलकओसे हुँक जहाजह सक्यासम उहँ भास्यादेना विचार कर्ल। ४० हुँक लङ्गर बान्धल डौरी सब काटदेल ओ लङ्गर समुद्रम रहन्देल। तबदोस हुँक जहाज सोभर्ना साधनह बान्धल डौरी छोरदेल, आघओरिक पाल बयालओर उठादेल, ओ जहाजह किनारओर लैगिल। ४१ तर पानीम रहल बालुरक रासम जहाज ठोक्क्याइल ओ ओइहँम भास्यागैल्। जहाजक आघक भाग

अत्रा कर्से अँटकगैल्, कि उ हलचल नैकरलागल, ओ पाछक भागजुन छल्कक् भोक्काले टुक्रिटुक्रा हुइलागल।

४२ कैदीहुँक पहुँक भागजैहीं कैक सिपाहीहुँक हुँकन मुवादेना विचार कर्ल। ४३ तर कप्तान पावलह बचाइ चहलकओसे किहुह फे मुवाइ नैदेल। ऊ सिपाहीहुँकन ओसिक कर्नासे रोक्ल। बेनसे ऊ 'पौह सेकुइयनभर जहाजमसे फन्को ओ पहुँटी आघहँ किनारम चलजाओ, ४४ ओ बाँकी रहुइयनजुन फल्यमम या जहाजक टुक्रमम जाओ' कैक आदेश देल। असिक हम्र सब जन सकुशल किनारम पुगली।

पावल ओ और

यात्रीहुँक माल्टा टापूम

२८

हम्र सकुशल किनारम पुगली त, उ टापूक नाउँ माल्टा हो कैक थाहाँ पैली। २ उ ठाउँक मनै हमन एकदम धेर दया देखैल। भरी वर्षटह ओ ठण्डी बाहल रह, उहओसे हुँक धुनी लगैल ओ हमन आगी ताप बलैल। ३ पावल एक ब्वाभा भँस्त्रा बिटोर्क आगीम डर्ल, त आगीक रापले एकठो सप्वा निक्लल

ओ हुँकाहार हाँठम खपकदेलिन।
 ४ पावलक हाँठम सप्वा भुलल् देख्क
 उ ठाउँक मनै अप्न-अप्न कहलग्ल,
 "यी मनैया पक्क फे ज्यानमारा हो।
 यी समुद्रमसे त बाँचगैल्, तर न्यायमसे
 बाँच नैस्याकल।" ५ तर पावल उ
 सप्वह आगीम भिट्कारदेल, ओ
 हुँकहीन कुछु नैहुइलन। ६ उ ठाउँक
 मनै 'आब पावलक जीउ सुवैहीस् या
 ऊ एककासी ढल्क मुउइया बा' कैक
 ह्यारलग्ल। तर धेर समयसम रहबेर फे
 हुँकहीन कुछु नैहुइल् देख्क हुकन्हक
 विचार बदलगैलन, ओ कहलग्ल,
 "यी त डिउँटा हुइट!"

७ उ टापूम पब्लियस नाउँक एकठो
 शासक रलह। हुँकाहार जग्गाजमीन
 ओठेसे लग्घहँ रलहन। ऊ हमन पौन्हा
 मान्क तीन दिनसम आपन घरम भारी
 मानमर्जात कैक ढर्ल। ८ उ समयम
 पब्लियसक बाबा जरकमार बेराम
 रलह ओ हुँकाहारम आउँ फे परल
 रलहन। पावल हुँकाहारठे गैल, ओ
 हुँकाहारम हाँठ ढैक प्रार्थना कैदेल
 त, ऊ चोखागैल। ९ असिक चोखैलक
 थाहाँ पैल त, उ टापूम रहल सब
 बेरम्हेन अइल ओ चोखागैल। १० उ
 ठाउँक मनै धेर उपहार देक हमन आदर
 कर्ल। हम्न पानीजहाजम चिउहलग्ली
 त, हमन आवश्यक पर्ना चिजबिज फे
 हुँक्रे जहाजम पुगादेल।



सप्वा कट्लसे फे पावलह कुछु
 नैहुइलन (२८.३)

पावल ओ और यात्रीहुँक्रे माल्टासे रोमम पुग्ल

११ जहाज टुक्रिटुक्रा हुइलक
 तीन मैन्हापाछ, हम्न और जहाजम
 चिहुर्ली। उ जहाज अलेकजेन्द्रियासे
 आक हिउँदभर माल्टा टापूम रह। उ
 जहाजक आघक भागम जुम्ल्याहा
 डिउँटन्हक मूर्ति बनाइल रह। १२ हम्न
 सुराकुसाई शहरम पुग्ली ओ उहाँ तीन
 दिन रली। १३ उहाँसे हम्न पानीजहाजम
 रेगियन शहरम पुग्ली। द्वासर दिन
 दखिनओरसे बयाल बह लागल, ओ
 तीसर दिन हम्न पटिओली शहरम
 पुग्लैली। १४ उ शहरम हम्न कुछु
 विश्वासीहुँक्रेन भेटैली। हुँक्रे हमन
 सात दिनसम उहाँ रहजाओ कैक
 कल। सात दिनपाछ हम्न रोम शहर
 जाइक लाग उहाँसे नेङ्ग्ली। १५ हम्न
 अइटीबाटी कैक रोमक विश्वासीहुँक्रे
 सुनरख्लह। हुँक्रेमध्ये कत्रा जन

हमन भेटाए अप्पियस बजारसम आरलह, ओ कत्रा जनजुन तीन-पाटी कना ठाउँसम आरलह। हुँकन देरूक पावल परमेश्वरह धन्यवाद चहैल ओ हौसला पैल। १६ हम्न रोमम पुगली त, पावल एकठो सिपैहेक रेखदेखम अलग ड्यारा लेक बैस्ना अनुमति पैल।

पावल रोमम धेर मनैनसे येशू ख्रीष्टक बारेम बटोइल

१७ पावल रोमम अइलक तीन दिनपाछ यहूदीन्हक स्थानीय अगुवन बलापटैल। हुँकन जम्मा हुइल त पावल हुँकन कल, "हेरो भैयौ, मै हमार जाति, या हमार पितापुर्खासे चलती आइल रीतिथितिक विरोधम कुछु नैकर्लरनहुँ, तर फे मै यरूशलेमम पक्राउ पर्नु ओ रोमी सरकारक हाँठम सुम्प्वापैनु। १८ रोमीहुँकन महीह छानबीन कर्ल ओ मृत्युदण्ड देहपर्ना किसिमक कुछु दोष नैभेटैलक कारण महीह छोरदेना विचार कैरखलह। १९ तर यरूशलेमक यहूदी अगुवन विरोध कर्ल। तबदोस, आपन यहूदी जातिन्हक विरोधम दोष लगैना म्वार कुछु इच्छा नैरलसे फे, महीह 'रोमी शासक कैसर म्वार न्याय कैदेहीं' कैक बिन्ती कर्ना करऽ लागल। २० उहओसे अप्पहुँकनसे

भेटघाट कैक बातचीत करक लाग आज मै अप्पहुँकन यिहाँ बलैनहुँ। हम्न इसाएलीहुँकन्हक आशा करल ख्रीष्टकम विश्वास कर्लकओसे मै यिहाँ एकठो कैदी होरनु।"

२१ हुँकन कल, "हम्न अप्पक बारेम यहूदियासे ना त एकठो चिठी पारखली, ना त कुई उहाँसे आक अप्पक विरोधम कुछु नैमजा बात सुनरखली। २२ तर हम्न अप्पक विचार सुन चाहटी, काकरकि हम्न जहाँरतहाँर मनैन यी दलक विरोधम ब्वालल् केल थाहाँ पारखली।"

२३ तब हुँकन पावलक बात सुनक लाग एकठो दिन तोक्ल। उ दिन धेर मनै पावलक ड्यारम अइल। पावल बिहानसे लेक सन्भयासम परमेश्वरक राज्यक बारेम हुँकन शिक्षा देल। ऊ मोशक व्यवस्था ओ अगमवक्तन्हक किताबमसे येशूक बारेम लिखल बात बुझैटी हुँकन मनैना कोसिस कर्ल। २४ हुँकाहार कहल बात सुनक कत्रा जन त मानडर्ल, तर कत्रा जनजुन विश्वास नैकर्ल। २५ हुँकन्हक बात नैमिल्लन, हुँकन ओत्रहम जाजाइक लाग रलह। तर जैनासे आघ पावल हुँकन कल, "पवित्र आत्मा यशैया अगमवक्ताद्वारा टुन्हक पितापुर्खन कहल वचन ठीक रह,

२६ 'उ मनैन्हकठे जा ओ कोह,
 "टुह म्वार वचन सुन्ना त सुन्ठो,
 तर बुभबो-बुभबो नैकर्तो।
 टुह म्वार करल् काम देख्ना त
 देख्ठो,
 तर बुभबो-बुभबो नैकर्तो।"
 २७ काकरकि सत्य बातम उ
 मनैन्हक मनऽ नैजैटन।
 हुँक्र त आपन कानम त्याल
 डाररख्ल,
 हुँकन्हक आँख फुटरलन,
 नकि त हुँक्र आपन आँखिले
 देख्नेरलह,
 आपन कानले सुन्नेरलह,
 मनले बात बुभनेरलह,
 आपन-आपन पापमसे घुम्नेरलह,
 ओ मै हुँकन मुक्ति देनेरनहुँ।'

२८ पावल अन्तम कल, "आब मै
 अप्नहुँकन का कह चाहटु कलसे,
 परमेश्वर हमन यी मुक्तिक बारेम
 वचन प्रचार कर अयहूदीन्हकठे
 फे पठारख्ल, ओ हुँक्र वचन
 सुनुइयाबाट।" २६ [ऊ अत्रा बात
 बट्वाक सेक्ल त, यहूदीहुँक्र
 अप्न-अप्न बाभाबाभ कर्ती उहाँसे
 गैल।]+

३० पावल पूरा दुइ वर्षसम रोमम
 आपन लेहल ड्यारम रल, ओ
 हुँकाहारठे अउइया सबजन्हक ऊ
 स्वागत करँट्। ३१ ऊ साहसी होक
 परमेश्वरक राज्यक बारेम प्रचार
 करँट्, ओ प्रभु येशू ख्रीष्टक बारेम
 सिखाइँट्। ओ हुँकहीन कुई फे
 रोकटोक नैलगाए।

+ २८.२६ ग्रीक भाषक कौनो-कौनो स्रोतम यी पद बा। तर सबसे धेर भरपर्ना स्रोतम यी पद नैरलकओसे यिहाँ कोष्ठम [] लिख्ल बा।

शब्दक अर्थ

(नोट: ठूल अक्षरम लिख्गैल् थारु शब्दक पाछ कौष्ठम नेपाली शब्द फे देगैल् बा।)

अगमवक्ता /अगमवाणी

अगमवक्ता कलक परमेश्वरक बलाइल व्यक्ति अर्थात् परमेश्वरक तर्फसे बोल्ना व्यक्ति या परमेश्वरक प्रवक्ता हुइटा। अगमवक्ताह कबुकाल “परमेश्वरक जन” (व्यवस्था ३३:१; १ शमूएल ६:६), ओ कबुकाल “परमेश्वरक दास” (२ राजा १०:१०; १७:१३) कैगिल् बा। हुँकन्हक ब्वालल् वचनह अगमवाणी कैजाए। अगमवक्ताहुँक परमेश्वरक स्वभाव, इच्छा, योजना, अर्ती, चेतावनी, ओ न्याय सम्बन्धी वचन मनैन देहँट। हुँक परमेश्वरसे पाइल वचन मनैन देना क्रमम कबुकाल भविष्यम हुइना घटनक बारेम फे कहँट। उदाहरणक रुपम एलीशा (२ राजा ६:१२) ओ आमोस (आमोस १ ओ २ अध्याय)। कुछ अगमवक्ताहुँक परमेश्वरक वचन लिख्ल। पुरान नियमम हुँकन्हक लिखल किताब धेर बा।

उ समयम भुटा अगमवक्ताहुँक फे रलह। हुँक आपन मनक बात

बट्वाइँट, तर परमेश्वरसे पाइल वचन कैक दाबी करँट। परमेश्वर हुँकन नैबलैललन तर हुँक अपन्हे अगमवक्ता बनलह। हुँक मनैन परमेश्वरक आज्ञापालन कर लगाइक लाग नाहीं तर आपन स्वार्थी इच्छा पूरा करक लाग वचन ब्वालँट। जे होस्, परमेश्वरक अगमवक्ताहुँक राजदरवारम सल्लाह देना काम करँट। हुँक देशम न्याय, नैतिकता ओ पवित्रता कायम हुइपर्ना बातम जोड्देहँट। हुँक देशम आत्मिक अगुवक रुपम धेर महत्वपूर्ण देन देरख्ल। लौव नियमम फे अगमवक्तान्हक सेवा उल्लेख कैगिल् बा। पवित्र आत्मा विश्वासीहुँकन मण्डलीक हितक लाग अगमवाणी बोल्ना वरदान देठ (१ कोरिन्थी १२:१०)। पैल्ह शताब्दीम मण्डली स्थापना कर्ना कामम प्रेरितन्हक संगसँग अगमवक्ताहुँक फे धेर देन देल।

अगुवा (धर्मगुरु)

अगुवन कलक यहूदी समाजक गन्यमान्य मनै रलह। इस्राएल देशक इतिहास ह्यारबेर, अगुवन शासकअस अधिकार कर्लरलह कना बात देखपठा (व्यवस्था ३१:२८) ओ हुँकर समाजम न्यायनिसाफ करुइयन फेरलह (व्यवस्था १६:१८; १६:१२)। येशूक समयम हुँकर फेर येशूह धर्मक बातम फँसाइक लाग मुख्य पुजेहोनसे ओ धर्मगुरुनसे मिल्क सँगसँग काम करँट। आखिरीम येशूह क्रूसम मुवैनाम हुँकन्हक फेर हाँठ रलहन (मर्कूस ८:३१; १४:४३-६५; १५:१-१५)। हेरी "महासभा", "पुजेहवा", ओ "धर्मगुरु"।

अचम्मक काम (आश्चर्यकर्म)

मनैन्हक हिसाबले, धेर समय लगना काम (जस्त: ज्वाग लागल मनै चोखैना) तुरुन्त हुइल् कलसे, ओ जीन्दगीम नैद्याखल या नैसुनल बात देखलसे या सुनलसे (जस्त: मुवल मनैया जीयल घटना), हमन अचम्म लग्ठा। अचम्मक काम कलक कलकरोन्हक काला देखैना काम नैहो, ओ मन्त्रतन्त्र कैक चमत्कार देखैना काम फेर नैहो, तर परमेश्वरक शक्तिले हुइना काम हो। बाइबलम, अचम्मक कामह कबुकाल शक्तिक काम (मर्कूस ६:५), कबुकाल चिन्हा (मर्कूस ८:११-१३) कैगिल बा।

येशू आन्धर (मर्कूस १०:४६-५२), नाङ्गर (मर्कूस २:१-१२), लुल (मर्कूस ३:१-६), लाट, ओ बहिर मनैन चोखैल (मर्कूस ७:३१-३६), ओ ज्वागविज्वाग ओ भूतपज्याटनसे दुःख पाइल मनैन चोखैल (मर्कूस १:२१-२७, ४०-४५; ५:१-३४; ६:१४-२७)। उहाँ मुवल मनैन फेर जीयैल (मर्कूस ५:३५-४३; यूहन्ना ११:१-४४)। उहाँ पानीह अङ्गुरिक रस बनादेल (यूहन्ना २:१-११), रोटी ओ मच्छी बहादेल (मर्कूस ६:३०-४४; ८:१-१०), ओ गहिँर तल्लोम उप्र-उप्र नेङ्गल (मर्कूस ६:४५-५२)।

उहाँक करल उह कामह बाइबलम अचम्मक काम कैगिल बा। येशू रमाइलो कर्ना हिसाबले अचम्मक काम नैकर्ल, तर मनैन्हक आवश्यकता पूरा करक लाग, स्वागकमार, ओ उहाँ वास्तवम परमेश्वरऽ रलह कना बात सावित करक लाग अचम्मक काम कर्लह।

अनन्त जीवन

अनन्त जीवन कलक यी जीवनम येशू ख्रीष्टक सम्बन्धम रहक जीना ओ मुलसे स्वर्गम जैना जीवन हो (यूहन्ना १७:३-२६; १ यूहन्ना २:२४-२५)। मनै येशूकम विश्वास कर्ल कलसे, हुँकन्हकम अनन्त जीवन शुरु हुइठन (यूहन्ना ३:१६), तर यी जीवनक पूर्णता भर हुँकर मुलसे केल

पैठ (१ कोरिन्थी १५:५२-५४)। हुँक
पापक क्षमा पैठ ओ परमेश्वरक
सन्तान हुइठ (यूहन्ना १:१२; १
यूहन्ना ३:१)।

अनुग्रह

बाइबलम अनुग्रह कलसे क्षमादान,
मुक्तिदान, अचूक प्रेम, अपार कृपा
आदि विषयह समेट्ठा। निगाहा,
दया आदि शब्द फे अनुग्रहक अर्थ
देठा। परमेश्वरक अनुग्रहक कारणले
हम्र मुक्ति पैठी (एफिसी २:८; तीतस
२:११)। हम्र पापी ओ परमेश्वरक
विरोधी रहलम फे परमेश्वर आपन
छावा येशू ख्रीष्टह हमन मुक्ति देहक
लाग पठैल (रोमी ५:८)। येशूक
मृत्युद्वारा परमेश्वर आपन पाप
स्वीकार कर्ना ओ उहाँकम विश्वास
कर्ना मनैन क्षमा देठ। मुक्ति कुई फे
कमाइ नैस्याकट्, यी त परमेश्वरक
अनुग्रहस्वरूप मनैन देगैल वरदान हो।

परमेश्वर आपन अनुग्रहद्वारा
इसाएलीहुँकन आपन मनै हुइक लाग
रोज्जलह (व्यवस्था ७:७-८)। मनै
लौव हृदय पैना बात फे परमेश्वरक
देहल अनुग्रहक वरदान हो कैक
अगमवक्ताहुँक बुभल (इजकिएल
१८:३१)। परमेश्वरक अपार कृपक
कारणले केल मनै उहाँक पवित्र
मन्दिरम जाइसेकना बात भजनसंग्रहम
लिखौल् बा (भजनसंग्रह ५:७)।

येशूक सिखाइल वचनम फे
धेरजसिन अनुग्रहक सिद्धान्त पाजैठा।
जस्तै – काम करुइयन्हक आहानम,
डान्चे समय केल काम करुइयन फे
पूरा ज्याला पैठ (मत्ती २०:१-१६),
बराभ्वाजक आहानम, निउँता पैना
असम्भव मनै फे भ्वाजम सहभागी
हुइ पैठ (लूका १४:१६-२४), हेराइल
छावक आहानम, छोट्की छावा दण्ड
पैना योग्यक रलसे फे घरमा स्वागत
कैजिठा (लूका १५:११-२४)।

पावल धेरजसिन चिठीक शुरुम
अभिवादन करबेर ओ अन्त्यम
आशिषक कामना करबेर “अनुग्रह”
शब्द प्रयोग कैरख्ल। पावल, रोमी
१:१६-४:२५ म, मनै पापी बाट ओ
परमेश्वरसे दूर होरल, तर परमेश्वर
आपन अनुग्रहद्वारा हुँक कबु फे पाप
नैकरलअस हुँकनसे व्यवहार कठ।
हम्र पापी ओ परमेश्वरक विरोधी
रहलम फे परमेश्वर आपन छावा येशू
ख्रीष्टह हमन मुक्ति देहक लाग पठैल
(रोमी ५:८)। परमेश्वरक अनुग्रहक
कारणले हम्र मुक्ति पैठी (एफिसी २:८;
तीतस २:११)।

अयहूदी

अयहूदी कलक यहूदी जात
नैरहल मनै हुइठ। हुँक परमेश्वरकम
विश्वास नैकरँट्, ओ हुँकन्हक
आपन-आपन डिउँता रलहन। उहओर्से

यहूदीहुँकर अयहूदीहुँकन परमेश्वरकम विश्वास नैकरुइयन, अधर्मी ओ पापी सम्भँट, ओ हुँकन अशुद्ध मानँट (प्रेरित १०:२८)।

अशुद्ध

व्यवस्था अनुसार इस्राएलीहुँकर धेर किसिमले अशुद्ध हुइँट:

- व्यवस्थक त्वाकल अशुद्ध पशन्हक शिकार खैलसे (लेवी ११:१-२३)
- पशन्हक या मनैन्हक लाश छुलसे (लेवी ११:२४-२५)
- मजासे रकट नैनिट्रल शिकार खैलसे (लेवी १७:१४-१६)
- जन्नी मनै लर्का पैलसे (लेवी १२:१-८)
- कोरोग लगलसे (लेवी १३; मर्कूस १:४०-४४)
- पुरुष मनैन धातुरोग हुइलसे (लेवी १५:२)
- जन्नी मनै मैनहावारी हुइलसे (लेवी १५:१६)

मौखिक परम्परामसे चल्ती आइल और नियमह फे यहूदीहुँकर व्यवस्था बराबर मानँट। यी हिसाबले, अशुद्ध हुइना विषयम हुँकन्हक थप नियम फेरलहन:

- यहूदी जात नैरहल मनैनसे सँग बैठ्क खैलसे (प्रेरित ११:३)
- यहूदी जात नैरहल मनैन छुलसे

• खाना खैनासे आघ रीत अनुसार हाँठ नैधुइलसे (मर्कूस ७:१-४)

तर अशुद्ध कना चिज मनक बात हो ओ कुछु रीतिरिवाज अनुसार चल्क हुइना बात नैहो कैक येशू कल। उहाँ कल, “पाप काम सौँचलसे या कर्लसे परमेश्वरक नजरम मनै अशुद्ध हुइठ (मर्कूस ७:२०-२३)। परमेश्वरक नजरम अशुद्ध हुइल मनै कुछु संस्कार पूरा कैक शुद्ध हुइ नैसेक्ट, तर येशूक रकटले केल शुद्ध हुइसेक्ट।

इस्राएली

हेरी “यहूदी”।

क्रूस

क्रूस दुइठो कट्ठोले बनल रठा। एकठो ठाहर कट्ठोम और ब्यार कट्वा टांसल रठा। रोमी सरकारक समयम, रोमीहुँकर मृत्युदण्ड पैना अपराधीन असिन क्रूसम टङ्गाक मुवाइँट। हुँकर अपराधीन्हक हाँठ-ग्वारम कील्ला ठोक्क टङ्गाइँट। असिक टाङ्गलम कौनो-कौनो अपराधीन मुना दुई-तीन दिन फे लागन। टङ्गागैल् अपराधीहुँकर भट्ट मुहीं कैक, रोमीहुँकर कबु-कबु हुँकन्हक ग्वारा टुरदिहँट (यूहन्ना १३:३१-३३)। येशू खीष्ट रोमीहुँकनसे मृत्युदण्ड पाक क्रूसम टङ्गावापैल (मर्कूस १५:१३-१५, २०-३२)। हम्र

पाइपर्ना पापक मृत्युदण्ड क्रूसम मुक्त
येशू भोग्ल। (मर्कूस १०:४५)।

खतना

लिंगक टुप्पक छाला काट्क
फँकना यहूदी विधिह खतना कैजिठा।
शुरुम परमेश्वर अब्राहाम ओ हुँकाहार
सन्तानन् खतना कर्ना कैक आज्ञा
कर्ल। उ खतनाचाहीं यहूदीहुँकनसे
परमेश्वरक करल बाचक चिन्ह रह।
यहूदीन्हक छावा लर्का जर्मलसे,
हुँकर लर्का जर्मलक आठवाँ दिनम उ
लर्कक् खतना करँट। उह फे मुक्ति
पाइक लाग खतना कर्लक कुछु
फाइदा नैरह (गलाती ५:६)। वास्तवम
खतना कर्ना पक्का यहूदी बन्ना
चिन्ह फे नैहो (रोमी २:२८-२९)।
उहओसे अयहूदी ख्रीष्टीयनहुँकन
खतना कर्ना कुछु आवश्यक नैहो
(प्रेरित १५:५-११)।

खुशिक खबर (सुसमाचार)

साधारण हिसाबले खुशिक खबर
कलक मजा खबर हो। तर बाइबलम,
खुशिक खबर कलसे एकठो विशेष
अर्थ लग्ठा। धेर वर्ष आघ, परमेश्वर
इसाएलीन मुक्ति देना बाचा कैरख्लह
(यशैया ६:१-७)। परमेश्वर उ
बाचा येशू ख्रीष्टकम पूरा कर्ल ओ
सक्कुजन्हक लाग मुक्तिक ड्वार
खोलदेल (कलस्सी १:१३)।

खुशिक खबर कलक यह हो कि
येशू ख्रीष्ट सारा संसारह मुक्ति देना
परमेश्वर हुइट, ओ उहाँ मनैन पापमसे
मुक्ति दिहक लाग यी संसारम अइल
(१ पत्रुस २:२४; रोमी ६:२३)। पापमसे
मुक्ति पाइक लाग, मनै येशू ख्रीष्टकम
विश्वास कर्ना बाहेक और कुछु
कर नैपरट् (यूहन्ना १:१२; ३:१६)।
मनैन्हक लाग सबसे खुशिक खबर
यिह हो।

दया

दया कलक औरजन्हकम दुख,
अभाव, आपतविपत परल समयम,
हुँकन सहायता करक लाग मनम
अइना एकठो भावना हो। यहीह
कबुकाल कृपा या निगाहा फे कैजिठा।
परमेश्वर गरीब मनैन, टुवर लर्कन,
विधवन ओ अरदेशीपरदेशीन दया
करपर्ठा कैक आपन वचनम कैरख्ल
(भजनसंग्रह १४६:९; हितोपदेश
१६:१७; जकरिया ७:९-१०; मीका
६:८)। परमेश्वर आपन करल सारा
सृष्टिम दया कर्लबाट (भजनसंग्रह
१४५:९), ओ उहाँ हमन दया कर्लक
कारण हम्र मुक्ति पारख्ली (एफिसी
२:४; तीतस ३:५)। येशू आपन चलन
कल, “टुन्हक स्वर्गक परमेश्वर
बाबा दयालु रहलअस, टुह फे दयालु
होओ” (लूका ६:३६)। एकठो मुवमुव
मनैयह देख्क सामरीया क्षेत्रक मनैयह

दया लगलन् (लूका १०:३३)। दया एकठो भावना हो, जेहीह कामले ओ व्यवहारले व्यक्त कैजिठा।

दर्शन

दर्शन कलक सपनम या ध्यानमग्न रहलम या और अवास्थम कौनो मनैया आपन मनम परमेश्वरसे प्रकट करागैल् अलौकिक बातक घटना देखना हो। दर्शन द्याखल मनैन्हक मनम विशेष घटनक चित्र अइठन या एकठो स्पष्ट विचार सृजना हुइठन। कर्नेलियस दिनक तीन बजेओर दर्शनम परमेश्वरक पठाइल एकठो स्वर्गदूतह आपनओर आइट् देख्ल (प्रेरित १०:३)। पत्रुस प्रार्थना कर्तिकर्टी ध्यान-मग्न हुइल ओ दर्शन देख्ल (प्रेरित १०:१०)। पावल दर्शनम माकेडोनिया क्षेत्रक एकठो मनैयह देख्ल (प्रेरित १६:६)।

दाऊद

दाऊद इस्राएलीन्हक सबसे नाउँ चलल् राजा रलह। उहाँ परमेश्वरकम धेर विश्वास करँट्। ऊ येशू ख्रीष्ट जर्मनासे लगभग १०४० वर्ष आघ जर्मलह ओ चालीस वर्षसम इस्राएल देशम राज्य कर्लह। ऊ इस्राएलक राजधानी यरूशलेमम स्थापना कर्ल। हुँकाहार शासनकालम, परमेश्वरक सहायताले, इस्राएल देश बरा ओ

शक्तिशाली हुइल्। इस्राएलीहुँक दाऊद राजा पैलकम धेर गर्व करँट्, ओ अइना ख्रीष्ट दाऊदजसिन रना बात फे कल्पना करँट्। उ ख्रीष्ट आपन मनैन मुक्ति देहीं ओ दाऊदक सिंहासनम बैठ्क सड्डभर राज्य कर्तीरहीं कना हुँकन्हक आशा रलहन। येशू ख्रीष्ट दाऊदक वंशमसे जन्मलह (मत्ती १:१, २०; लूका १:२६-२७, ३२-३३)।

धर्मगुरु (शास्त्री)

धर्मगुरु कलक खास कैक पुरान नियमक व्यवस्था ओ व्यवस्थमसे आइल परम्परा अध्ययन कर्ना, अर्थ लगैना, ओ मनैन सिखैना यहूदी विद्वान रलह। धेर जसिन धर्मगुरुहुँक फरिसी या सदुकी समूहक सदस्य रलह। येशू धेर लोकप्रिय हुइलकओसे, हुँक फे आपन अधिकार लिहावापाडर्ती कि कैक डरारलह। उहओसे हुँक फे येशूह धर्मक बातम फँसाइक लाग लागलरलह (मर्कूस ७:१-६; ११:२७)। आखिरीम येशूह क्रूसम मुवैनाम हुँकन्हक फे हाँठ रलहन (मर्कूस ८:३१; १४:४३-६५; १५:१-१५)। हेरी “महासभा”, “पुजेहूवा”, ओ “अगुवा”।

नरक

बाइबलक हिसाबले, मनै मुलसे, कि त नरकम जैठ, कि त स्वर्गम

जैठ। नरक कलक येशूकम विश्वास नैकरुयन, ओ शैतान ओ वाकर पाछ लगुइयन दण्ड देना ठाउँ हो। उ सह नैसेकजैना दुःख भोगना ठाउँ हो, ओ उहाँ गैल् मनै कबु फे उम्कसेकुइया नैहुइट (मत्ती १८:८; २५:४१-४६; मर्कूस ६:४२-४८; यहूदा ६-७; प्रकाश २०:१०)।

परमेश्वर

परमेश्वर आत्मा हुइलकओसे, उहाँह द्याख नैसेकजाइट (रोमी १:२०; कलस्सी १:१५; १ तिमोथी १:१७; ६:१५-१६)। तर फे बाइबलम का लिखल बा कलसे उहाँ बोल्ट (उत्पत्ती ३:८-१६; ६:१६; मर्कूस १:११), सुन्ठ (अय्यूब ३४:२८; भजनसंग्रह ११६:१), देख्ठ (भजनसंग्रह ३३:१३-१४; हितोपदेश ५:२१), रिसैठ (प्रस्थान २२:२४; रोमी १:१८, प्रेम कर्ठ (यूहन्ना ३:१६), ओ सोगैठ (हिब्रू ४:१५-१६)। परमेश्वर एकक समयम सब ठाउँम बाट (भजनसंग्रह १३६:७-१०; यर्मिया २३:२३-२४), उहाँ सब चिज जन्ठ (भजनसंग्रह १३६:१-४; दानियल २:२०-२२), उहाँ सक्कुनसे शक्तिशाली बाट (अय्यूब ४२:२; लूका १:३७), उहाँ सड्डभर पलबाट ओ पलरहुइयाबाट (१ तिमोथी १:१७; प्रकाश ११:१७; १५:७), ओ उहाँ कबु फे पाप नैकर्ल

ओ कबु फे पाप करुइया नैहुइट (याकूब १:१३ १; पत्रुस १:१:१५)।

उहाँ स्वर्ग, पृथ्वी ओ उहिम रहल सबचिज सृष्टि कर्ल (यर्मिया ५१:१५; हिब्रू २:१०)। उहाँ मनैन्हक भलो चहठ (यर्मिया २६:११)। उहओसे परमेश्वर मनैन पापमसे मुक्ति देना योजना बनाक उह अनुसार काम कर्ल। येशू ख्रीष्टकम विश्वास कर्लसे मुक्ति पैना बात बाइबलम लिखल बा (रोमी ५:१०; हिब्रू २:१४-१५)।

परमेश्वर तीनठो व्यक्तित्वम बाट: बाबा परमेश्वर, छावा परमेश्वर, ओ पवित्र आत्मा परमेश्वर (मर्कूस १:१०-११)। ख्रीष्टीयन इतिहासम यहीह त्रिएक परमेश्वर कैगिल् बा। हम्र बाइबलम का देख्ठी कलसे, हुइना त परमेश्वर तीनठो व्यक्तित्वम बाट, तर उहाँ एकठो परमेश्वर हुइट, तीनठो परमेश्वर नैहुइट (व्यवस्था ६:४)।

परमेश्वरक छावा (परमेश्वरको पुत्र)

परमेश्वर तीनठो व्यक्तित्वम बाट: परमेश्वर बाबा, परमेश्वर छावा, ओ परमेश्वर पवित्र आत्मा। येशू ख्रीष्ट परमेश्वरक छावा हुइट। परमेश्वरक छावा रलसे फे, उहाँ परमेश्वर बाबक सृजाइल नैहुइट। कन्या मरियमक कोखिमसे जरमक उहाँ परमेश्वरक छावा हुइलक

नैहुइट। उहाँ सड्डभर परमेश्वरक छावा पलबाट ओ पलरहुइयाबाट। उहाँ अधिकार, शक्ति, आदर, ओ अस्तित्वम परमेश्वर बाबसे कम नैहुइट। उहाँकम परमेश्वरकम रहपर्ना गुण रलकओसे, उहाँ परमेश्वरऽ हुइट (यूहन्ना १:१-२; कलस्सी १:१५-२०; हिब्रू १)।

येशू ख्रीष्ट मनैया होक यी संसारम जरम लेल त, उहाँकम मनैन्हक गुण फे थपगैलन। उहाँ परमेश्वर बाबक आज्ञाकारी होक जील ओ क्रूसम मुल। मनैया हुइलकओसे, उहाँ क्रूसम मुवबेर सारा मनैन्हक प्रतिनिधित्व कर्ल ओ सबजन्हक पाप बोक्ल (हिब्रू २:५-१८)।

परमेश्वरक राज्य (परमेश्वरको राज्य)

परमेश्वरक राज्य संसारक राज्यअस नैहो। उहाँक राज्यम भौगोलिक सिमा नैरहट्, राजनैतिक पार्टी नैरहट्, वर्गीय ओ जातिय भेदभाव नैरहट्। परमेश्वरक राज्य कलक परमेश्वरक शासन हो। उ शासनम परमेश्वर राजक रुपम शासन कर्ठ, तर परमेश्वर निरड्कुश शासन नैचलैट। उ शासनम अन्याय, अत्याचार, शोषण, दमन, या भ्रष्टाचार कुछु नैहो।

उहाँक शासन त धार्मिक, न्यायिक, ओ पवित्र बाटन। उहाँ प्रेमम, शान्तिम, मिलापम, एकताम राज्य कर्ठ (भजनसंग्रह १४५; यशैया ६:१-७)। उ राज्य मनैन्हक मनम स्थापित हुइना राज्य हो। मनम परमेश्वरक राज्य स्थापित हुइल् मनै आपन जीवनम परमेश्वरह शासन कर देठ।

पवित्र आत्मा

पवित्र आत्मा कलक परमेश्वरऽ हुइट (प्रेरित ५:३-४; २ कोरिन्थी ३:१७-१८)। येशू ख्रीष्टकम विश्वास कर्ना मनैन्हकम पवित्र आत्मा बास कर्ठ (रोमी ५:५; ८:६)। पवित्र आत्मक सहायताले, ख्रीष्टीयनहुँकर येशूह परमेश्वरक छावा कैक प्रचार कर्ठ (प्रेरित १:८), बाइबलक वचन बुभना शक्ति पैठ (यूहन्ना १६:१३), सेवा कर्ना अगुवाइ पैठ, आत्मक फारा फराइ सेकठ, पापम नैफँस्ट, ओ लौव जीवन जीना स्वतन्त्रता पैठ (रोमी ८; गलाती ५:२२-२३)। परमेश्वरक योजना संसारम ओ मण्डलीम लागू कर्ना कामम सहायता पुगाइक लाग, पवित्र आत्मा ख्रीष्टीयनहुँकन धेर किसिमक वरदान देठ (रोमी १२:३-८; १ कोरिन्थी १२; एफिसी ४:७-१६; १ पत्रुस ४:१०-११)।


पानीजहाज

पानीजहाज समुद्रम चलना एकठो साधन रह। यी मालसामान ओसारपसार करक लाग ओ यात्रा करक लाग प्रयोग कैजाए। पावल धेरजसिन पानीजहाजम चिहुर्क प्रचार यात्रा कर्ल (प्रेरित २०:१३, २०:३८-२१:१-३,६)। पावल पक्राउ पर्ल त पाछ, हुँकहीन पानीजहाजम चिउहाक रोमम लैगिलिहिन (प्रेरित २७:२-१७)।

पाप

औरजन्हक हत्या कर्ना, या औरजहन सँटैना, या दुष्ट काम कर्ना केल परमेश्वरक नजरम पाप नैहो। तर बाइबलम पाप कलक सक्कु खराब विचार (जस्त: ल्वाभ कर्ना, हेल्हा कर्ना, बिह मुना, घमण्डी हुइना, ओ मूर्ख हुइना) ओ सक्कु खराब काम (जस्त: बेश्या काम कर्ना, चोर्ना, हत्या कर्ना, भग्ना कर्ना, लभर्ना, ठग्ना, बदला लेना) हो (मर्कूस ७:२१-२२; गलाती ५:१६-२१)।

पाप परमेश्वरक विरोधम हुइना काम हो, ओ सबसे छिटिमिटि पाप काम फे परमेश्वरक नजरम नैमजा काम हो। पाप मनैन परमेश्वरसे अल्लैलरठा (रोमी ६:२३)। पाप कर्लक कारण मनैन्हक जीवनम डर,



पानीजहाज

शरम, ओ दुःख आइल (उत्पत्ती ३)। अत्र केल नैहोक, मनै मुव पर्ना फे हुइल् (रोमी ६:२३)।

पाप साधारण बात नै हो। बास्तवम मनै पापक बन्धनम परल बाट। पापक यी बन्धनमसे मनै अपन्हे मुक्ति पाइ नैसेकट। यी बन्धनमसे मुक्ति पाइक लाग, मनै आपन-आपन पापी मन घुमाइपर्ठा ओ येशूकम विश्वास कैक परमेश्वरकठे आइपर्ठा (मर्कूस १:४; यूहन्ना ३:१६)।

पापमसे मुक्ति पैना कलक पापक दण्डसे बचना हो। हुइना त, येशूकम विश्वास करुइयन पूरा रुपम पापमसे अल्लैना सम्भव नैहो, तर, परमेश्वरक आत्मक सहायताले, हुँक आपन मनह पापओर जाइ नैदेना सम्भावना भर बा। असिक, हुँक परमेश्वरक उपस्थितिम आनन्दित ओ स्वतन्त्र जीवन जीठ (रोमी ६-८)।

पापी मन घुमाक परमेश्वरकठे अइना (पश्चात्ताप)

“मै पापी हुइहुँ, परमेश्वरसे म्वार बिग्रलुसम्बन्ध ठीक बनाइपर्ना बा” कैक सौँचना, ओ “पाप घिनलगिटिक गलती बात हो ओ मै आपन जीवनम पाप नैचहटुँ” कैक निर्णय कर्ना काम पापी मन घुमाक परमेश्वरकठे अइना हो (मर्कूस १:४-५)। पापी मन घुमाक परमेश्वरकठे आइल मनैन्हक सौँचविचार, कामकाज, रहनसहन, सक्कु क्षेत्रम, परिवर्तन हुइलुठन (प्रेरित २६:१६-२०)।

खीष्टीयन जीवनम आपन पापी मन घुमाक परमेश्वरकठे अइना सबसे पैल्हक कदम हो। पापी मन घुमाक परमेश्वरकठे अइना शक्ति परमेश्वर देठ। पापी मन घुमाक परमेश्वरकठे नैआइट्सम, पापमसे छुटकारा पैना सम्भव नैहो (हितोपदेश २८:१३; मत्ती ५:३-४; मर्कूस १:४, १५; प्रेरित २:३७-३८; २०:२१; २ कोरन्थी ७:१०; २ पत्रुस ३:६)।

पिलातस

पिलातस रोमी सम्राट सिजर तिबेरिअसक नियुक्त करल बडाहाकिम रलह। उ यहूदीया क्षेत्रक पाँचौँ बडाहाकिम रलह। उ ईस्वी सन् २६ से ३७ सम यहूदीया क्षेत्रम शासन कर्ल (लूका ३:१)।

हुँकाहार शासनक केन्द्रीय कार्यालय सिजरीयम रलहन, तर फे उ टैटिहारक समयम यरूशलेम शहरक जनजीवन सामान्य करैलराखक लाग उहँ रहँट (मत्ती २७:२७)। शासक रलकओसे अपराधीन मृत्युदण्ड देना लगायत उ क्षेत्रक सारा अधिकार हुँकाहार हाँठम रलहन। उ यहूदी महासभक करल निर्णयह समेत उल्ट्याइ स्याकँट। उ प्रधान पुजेहोह नियुक्त करँट ओ मन्दिरह आपन अधीनम ढरँट। हुइना त ऊ धेरजसिन सिजरीयम रहँट, तर यरूशलेम आइल ब्याला शहरक गस्ती करक लाग थप सेना आनराखँट।

“मुक्ति-दिवस” कना यहूदीन्हक टिहारक समयम पिलातस यरूशलेमम रलह। उह समयम यहूदीहुँकर येशूह पकर्क पिलातसक हाँठम सुम्पलह (लूका २३:१)। येशू निर्दोष बाट कना बात जन्टीजन्टी ऊ येशूह दोषी ठहैल ओ क्रूसम टङ्गाक मुवैना आदेश देल।

पुजेहवा (पूजाहारी)

बाइबलक समयम यहूदी / हिब्रू पुजेहोन परमेश्वर ओ मनैन्हक बीचम रहक काम करँट। हुँकर मोशक डाडु हारुनक सन्तान रलह। खास कैक मन्दिरक सरसामान रेखदेख कर्ना, ओ परमेश्वरह आराधना ओ परमेश्वरसे पुकारा कर्ना कामम

अगुवाइ कर्ना, हुँकन्हक जिम्मा रलहन (प्रस्थान २७:२०-२१; २६:३८-४४; लेवी ६:१२; १०:११; २४:८; गन्ती १०:१-१०; व्यवस्था १७:८-१३; ३३:१०; मलाकी २:७)। पुजेहोन परमेश्वरक बात मनैन जनादिहँट (मलाकी २:७)।

लौव नियमम हम्म तीन तहक पुजेहोन देख्ठी। साधारण पुजेहोन छ्वार पुजेहोन्हक और दुई वर्ग रलहन: प्रधान पुजेहवा ओ मुख्य पुजेहोन।

प्रधान पुजेहवा: प्रधान पुजेहवा एकठो केल रहँट, ओ उ यरूशलेमम रहँट। येशूक समयम प्रधान पुजेहवा कैयाफास रलह (मत्ती २६:५७)। प्रधान पुजेहवा केल मन्दिरक महापवित्र ठाउँम (वर्षम एक दिन केल (लेवी १६:२-३)) बलि चहाइल पशक रकट छिट, ओ यहूदीन्हक पापक क्षमा माङ्गक लाग परमेश्वरसे प्रार्थना कर जाइ स्याकँट (हिब्रू ६:७)।

मुख्य पुजेहोन: मुख्य पुजेहोन एक समूहक मनै हुइट, ओ हुँकन्हक अधिकार साधारण पुजेहोन्हकसे धेर रलहन। ७१ जन सदस्य रना महासभम (यहूदी सर्वोच्च अदालत) मुख्य पुजेहोन कार्यकारी समितीअस रलह। मुख्य पुजेहोनम समावेश हुइना मनै हिँक रलह: प्रधान पुजेहवा, हुँकाहार घरक मनै, और बर-बर

पुजेहोन्हक घरक मनै, मन्दिरक डोरपालेन्हक कप्तान, ओ आघक प्रधान पुजेहोन। येशूह क्रूसम मुवैनाम, धर्मगुरुन्हक ओ अगुवन्हक संगसंग, हुँकन्हक बरा हाँठ रलहन (मर्कूस ८:३१; १४:४३-६५; १५:१-१५)। हेरी “महासभा”, “धर्मगुरु”, ओ “अगुवा”।

प्रभु-भोज

क्रूसम टङ्गावापाइल दिनिक आघक रात, येशू आपन चेलनसे मुक्ति-दिवसक खाना खाइबेर, प्रभु- भोजक शुरु कर्लह (मर्कूस १२:२२-२५)। मुक्ति-दिवसक खाना खाइबेर, इस्राएलीहुँक रोटी खाइँट ओ अङ्गुरिक रस पियँट। मुक्ति-दिवसक खाना खैटी-खैटी, येशू एकठो रोटी लेक खन्टिखन्टा पर्ल ओ आपन चेलन देल। येशू कल, “यी म्वार शरीर हो।” रोटी उहाँक शरीरक संकेत रह कना उहाँक आशय रलहन। रोटी खन्टिखन्टा हुइलअस, उहाँक शरीर मज्वा पाक घाउ केल हुइया रलहन (यशैया ५३:१-१२; मर्कूस १५:१६-१६)।

दोस, अङ्गुरिक रस पिएबेर, येशू कल, “यी म्वार रकट हो।” अङ्गुरिक रस उहाँक रकटक संकेत रह कना उहाँक आशय रलहन। उ रकट उहाँ मुवावापैना बातह जनाए। परमेश्वर इस्राएलीनसे करल बाचह जनावरन्हक

रकटले छाप लगाक पक्का कैगिलाहा (प्रस्थान २४:६-८), ओ घरी-घरी बलिक आवश्यक पर। तर परमेश्वर मनैनसे कर्लक लौव बाचह येशूक रकट छाप लगैठा, ओ और बलिक आवश्यक नैपरट् (हिब्रू १०:१८)।

इसाएलीहुँक्र आपन पूर्खाओं मिश्रदेशक बन्धनमसे छुट्कारा पाइल सम्भनम मुक्ति-दिवस मनाइअस, ख्रीष्टीयनहुँक्र पापक बन्धनमसे छुट्कारा पाइल सम्भनम प्रभु-भोज मन्ठ। प्रभु-भोजक समयम, ख्रीष्टीयनहुँक्र रोटी ओ अङ्गुरिक रस खैठ। उ ब्याला हुँक्र, “येशू क्रूसम मुक हमार पापक दण्ड तिरदेल ओ हमन पापमसे मुक्त करैल,” कना बातक घोषणा कर्ठ (१ कोरिन्थी ११:२३-२६)।

प्रार्थना कर्ना

परमेश्वरसे प्रार्थना कर्ना कलक साधारण अर्थम ख्रीष्टीयनहुँक्र परमेश्वरसे बातचित कर्ना हो। अत्र केल नैहोक, परमेश्वरसे प्रार्थना कर्ना कलक उहाँक आराधना ओ प्रशंसा कर्ना (भजनसंग्रह १४४-१५०), उहाँह धन्यवाद चहैना (भजनसंग्रह १३६; १ थिस्सलोनिकी ५:१६-१८), उहाँसेकि उहाँक आघ आपन पाप स्वीकार कर्ना, ओ आपन पाप क्षमक लाग उहाँसे पुकारा कर्ना फे हो

(दानियल ६:३-२३; १ यूहन्ना १:६)। परमेश्वरसे आपन घटकमीक माग कर्ना फे हो (याकूब १:५; फिलिप्पी ४:६-८)।

यदि हम्र परमेश्वरक आज्ञाकारी जीवन जीलबाटी कलसे, परमेश्वर हमार करल प्रार्थना सुन्ठ ओ वाकर उत्तर देठ (भजनसंग्रह ६६:१६-२०; हितोपदेश १५:२६)। परमेश्वरसे प्रार्थना कर्ना काम उहाँसे सम्बन्ध बहैना एकठो मजा तरिका फे हो। परमेश्वरसे प्रार्थना कर्लकओसे, उहाँकम विश्वास करल मनैन्हक जीवनम भारी-भारी शक्तिक काम हुइल बाटन (याकूब ५:१३-१८)। उहमार परमेश्वरसे प्रार्थना कर्ना ख्रीष्टयन जीवनक एकठो मुख्य भाग हो।

प्रेरित

बाइबलम प्रेरित कलक परमेश्वरक खुशिक खबर प्रचार कर पठाइक लाग येशू ख्रीष्टक ज्वाजल बाह जन चेलावँ हुँडट (मर्कूस ३:१४; ६:३०)। येशू ख्रीष्ट स्वर्गम उठागैल त, उहाँक कामह उह प्रेरितहुँक्र निरन्तरता देल। हुँक्र मुवलमसे फेदोस जीलक येशू ख्रीष्टह आपन आँखिले देख्लह ओ परमेश्वरक आत्मले भरलरलह। हुँक्र ठाउँ-ठाउँम मण्डली स्थापना कर्ल, ओ मनैन परमेश्वरक वचन सिखैल। पाछ जाक यी बाह जन बाहेक पावल

लगायत और मनै फे प्रेरितम गनगैल (प्रेरित १४:१४; १ कोरिन्थी ६:१-२)। येशूक ज्वाजल, ओ पाछ थपगैल, उह प्रेरितहुँक मण्डलीक जग हुइल।

फरिसी

येशू ख्रीष्ट जर्मनासे लगभग २०० वर्ष आघसे, यहूदी धर्मम, फरिसी ओ सदुकी कैजिना दुइठो मुख्य समूह रलह। धेरजसिन फरिसीहुँक कर्मचारी रलह। यहूदी धर्मम राजनैतिक बात मिलैना ठीक नैहो कना हुँकन्हक विचार रलहन। धेरजसिन धर्मगुरुहुँक, टर्का दर्जक पुजेहोन, ओ अगुवन फरिसी समूहम रलह।

धेर जसिन फरिसीहुँक, धर्मगुरुहुँक समेत, मोशक व्यवस्था ओ पूर्रासे चल्ली आइल यहूदी परम्परा मान पर्ना बातम धेर ध्यान दिहँट (मर्कूस २:२३-२४; ७:१-१३)। छिटी-छिटी रीतीभाँती फे एकदम होशियार होक मन्ना हुइलकओसे, हुँक अपन्हेह केल धर्मी सम्भँट ओ और मनैनसे अलग रहँट (मर्कूस २:१६)।

येशू हुँकन महा करसे डँटल, काजेकलसे हुँक बरे कपटी रलह (मत्ती २३:१३-३६)। हुँक मनैन्हक आघ भर धर्मी देखपर चाहँट, तर वास्तवम, हुँक आपन पूर्रासे चल्ली आइल परम्परा मानक लाग, परमेश्वरक वचनह रद

करँट (मत्ती २३:१-७; मर्कूस ७:१-१३; १२:३८-४०)।

येशू धेर लोकप्रिय हुइलकओसे, फरिसीहुँकन आपन अधिकार लिहावापैना डर लगलन। उहओसे हुँक उहाँह मुवाइ चाहँट (मर्कूस ३:६)। हुँक सदुकीहुँकनसे मिल्लक उहाँक मान ओ लोकप्रियता घटैना उद्देश्यले, धर्मक बातम उहाँह फँसाइक लग कयौचो कोसिस कर्ल (मत्ती १६:१-१२; २२:२३-४५; मर्कूस १०:२-३; १२:१३-३२)।

फरिसीहुँक मनै मुगैलसे फे हुँकन्हक हंसा नैमुटिन, ओ मनै मुवलमसे फेदोस जीजैठ, दोस परमेश्वर हुँकन्हक न्याय कर्ठ ओ स्वार्ग या नरकम पठैठ (हिब्रू ६:२७) कैक विश्वास करँट (प्रेरित २३:६-८)। हुँक स्वर्गक खबर पुगुइयन जाट्टीसे रठ कैक फे विश्वास करँट।

बन्दरगाह

बन्दरगाह कलक पानीजहाज रोक्ना समुद्रकिनारक ठाउँ अर्थात् पानीजहाजक स्टेसन हो जहाँ जहाजम चिहुर्ना या उत्रना कर्ठ ओ मालसामान लड्ना या उत्रैना काम हुइठा। बन्दरगाह बनाइक लाग खासकैक बयाल ओ छल्कसे सुरक्षित रहल

गहिरं फैलहर समुद्रकिनारक ठाउँ
रोजजैठा (प्रेरित २७:१-८)।

बप्तिस्मा

बप्तिस्मा एकठो यहूदी संस्कार
रह। जब यहूदी जात नैरहल मनै
परमेश्वरकम विश्वास कर्ना ओ
यहूदी धर्मक हिसाबले चलना निर्णय
करैट्, तब बप्तिस्मा लिहैट्। येशूक
समयम बप्तिस्मा देहुइया यूहन्ना
येशूक लाग मनैन तयार पर्ना कामम,
उह बप्तिस्मा संस्कार प्रयोग कर्ल।
मनै आपन-आपन पाप स्वीकार
कर्ती, पापी मन घुमाक परमेश्वरकठे
आइपर्ना ओ परमेश्वरक कहल
अनुसार चलना चाहना कर्लक प्रमाणक
रुपम बप्तिस्मा लिह पर्ना बात यूहन्ना
बट्‌वैल (मर्कूस १:४)।

येशू आपन चेलन उहाँकम
विश्वास कर्ना मनैन बप्तिस्मा दिह
पर्ना आज्ञा देल (मत्ती २८:१८-२०)।
शुरुक मण्डलीम येशूक चेलावँ येशू
ख्रीष्टकम विश्वास करल मनैन
बप्तिस्मा देलक बात इतिहासम
बा (प्रेरित २:३८, ४१; ८:१२-१३,
३६-३८; १०:४६-४८)।

येशूक समयठेसे चलल् ख्रीष्टीयन
बप्तिस्मा संस्कार मण्डलीम
आम्हीसम चल्ती बा। येशूह मुक्ति
देहुइया व्यक्ति कैक करल विश्वासह



बन्दरगाह

सार्वजनिक रूपले घोषणा करक लाग,
ख्रीष्टीयनहुँकर बप्तिस्मा लेठ।

धेर जसिन, बप्तिस्मा लिहबेर
ख्रीष्टीयनहुँकर पानीम बुठ। पानीम
बुर्ना कलक आपन पापी स्वभावक
लेखि मुना संकेत हो, ओ पानीमसे
उठ्ना कलक लौव आत्मिक जीवन
पैना संकेत हो (रोमी ६:३-४)। पापी
स्वभावक लेखि मुना कलक आब
पाप हमार मलिक्वा निहो कहल हो,
याकर मतलब हम्न कबु फे पाप निकर्ती
कहल निहो। याकर मतलब त हम्न
पाप कर लगैना हमार पापी स्वभावक
कब्जम निहुइटी कहल हो। आब हम्न
परमेश्वरक इच्छा अनुसारक जीवन
जीएक लाग स्वतन्त्र बाटी।

बिसैना दिन (शबाथ दिन)

यहूदीहुँकर शनिच्चरक दिन कुछु
काम नैकरैट्, तर परमेश्वरक
आराधना करैट्। उहओर्से, यहूदी
धर्मअनुसार, शनिच्चरक दिनह

“बिसैना दिन” कहँट्। परमेश्वर यहूदीहुँकन यी आज्ञा देरख्लह : बिसैना दिन पवित्र मनहो, छ दिनसम परिश्रम कैक आपन सककु काम करहो, तर सातवाँ दिन टुह कुछु काम जिन करहो (प्रस्थान२०:८-१०)। यहूदीन्हक चलन अनुसार, बिसैना दिन शुक् सन्भ्या दिन बुरलठेसे (लगभग छ बजेसे) शनिच्चरक सन्भ्या दिन बुरट्सम (लगभग छ बजेसम) रहन। येशूक समयम, अस्त चलन रलहन, ओ आम्हीसम फे उ चलन पलबाटन।

ब्रत रना (उपवास बस्नु)

बाइबलक समयम मनै व्यक्तिगत रुपम या सामूहिक रुपम ब्रत रहँट्। सामान्य रुपम ब्रत रना कलक पानी/तरल पदार्थ बाहेक कुछ निश्चित समयसम (प्रायः एक दिन) खाना नैखैना बात बुभजाए। हुँक ब्रत रहल समयम परमेश्वरक भजन गैना, प्रशंसा कर्ना, वचन पहर्ना ओ परमेश्वरसे प्रार्थना कर्ना करँट्। हुँक ब्रत रहक आपन-आपन करल पाप कामक कारण दुखि हुइलक महसुस करँट् ओ आबठेसे पाप काम नैकर्ना कैक आपन मनम निश्चयता करँट्। असिक अपन्हेह नम्र बनैना एकठो तरीका फे रह यी। मनै खासकैक परमेश्वरक आत्मक

अगुवाई ओ सहायता पाइक लाग ब्रत रहँट्।

फरिसीहुँक ब्रत रहँट् (लूका १८:१२), हन्ना ब्रत रहक परमेश्वरसे पुकारा फे करँट् (लूका २:३७), येशू चालीस दिन चालीस रात ब्रत रल (मत्ती ४:२; मर्कूस १:१२-१३; लूका ४:१-२), मण्डलीक सदस्यहुँक ब्रत रल (प्रेरित १३:१-३), पावल फे ब्रत रल (२ कोरिन्थी ६:५; ११:२७)।

मण्डली

मण्डली कलक ख्रीष्टीयनहुँकन्हक भेला हो। उ भेलम हुँक परमेश्वरक प्रशंसा ओ आराधना कर्ठ, संगती कर्ठ, एक औरजहन उत्साह देठ, ओ परमेश्वरक वचन सुन्ठ आदी (प्रेरित २:४२-४७)। असिक हुँक विश्वासम बलगर ओ परिपक्व हुइटी जैठ। अगुवन धेर जसिन समयम परमेश्वरक वचनमसे सिखैठ। हम्र बुभकर्ना महत्वपूर्ण बात का हो कलसे, मण्डली कलक मण्डली घर नैहो, तर येशू ख्रीष्टकम विश्वास करल मनैन्हक विशेष भेला हो।

मन्दिर

येशूक जमानम, एकठो मन्दिर रह, ओ उ फे यरूशलेमम अवस्थित रह (मर्कूस ११:११)। मनै मन्दिरम बलि चहाइँट्, परमेश्वरक आराधना करँट्,

ओ परमेश्वरसे प्रार्थना करँट। युदीहुँक उ मन्दिरह परमेश्वरक घर मानँट। तर उहिम मूर्ति नैरह, काकरकि परमेश्वर मूर्तिपूजह गलती काम मन्ठ।

उ मन्दिरम “पवित्र ठाउँ” ओ “महापवित्र ठाउँ” कना दुइठो क्वाठा रह। उ दुइठो क्वाठह अलगैना लुगक एकठो बोक्लार बरानक पर्दा रह। महापवित्र ठाउँम एकठो खास बाकस रह। उ बाकसम परमेश्वरक दिहल दश आज्ञा रह। उ आज्ञा ओ परमेश्वरक और नियम यहूदी धर्मम धेर महत्वपूर्ण रह। प्रधान पुजेह्वा केल महापवित्र ठाउँम वर्षक एकचो जाइ पाइँट। उ परमेश्वरक मनैन्हक प्रतिनिधित्व करँट, ओ परमेश्वरसे क्षमा पाइक लाग हुँकन्हक नाउँ पार्क बलि चहादिहँट। येशू क्रूसम मुक सबजन्हक पापक म्वाल तिर्ल, ओ फेदोस बलि चहाइपर्ना आवश्यकता नैरहल्। मन्दिरक पर्दा फटाइ जुन परमेश्वर ओ मनैन्हक बीच मिलाप हुइल कना संकेत देठा।। उ मन्दिर पत्थले बनल बरानक दरवार रह (मर्कूस १३:१-२)। धेर अडग्नले घ्यारलरह। पवित्र ठाउँसे ज्वारल एकठो अडग्नह “पुजेहोन्हक अडग्न” कहँट। यहूदी पुरुषहुँक केल उ अडग्नम जाइ पाइँट। पुजेहोन्हक अडग्नसे ज्वारल और अडग्न रह, ओहीह “जन्यौन्हक अडग्न” कहँट।

सबसे बाहार रहल अडग्नह “अयहूदीन्हक अडग्न” कहँट। उ अडग्न छान्ही बनाइल बरण्डाअसक पर्खालले गिन्यौरसे घ्यारल रह। बरण्डाअसक उह पर्खालक छैहँम धर्मगुरुहुँक मनैन सिखाइँट, व्यापारीहुँक व्यापार करँट, बेरमहेन या गरीब मनै भीख मागँट। कबुकाल “मन्दिर” कलक एकठो मुख्य दरवार केल नैहोक बरण्डाअसक पर्खालले घ्यारल पूरा मन्दिर क्षेत्रह जनाए (मर्कूस ११:१५-१६; १२:३५)

महासभा

यहूदी समाजक मामलम, मुख्य शासन कर्ना सभा या सम्मेलनह “महासभा” कैजाए। उ सभम प्रधान पुजेह्वा अध्यक्ष रहँट, ओ सदुकी ओ फरिसी समूहक धर्मगुरुहुँक, पुजेहोन, ओ अगुवनमध्येमसे सहत्तर जन सदस्यन रहँट। रोमी सरकारक समयम, महासभा यहूदीन्हक सामाजिक ओ धार्मिक बातम पूरा अधिकार चलाए। तर उ महासभा रोमी सरकारक विरोधम कुछु कर नैस्याक। किहुह मृत्युदण्ड देना अधिकार उ सभम नैरह, तर हुँक येशूह क्रूसम टङ्गाक मुवैही पर्ना अवस्था रोमी अधिकारीहुँकन्हक सामुन्ने अनादेल (मत्ती २६:३-५, १४-१६,

४७-६७; २७:११-२६; १४:४३-६५;
१५:१-१५)।

मुक्ति

मुक्ति कलक खतरामसे बँचाजैना ओ सुरक्षित ठाउँम स्वतन्त्र रूपले जीए पैना हो। बाइबलम मुक्ति कलक पापक बन्धनमसे ओ परमेश्वरक दण्डसे छुटकारा पैना (यूहन्ना ३:१६; रोमी ६:२३), ओ लौव जीवन पैना हो। हम्र पापक बन्धन ओ परमेश्वरक दण्डसे छुटकारा पाइल मनै यी लौव जीवन जीए सेक्ठी (रोमी ६:१-१३; ८:१, ३२-३४; कलस्सी १:२२), ओ परमेश्वरक चाहल अनुसार यी जीवन जीएक लाग शक्ति पैठी (रोमी ८; एफिसी ५:१८; कलस्सी १:६-१२)। बाइबलक हिसाबले मनैन पापमसे बँचाइ सेकना व्यक्ति येशू ख्रीष्टकम विश्वास कैक केल मुक्ति पाजैठा (प्रेरित ४:१२; १ तिमोथी २:५)।

मुक्ति-दिवस कना टिहार (निस्तार-चाड)

मुक्ति-दिवस कना टिहार यहूदीन्हक मनैना एकठो बरा टिहार हो, जौन समयम हुँक मिश्रदेशक बन्धनमसे छुटकारा पाइल बातक सम्भना करँट (प्रस्थान ३-१२; मर्कुस १४:१)। इस्राएलीहुँक (या यहूदीहुँक) मिश्रदेशम

कमारा-कमारी होक चार सय तीस वर्षसम बन्धनम परलरलह।

पाछ मोशक समयम, परमेश्वर हुँकन उ देशक निरङ्कुश राजक कब्जमसे छुटकारा देलहन। मुक्ति पाइक लाग, कसिक तयार हुइना कना बारेम परमेश्वर हुँकन कैरखलहन। उहाँ मिश्रदेशक सबजन्हक बर्का छावन मुवाइक लाग रलह, काकरकि ओसिक मुवैलससे केल उ निरङ्कुश राजा हुँकन स्वतन्त्र रूपम जाइ देहुइया रलहन। परमेश्वर इस्राएलीहुँकन हुँकन्हक आपन-आपन घरक ड्वारीक चौकसम बलि चहाइल भेरीक पठरुक रगत लगाए कलन। याकर मतलब ड्वारीक चौकसम रगत लगाइल घरम परमेश्वरक मनै (या इस्राएलीहुँक) बाट कना ह्वाए। मिश्रदेशक मनै आपन-आपन घरक ड्वारीक चौकसम रगत नैलगैलरलह।

रात्क परमेश्वरक पठाइल स्वर्गदूत अउइया रलह, ओ मिश्रदेशक सबजन्हक बर्का छावन मुवैया रलह। हुँक ड्वारीक चौकसम रगत लागल घर पुगँट त, उ घर छोरदिहँट। हुँक ड्वारीक चौकसम रगत नैलागल घर पुगँट त, उ घरक ज्याठ छावन मुवाइँट।

उह रात परमेश्वरक योजना अनुसार काम पूरा हुइल् त, अन्तम उ निरङ्कुश राजा इस्राएलीन जाइदेलन

(प्रस्थान १२)। असिक मुक्ति-दिवस कना टिहारक शुरु हुइल् ओ यी टिहार हरेक साल मनाजाए। जौन देशम रलसेफे, यी टिहार, एककसँग मनाइक लाग, यहूदीहुँक यरूशलेमम जम्मा हुइँट।

मुक्ति-दिवसक खाना टिहारक पैलह दिन सन्भयाक खाजाए। खानम बलि चहाइल भैरीक पठरुक शिकार फे रह (मर्कूस १४:१२)। मुक्ति पैलक दिनम, भैरीक पठरुक रगत ड्वारीक चौकसम लगाइल घरम परमेश्वरक दण्ड नैपरल।

यी बात क्रूसम मुवावापाइल येशू ख्रीष्टक रगतह संकेत कर्ठा। येशूक बलि हमन परमेश्वरक दण्डसे बँचैठा (हिब्रू १०)। इस्राएलीहुँक मिश्रदेशक बन्धनमसे छुटकारा पाइलअस, येशूकम विश्वास कर्लसे हम्र पापक बन्धनमसे छुटकारा पाइसेकठी (रोमी ६)। येशू ख्रीष्ट बलि स्वरुप मुसेक्लकओर्से, आब हम्र मुक्ति-दिवस कना टिहार मनाइपर्ना आवश्यक नैहो (हिब्रू १०:११-१८)।

ख्रीष्टीयनहुँक येशू ख्रीष्ट बलि हुइलक ओ पापमसे मुक्ति पैलक सम्भना स्वरुप प्रभु-भोज मनैठ। थप जानकारीक लाग “प्रभु-भोज” शब्दक अर्थ हेरी।

मुवलमसे फेदोस जीना (पुनरुत्थान)

येशू क्रूसम मुल त, मनै उहाँक शरीरह एकठो बरानक पत्था खोल्क बनाइल गज्यम ढर्ल (मर्कूस १५:४३-४६)। पाछ, येशू फेदोस जीगैल। यी चाहिँ और जुनी लेक अइना काम नैहो (अर्थात् चवालाला फेरना काम फे नैहो), भेष बदल्ना काम फे नैहो। तर मुनासे आघ येशूक उमेर, रुप, रङ्ग जसिन रलहन, मुवलमसे फेदोस जील त, उह उमेरम, उह रुप, रङ्गम उह येशू जीटी बाट कना बात हो।

संसारक पूरा इतिहासम सबसे महत्वपूर्ण घटना येशू ख्रीष्ट मुवलमसे फेदोस जीयल घटना हो (मर्कूस १६:१-८)। इतिहासक अन्त्यम सब मनै मुवलमसे फेदोस जीजउइयाबाट - येशूकम विश्वास कर्ना मनै सबजन स्वर्ग जउइयाबाट, विश्वास निकरुइयन भर नरकम जउइयाबाट। स्वर्ग जउइयन्हक शरीरम, भूतपज्यात लाग नैसेकट, ज्वागबिज्वाग नैलागट्, पाप नैरहट्, ओ कुइ फे मुवाइ नैस्याकट् (१ कोरिन्थी १५:५१-५७)।

मोशा

मोशा इस्राएलीन्हक सबसे बरा अगुवा रलह। उ येशू ख्रीष्टसे १५०० वर्ष आघ जर्मलह। मोशा, परमेश्वरक सहायताले, इस्राएलीन मिश्रदेशक बन्धनमसे छुटैल। “इस्राएलीन

दिहस,” कैक परमेश्वर मोशह व्यवस्था देल। उ व्यवस्थम दश आज्ञा फे रह (प्रस्थान २०-३१)। परमेश्वरसे पाइल उ व्यवस्था मोशा मनैनसे बटोइल ओ पाछ लिस्वक इस्राएलीन देल।

मोशक लिखल उ व्यवस्था बाइबलक पैल्ह पाँचठो किताबम बा। उहओसे उ व्यवस्थह कबुकाल मोशक व्यवस्था फे कैजिठा (मलाकी ४:१; लूका २४:४४; यूहन्ना १:१७; प्रेरित ६:१३-१४; २८:२३)। हेरी “व्यवस्था”।

यरूशलेम

इतिहास ओ संस्कृतिक धनी मानजैना यरूशलेम धेर पुरान एकठो ऐतिहासिक शहर हो। येशूक समयम यी शहर यहूदीया क्षेत्रम रह। यहूदीन्हक हिसाबले, यी सबसे महत्वपूर्ण शहर रह काजेकलसे यहूदी धर्मक केन्द्र मानजैना परमेश्वरक मन्दिर यह शहरम अवस्थित रह। सालो मुक्ति-दिवस मनाइक लाग यहूदीहुँकन, सक्यासम, यरूशलेमम जाइपरन। वर्तमान समयम, यी शहरह जेरुशलेम कठ, ओ यी इजराएल देशम पर्ठा।

यहूदी (हिब्रू /इसाएली)

यहूदी, हिब्रू, या इस्राएली एक्क जतिक मनैन जनैना नाउँ हो। पुरान नियमम सबसे पैल्ह हिब्रू अब्राहाम रलह (उत्पत्ती १४:१३), ओ हुँकाहार सन्तान फे हिब्रू हुइल। हुँकन्हक बोल्ना भाषह फे हिब्रू कैजाए ओ येशूक समयम फे हुँक उह भाषा ब्वाल्ट (यूहन्ना १६:२१; प्रेरित २२:२)। आम्हीसम उ भाषा बोलजैठा।

अब्राहामक नट्या याकूब रलह (उत्पत्ती २५:१६-२४)। याकूबक नाउँ पाछ जाक इस्राएल हुइलन (उत्पत्ती ३२:२६)। इस्राएलक बार भाइ छावन रलहन (उत्पत्ती ३५:२२-२६)। उह बार भाइ छावन्हक सन्तान बार जाति हुइल, ओ हुँक एकमुष्ठ रुपम इस्राएली कैक चिन्हगैल। पाछ जाक हुँक यहूदी कैक फे चिन्हगैल। वास्तवम “यहूदी” शब्द यहूदामसे आइल हो। याकूबक बार भाइ छावनमध्येम एकठो छावक नाउँ यहूदा रलहन। यहूदक बसोबास करल क्षेत्रक नाउँ फे यहूदा हुइल्। तर उ ठाउँ बार कुल रहल देशक एक भाग केल रह। पाछ हुँक उत्तरी राज्य ओ दक्षिणी राज्य कैक दुई भाग हुइल (हेरी १ राजा १२ अध्यायसे पाछओर)। उत्तरी राज्यह इस्राएल कैगिल्, दक्षिणी राज्यह यहूदा कैगिल्।

पाछ जाक अश्शूर देश उत्तरी राज्यह हमला कैक लैगिलन। तबदोस उ उत्तरी राज्यक सब इस्राएलीहुँकन अश्शूर देशम लैगिल, ओ आपन मनैन उत्तरी राज्यम बसोबास कर लगैल। उ ब्याला दक्षिणी राज्य केल बाँचल, ओ यहूदा देशक मनैन 'यहूदी' कहलग्लन। यहूदा राज्यह, धेर पाछ, ग्रीकहुँकन्हक ओ रोमीहुँकन्हक समयम, यहूदीया कैगिल्। हुँकन्हक धर्मह यहूदी धर्म कहँट। उ ब्याला "इस्राएलक सन्तानन्" एकमुष्ठ बुभाइक लाग, कबुकाल "इस्राएली" कहँट ओ कबुकाल "यहूदी" कहँट।

आजकाल फे इजराएल देशम ओ संसारक धेर मुलुकम यहूदीहुँकन पलबाट। हुँकन आम्हीसम फे पुरान नियमक धेर बात ओ हुँकन्हक आपन परम्परा मन्टीरठ।

येशू ख्रीष्ट

हुइना त येशूक अस्तित्व सड्डभर पलबाटन, तर फे उहाँ लगभग २००० वर्ष आघ इस्राएल देशम मनैया होक जर्मलह। येशू ख्रीष्ट एकमुष्ठ रुपम बाइबलक ओ ख्रीष्टीय विश्वासक केन्द्रीय पात्र हुइट। उहाँ एकठो मनैया केल नैरलह, तर परमेश्वर फे रलह। उहओसे उहाँकम परमेश्वरक गुण रलहन। उहाँ मनैया होक जर्मल त, उहाँकम रहल परमेश्वरक गुण

नैहेरैलन (यूहन्ना १:१-२; कलस्सी १:१५-२०; हिब्रू १)। असिक उहाँ परमेश्वर त पलरलह ओ उह समयम मनैया फे हुइल (फिलिप्पी २:५-११)। उहाँ मनैया होक जर्मलसे फे, उहाँकम पाप स्वभाव नैरलहन। उहाँ धेर फ्यारा पापम फँसना अवस्थम पर्ल, तर पापम कबु फे नैफँसल (हिब्रू ४:१४-१६)।

परमेश्वरक राज्य आइल देखैटी, येशू खुशिक खबर प्रचार कर्ल ओ उ राज्यम प्रवेश पाइक लाग आपन-आपन पापी मन घुमाक परमेश्वरकठे आइपर्ना बात सिखैल (मर्कूस १:१५)। मनैन पापमसे मुक्ति दिहक लाग, परमेश्वरक योजना अनुसार उहाँ क्रूसम मुल। उहाँक मुवल शरीरह मनै एकठो गज्यम ढर्ल। वाकर तीसर दिन, उहाँ मुवलमसे फेदोस जीगैल (मर्कूस १५-१६)। फेदोस जीलक चालीसवाँ दिनम, धेर मनै देख्टी-देख्टी, उहाँ स्वर्गम उठागैल (लूका २४:५०-५२)। आजकाल उहाँ सर्वशक्तिमान परमेश्वरक दाहिन पाञ्जर बैठल बाट (हिब्रू १:३; १०:१२)। येशू एक दिन आपन राज्य स्थापना कर फेदोस अउइयाबाट। तबदोस येशू ख्रीष्टकम विश्वास करल मनै स्वर्गम सड्डभर परमेश्वरकसँग रहपैहीं, तर उहाँकम विश्वास नैकरल मनै नरकम जैहीं (मत्ती २४-२५)।

रङ्गशाला

रङ्गशाला कलक सभा कर्ना या नाटक प्रदर्शन कर्ना हजारौं मनैन्हक क्षमता रहल भव्य भौतिक संरचना रह। कार्यक्रम पदर्शन कर्ना ठाउँ सबसे टर रह ओ वाकर गिन्यौर मनै बैठक लाग भज्याडअस ठाउँ बनाइल उ समयम ग्रीस, एफिसस ओ रोमम रहल रङ्गशाला धेर प्रचलित रह। एफिसस शहरम पावलक विरोधम हूलदङ्गा मचगैल् त पाछ, मनै एकजुट होक पावलक संघरेन पकर्ल ओ रङ्गशालम घँस्यैटी लैगिल (प्रेरित १६:२३-२६)।

रोटी खैना टिहार (अखमिरी रोटीको चाड)

रोटी खैना टिहार परमेश्वरक स्थापना करल और टिहार हो (प्रस्थान १२:१७)। यी टिहार फे इस्राएलीहुँक मिश्रदेशक बन्धनमसे छुटकारा पैलक सम्भनम मनाइँट्। इस्राएलीहुँक धेर जसिन पाउरोटी खाइँट्। उ पाउरोटीम खमीर कना एक मेहिक चिज मिलाइलरह। उह खमीर रोटी फुलाए।

मिश्रदेशसे छुटकारा पैलक रात, हुँक हतार-हतार जाइपर्ना हुइलकओसे, परमेश्वर हुँकन रोटीम खमीर जिन मिलाओ कलन। (पिठम खमीर नैमिलैलसे पाउरोटी नैबनट्, रोटी केल बन्ठा।) यी टिहारक समयम इस्राएलीहुँक परमेश्वर हुँकन



रङ्गशाला

मिश्रदेशक बन्धनमसे छुटकारा दिहल सम्भनम खमीर नैमिलाइल रोटी खाइँट्।

वास्तवम, मुक्ति-दिवस ओ रोटी खैना टिहार सम्बन्धित बा तर फे उ अलग-अलग टिहार हो (लेवी २३:५-६)। मुक्ति-दिवसक द्वासर दिनसे सात दिनसम रोटी खैना टिहार रह। तर यी दुनु टिहार सँगसँग मनाजैना हुइलकओसे, यी एक्कठो टिहारअस फे रह (मर्कूस १४:१)। उहओसे यी टिहारक लाग दुनु नाउँ अदल-बदल चलाजाए। याकर मतलव मुक्ति-दिवस कलसे फे, उह टिहार, ओ रोटी खैना टिहार कलसे फे, उह टिहारह जनाए (प्रस्थान १२:१४-१८)। थप जानकारीक लाग “खमीर” शब्दक अर्थ हेरी।

लङ्गर

लङ्गर कलक चलतीरहल लाऊ या पानीजहाजह पानीक माभम ज्वाक

परल कलसे डौरी या साङ्गलाले बाहान्गौल् पानीम टरसम खसाजैना फलामक साधन हो। लाऊ या पानीजहाजह आघ लैजाइपरल कलसे खसाइल लङ्गर पानीमसे तानजैठा। (प्रेरित २७:२६, २७:१२-१३)।

विश्वास

सामान्य रूपम विश्वास कर्ना कलक केक्रोम भर पर्ना हो। बाइबलम विश्वास कर्ना कलक खास कैक परमेश्वरकम भर पर्ना हो। परमेश्वरकम भर पर्ना कलक द्याख नैसेकजैना बातम विश्वास कर्ना हो (हिब्रू ११:१)। हम्र परमेश्वरह ओ हमार लाग करल परमेश्वरक प्रतिज्ञा भविष्यम कसिक पूरा हुई कना बात आँखिले द्याख नैसेकटी। तर हम्र बाइबलम परमेश्वरक कहल बात विश्वास कर्ती, जसिन कि, उहाँ हमन प्रेम कर्ठ (१ यूहन्ना ४:८-१०), उहाँ हमार वास्ता कर्ठ (१ पत्रुस ५:७) ओ आत्मिक जीवन जीएक लाग, आवश्यक पर्ना सब चिज उहाँ हमन देरख्ल (२ पत्रुस १:३-४)। हुइना त, रुख्वाबरेख्वा या चिरैँचुरुङ्गन या हमार आसपासम रहल भौतिक वस्तु द्याखअस असिन बात हम्र आँखिले निदेख्ती, तर फे हम्र असिन बात सत्य हो कैक विश्वास कर्ती ओ उह अनुसार जीठी।



लङ्गर

उदाहरणक लाग, मानि ले डगरीम जैटी-जैटी, एकठो सङ्गवा रहल ठाउँम पुगठी। उ सङ्गवा बल्या बा कैक विचार कर्ती, तर उ सङ्गवमसे उपार निजैटी कलसे, उ सङ्गवा जाट्टीसे बल्या बा कैक हम्र विश्वास निकर्ती। तर, यदि उ सङ्गवमसे उपार जैठी कलसे, उ सङ्गवम भर पर्ली कना बात थाहाँ हुइठा। यी बात सङ्गवम विश्वास करल बात हो।

ओसहँक, परमेश्वर परम उपकारी बाट (भजनसंग्रह १४५:८-६; मर्कूस १०:१८), उहाँ हमन मुक्ति देठ (एफिसी २:८-६), ओ उहाँ हर समयम हमार भलो हुइना काम कर्तीबाट कना बात हम्र विश्वास करपर्ठा (रोमी ८:२८)।

व्यवस्था

साधारण हिसाबले थारु समाजम व्यवस्था कलक राजनैतिक व्यवस्था बुभजैठा। तर पुरान नियमम, व्यवस्था कलक जीवनक सक्कु पक्षह समेट्ठा: मजा ओ नैमजा व्यवहार, धार्मिक क्रियाकलाप, ओ सामाजिक जीवन (राजनीति समेत)। इस्राएलीन्हक शासक परमेश्वर हुइलकओसे, व्यवस्था कलक परमेश्वरक इच्छा, आज्ञा, ओ नियम हो। व्यवस्था भङ्ग कर्ना कलक परमेश्वरक आज्ञा नैमन्ना हो, या नियम उल्लङ्घन कर्ना हो, या पाप कर्ना हो। उहओसे इस्राएलीहुँक्र सब काम व्यवस्था अनुसार करैट्। सब काम कलक पारिवारिक ओ सामाजिक क्रियाकलाप (जस्त: भ्वाजकाज, मर्नीकर्नी, स्वास्थ्य ओ सरसफाइ), धार्मिक क्रियाकलाप (जस्त: परमेश्वरक आराधना, ओ टैटिहार) आदि पठा।

शुरुम, परमेश्वर मोशह दश मुख्य आज्ञा देलह (प्रस्थान २०:१-१७)। पाछ, यी आज्ञह मोशा बिस्तारित रुपम बाइबलक पैलह पाँचठो किताबम लिखल (उत्पत्ती, प्रस्थान, लेवी, गन्ती, ओ व्यवस्था)। बाइबल पुरान नियम ओ लौव नियम कैक दुई भागम लिखल बा। पुरान नियमम,

यी पाँचठो किताब समेत, जम्माजम्मी उनन्चालीसठो किताब बा। पुरान नियमक और किताब परमेश्वरक वचन बोलुइयन, राजाहुँक्र, ओ और मनै लिखलह। यी सक्कु मनै यहूदी रलह। कबुकाल पूरा पुरान नियमह व्यवस्था कैजिठा (यूहन्ना १०:३४; १२:३४; १५:२५)। कबुकाल जुन पुरान नियमक पैलह पाँचठो किताबह केल व्यवस्था कैजिठा (लूका २४:४४)।

परमेश्वर “इस्राएलीहुँकन दिहस्” कैक मोशह दश आज्ञा ओ बाइबलक पैलह पाँचठो किताबम रहल और व्यवस्था दिहलओसे, मोशक लिखल यी पाँचठो किताबह कबुकाल मोशक व्यवस्था फे कैजिठा (मलाकी ४:१; लूका २४:४४; यूहन्ना १:१७; प्रेरित ६:१३-१४; २८:२३)।

ख्रीष्टीयनहुँक्र बुभपर्ना महत्वपूर्ण बात का हो कलसे पुरान नियमक धेर जसिन व्यवस्था, जसिन खाना ओ स्वास्थ्यसे सम्बन्धित व्यवस्था ओ निश्चित धार्मिक व्यवस्था, हमार लाग येशूक आनल मुक्तिक कारणले प्रभावकारी निहो (गलाती ३:२३-२६; हिब्रू ६:१-१०:१८)। तर येशू व्यवस्था भङ्ग कर अइलक निहुइट, उहाँ त व्यवस्था पूरा कर अइलक हुइट (मत्ती ५:१७-२०)।

शैतान

शैतान भूतन्हक रज्वा हो (मर्कूस ३:१३) ओ परमेश्वरक मुख्य शत्रु हो। उ फे आत्मा रलकओर्से, ओही द्याख नैसेकजाइट। वाकर मुख्य काम कलक परमेश्वरक विरोध कर्ना हुइस, तर शैतान मनपर्दी कुछु फे कर नैपाइट्(अय्यूब १)। शैतान परमेश्वरक विरोध केल नैकरट, तर मनैन दुःख देना काम फे कर्ठा। उ मनैन्हकम पापी मन जगादेठा, उहओर्से मनै औरजहन ठग्ना, ढँठना, लुटना, ओ मुवैना काम कर्ठ। असिक मनै पापम फँसठ (यूहन्ना ८:४४; १३:२; २ कोरिन्थी २:११; एफिसी ६:११; १ तिमोथी २:२४)। शैतान मनैन परमेश्वरकम विश्वास कर नैदिहट् (२ कोरिन्थी ४:४)। उ परमेश्वरक करल सृष्टि ओ योजना भताभुङ्ग पर्ना काम कर्ठा, तर परमेश्वरसे अनुमति पाइलसम केल बिगार करसेकठा (अय्यूब १:१२; २:६)।

हम्र परमेश्वरक शक्तिले केल शैतानह हराइसेकठी। यदि हम्र शैतानक विरोध कर्बी कलसे, उ हमारठेसे भग्नेबा (याकूब ४:७)। क्रूसम टङ्गागिल येशू शैतानह हरारखल (हिब्रू २:१४-१५)। उह फे संसारम वाकर शक्ति आम्हीसम पलबाटस। तर अन्तम, शैतानह सह निसेकजैना दुःख भ्वाग परहिँस, काकरकि उ

आगीक भट्ठीम फाँकजैनेबा (प्रकाश २०:७-१०)।

सदुकी

सदुकीहुँकर धर्मक हिसाबले यहूदी रलह, तर हुँकर राजनीतिम फे हाँठ डाररखलह (प्रेरित ५:१७-४२)। असिक हुँकर धेर जसिन धार्मिक मामिलम ध्यान देना फरिसीहुँकनसे फरक रलह। जनसंख्यक हिसाबले सदुकीहुँकर फरिसीनसे कम रलसे फे, हुँकर धनी-धनी रलह ओ समाजम हुँकन्हक प्रभाव धेर रलहन काकरकि धेरजसिन बराबरा पदम हुँकन्हक बाहुल्यता रलहन।

सदुकीहुँकर मोशक व्यवस्था बाहेक और यहूदी परम्परा नैमानँट्, तर समाजम अधिकार जमैना हुँकन्हक उद्देश्य रलहन। मनै मुलसे फे, हुँकन्हक हंसा नैमुटिन ओ मुवल मनै फेदोस जीजैठ कैक सदुकीहुँकर विश्वास नैकरँट् (मर्कूस १२:१८; प्रेरित २३:६-८)। अत्र केल नैहोक, हुँकर जीन्दगीक सक्कु घटना परमेश्वरक अधिनम रठा ओ स्वर्गक खबर पुगुइयन जाट्टीसे रठ कैक फे विश्वास नैकरँट्।

फरिसीन्हकअस सदुकीहुँकर फे धर्मक बातम येशूह फँसाइक लग कयौचो कोसिस कर्ल (हेरी “फरिसी”)।

सभाघर

सभाघर कलक साभया घर रह। उह घरम सर्वसाधारण मनै ओ अगुवन एक-आपसम भेटघाट करँट, ओ उहँ यहूदी धर्मक शिक्षा सिखाजाए (मर्कूस १:२१)। उ घर परमेश्वरक आराधना कर्ना ओ परमेश्वरसे प्रार्थना कर्ना ठाउँ रह। परमेश्वरक वचन सिखैना घरह धर्मगुरुहुँक सञ्चालन करँट। हुँक सामाजिक भैभग्रा उहँ मिलाइँट ओ दोषी ठहल मनैन दण्ड फे उहँ दिहँट।

स्वर्ग


स्वर्ग परमेश्वरक घर हो। स्वर्गक खबर पुगुइयन उहँ परमेश्वरक आराधना कर्तीरठ। येशूकम विश्वास करुइयन मुलसे, स्वर्गम सड्भर परमेश्वरकसँग रहुइयाबाट। मुक्ति पैना कलक स्वर्ग जैना हो (२ कोरिन्थी ४:१६-१८; १ पत्रुस १:४)। स्वर्ग कलक दुःखकष्ट, रोगबेरा, भग्राभाँटी, या चिन्ताफिक्री नैहुइना ठाउँ हो, तर खुशी, आनन्द, सुखचैन, रमाहटम रहपैना ठाउँ हो (२ तिमोथी ४:१८; १ पत्रुस ५:१०; प्रकाश २१:१-४)।

स्वर्गदूत

स्वर्गदूत परमेश्वरक सेवा करुइयन हुइट (हिब्रू १:७)। हुँक मनै नैहुइट, ओ हुँकन्हकम पाप नैरटिन। सामान्य रुपले हुँकन द्याख निसेकजाइट, तर जब परमेश्वर हुँकन मनैन्हकठे खबर पुगाइ पठैठिन, तब हुँक मनैअस देखपठ। कबुकाल मनैन्हकठे देखपरबेर, हुँक चहकार उज्जर भुल्वा घालल्अस देखपठ। हुँकन्हक मुह फे चहकार उज्जर देखपठिन, ओ हुँकन देख्क मनै डरैठ (मत्ती २८:२-३; मर्कूस १६:५-८; लूका १:११-१३; २:६)। जे होस, स्वर्गक खबर पुगुइयन मनैअस नैहुइट, काकरकि हुँक भ्वाजविहा नैकर्ट, ओ लर्कापर्का नैजमैट (मर्कूस १२:२५)। हुँक परमेश्वरक सेवा ओ उहाँक खबर मनैन्हकठे पुगादेना काम केल नैकर्ट, तर परमेश्वरक आराधना फे कठ (लूका २:१३-१४; हिब्रू १:६; प्रकाश ५:११-१२)।


हिब्रू

हेरी “यहूदी”।




पावलक पैल्ह प्रचार यात्रा

प्रेरित १३:१ १४:२८



पावलक द्वारा प्रचार यात्रा

प्रेरित १५:३६ १८:२२



पावलक तीसर प्रचार यात्रा

प्रेरित १८:२३ २१:१७

